


## Kamapim lo bilong politikel pati long 2002

- pes 2

## Wenge laikim PDM i brukim marit wantaim ol arapela pati

- pes 3



## Hevi long Is Timor



pes 19-20

# Bulolo pipel straik egensim Jabanardi

### YAKAM KELO i raitim

BIKPELA straik long Bulolo taun long Mande dispela wik i mekim Bulolo i kamap olsem wanpela hatpela taun taim ol komyuniti i soim belhat bilong ol egensim wanpela bikpela kampani ol i kolim Jabanardi.

Ol famili na lain bilong wanpela sekyuriti gad husat tu em wanpela komyuniti plisman i bin straik egensim Jabanardi menesmen bikos kampani i bin kisim dispela sekyuriti wokman i go paitim em nogut tru long las wikem. Dispela bihainim wanpela stil pasin i bin kamap long stua long las wik na menesmen i autim belhat bilong ol long dispela sekyuriti gad bilong stua.

Tasol wanpela longtaim man bilong Bulolo na Rurel Plis Kodineta Simon Yipam i tok dispela stil pasin na kros i save kamap olgeta taim wantaim ol komyuniti na Jabanardi kampani.

Mista Yipam i tok olgeta taim i mas gat ripot olsem ol man i brukim Jabanardi stua o ol manmeri i straik egensim Jabanardi kampani. Olsem na mi ting i mas i gat as long dispela kain pasin i kamap bikos dispela pasin i save kamap olgeta taim, Mista Yipam i tok.

Em i tok bikpela samting em Bulolo taun i mas gat gutpela wok bisnis i kamap long kirapim taun na ol manmeri. Tasol ol manmeri wantaim ol bisnis komyuniti i mas gat gutpela pasin wanbel na poroman i stap namel long ol. Dispela tasol inap kamapim gutpela senis na developmen long Bulolo taun, em i tok.

Stesin komanda bilong Bulolo Inspekta Noah i tok singaut long ol manmeri husat i bin karim ol bikpela bikpela samting bilong stua long kisim i go bek. Ol i no ken holim bikos ol plisman bai mekim wok painimaut long dispela samting.

Inspekta Noah i tok ol plisman i bin hat tru long stapim dispela trabel long Mande bikos ol manmeri no isi lain. Moa long 5000 manmeri i go insait long Jabanardi na mekimsave long kisim ol samting long laik na i mekim hat tru long plis i stapim wanpela man o meri. Tasol ol plisman bai karimaut ol wok bilong ol i go yet, em i tok.

Wanpela komyuniti bikman long Bulolo i tok ol pipel i mekim dispela belhat pasin long kampani ya bikos dispela kampani i nogat wanpela gutpela rispek long ol manmeri. Em i save giaman kisim ol manmeri long wok na bihain rausim ol hariap tasol. Na tu olgeta prais bilong ol kaikai na samting long dispela stua tasol i bikpela moa winim prais bilong ol arapela stua. Dispela i mekim ol manmeri i belhat tu.

Bikman ya i tok ol manmeri i save oltaim komplek na kros long Jabanardi stua bikos menesmen bilong dispela kampani i hatpela lain tru we i no save rispektim ol lokol manmeri long Bulolo.


Bikman ya i tok long las wik 20 man bin brukim Jabanardi stua na go kisim ol samting long laik bilong ol. Long wikem, menesmen bilong kampani i bin kisim dispela sekyuriti bodi gad bilong stua i go long Lae na paitim em nogut tru. Dispela i mekim ol famili na lain bilong dispela sekyuriti man i kros olgeta na straik long Mande dispela wik. Straik bilong ol i pulim sapot bilong planti manmeri moa husat i save kros tu na istap na ol i go insait long stua na mekim nabaut long ol samting.

Memba bilong Bulolo Samson Napo i tok dispela kain hevi ino ken go het moa bikos gutpela nem bilong Bulolo taun i bagarap kamap olsem kauboi taun na em i no laikim tru. Olsem na em bai toktok wantaim Provinsal Lo na Oda komiti siaman, Luther Wenge long ol i mas kamap wantaim wanpela plen we ol plis na ami i mas bung wantaim na go insait long wanpela operesen bilong rausim olgeta setelmen long hap.

Mista Napo i tok Bulolo taun i laik i gat ol nupela developmen na senis i kamap olsem na em i no laikim kain bikhet na trabel pasin i kamap long bagarapim ol gutpela developmen long kamap.

wanpis beng long Bulolo, Papua Niugini Benking Kopresen (PNGBC) i tokaut olsem ol bai wet na lukim hevi bilong Bulolo bai igo olsem wanem. Het opis long Mosbi i tok sapos i gat kain hevi olsem i kamap we inap bagarapim laip na sindaun bilong ol wokman bilong beng, ol i ken go het long kamapim sampela strongpela disisen long bihain. Tasol nau yet ol bai wet na kisim gut ripot na wetim dispela hevi bai i go olsem wanem, PNGBC het opis long Mosbi i tokaut.

Wantok i traim long toktok wantaim menesmen bilong Jabanardi kampani tasol telepon i wok long ring nating tasol.



Wantok  
SSH Stacks  
UC San Diego  
Received on: 11-15-99

• Ignas Kokol na liklik tumbuna bilong em i kisim win i stap long Wirui nabis long Wewak.

# NPF siaman tok ol fan i stap gut

### JOE KANEKANE i raitim

SIAMAN bilong NPF bot of dairektas Jimmy Maladina i askim olgeta wokas husat i save kontribute i go long dispela fan long noken kirap nogut long wanem ol stori i kamap long niuspepa olsem bikpela kampani Fainens Pasifik i laik tek ova long fan.

Em i tok, em i sori olsem ol niuspela lain i kalap hariap tru na raitim stori na ol i no laik glasim gut ol stori tru we i kamap long dispela samting long wanem planti ol lain i wok long kalap kalap long dispela nius.

Mista Maladina i tok dispela stori i kamapim poret tingting long ol wokas tasol em i no min olsem PNGBC bai tek ova long dispela fan long wanem ol i stretim dispela hevi pinis.  
"Dispela ol stori i wok long kamap i mas noken

paulim tingting bilong ol kontributa long wanem mipela i bin miting wantaim PNGBC husat i benk bilong mipela long lukim sampela pepa na ol i wanbel long mipela," em i tok.

Mista Maladina i tok dispela tok win i kamap bihain tasol long menesmen bilong NPF i no laik soim sampela pepa i go long PNGBC long lukim taim benk i askim ol na long dispela as ol i salim wanpela man bilong ol i go.

Em i tok tu olsem NPF i gat planti ol kontrak wantaim ol bikpela benk we i save askim NPF long soim sampela pepa we kampani i wok long ron long en na sapos ol i laik kisim lon o ova draf em bai isi.

"Em liklik samting namel long mipela na benk na mi ken tok olsem long aste long moning mi bin holim wanpela miting wantaim siaman bilong PNGBC na mitupela i wanbel olsem bai mipela i soim ol pepa we benk i laikim. Dispela em pinis,"

em i tok.

Mista Maladina i tok tu olsem olgeta kampani i mas save olsem taim em i go insait em wantaim bot bilong em i traim hat tru long pinisim olgeta hevi bilong NPF long wanem longpela taim tumas na dispela hevi i wok long bung i kam.

Em i tok tru NPF i wok long bungim ol hevi tasol bot i wok hat long luksave olsem mani bilong ol lain i stap gut na ol kamapim planti disisen long strongim dispela tingting.

"Mi laik tok aut long olgeta lain bilong mipela long kantri olsem long yia 2000 long mun Julai bai olgeta dinau mani bilong NPF i bai pinis olgeta. Dispela em i kamap bihain tasol long sampela ol disisen we mipela i wokim," mista Maladina i tok.

Em i askim ol wokas long weit i stap isi long wanem mani bilong ol i stap gut na i nogat wanpela rot we ol i mas poret na kalap.

## Stretim gut lo bilong politikel pati: Napo

MEMBA bilong Bulolo Samson Napo i tok aut olsem nupela lo gavman i laik kirapim long was gut long politikel pati i no redi yet long Novemba palamen sidaun long wanem i gat sampela sumting long dispela lo i no stret.

Mista Napo i tok olsem em i lukim sampela rong long pat tri na pat fo long dispela lo.

Pat tri i tok olsem by gavman bai fundim ol political pati na pat fo em long sait fainensel riten o ol money i save kam bek long wan wan memba.

Napo i tok olsem of memba bilong palamen i mas stretim tupela pat bifo ol i karim i go long palamen long pasim olsem lo.


Mista Napo i tok olsem wan wan politikel pati i mas kamapim moni bilong ol yet long sapotim ol kendidet bilong ol. Em i tok olsem i no stret long gavman long givim mani long ol pati long sapotim ol kempen bilong ol bikos gavman i save lukautim mani bilong ol pipel bilong kantri.

Long sait bilong ol fainensel riten or ripot, Napo i tok olsem em i laik lukim ol memba bilong palamen i givim ol ripot bilong ol i go long spika bilong palamen wantem ol ripot bilong ol moni bilong ol politikel pati na ol ripot bai kamap olsem pablik pepa.

Na ol husat i laik lukim hoa ol memba bilong na ol pati i save yusim mani bilong ol ol ken kisim ol opis bilong spika.

Mista Napo i tok ol wokman long PNG save kisim taim stret taim long i save tupela takis, inkam tex na VAT watem ol lik lik tex bilong ol benk i no stret bikos gavan i wok long kisim moni long ol gras ruts na givim ol bik man.

Em i tok olsem dispela nupela lo bilong ol politikel pati bai was gut tru long ol lida bilong kantri na ol i mas luk luk long ol sabmisen pastem ol i kisim i go long palamen.



• Memba bilong Bulolo Samson Napo.



• Memba bilong Kabwum Ginson Soanu na ol viles pipel long ples Wandabong long taim bilong opim nupela sios.

# Kamapim lo bilong politikel pati long 2002, Pora i tok

### CLEMENT POYE i raitim

SAPOS Papua Niugini i mekim planti senis tumas long ol lo bilong kantri, bai yumi i nogat wanpela lo i stap moa long bihain, lida na wanpis memba bilong Nesenel Pati Paul Pora i tokaut long las wik long Madang.

Insait long bikpela bung bilong Konstitusenel Developmen konfres long Madang las wik, Mista Pora i tok long mekim planti senis tumas long lo bilong kantri bihain tasol long 24 krismas bilong independens i soim olsem kantri i no ron gut.

Mista Pora i tok dispela singaut nau long mekim senis na kamapim lo bilong politiks insait long Papua Niugini i inap kamap 15 krismas i go pinis.

Em i tokaut olsem lo bilong Papua Niugini em yangpela tumas na husat lain i ting lo bilong PNG em olpela, dispela i no tru.

Mi ting nau i no gutpela taim bilong mekim ol senis tasol sapos yumi laik kamapim senis long lo bilong politiks, mipela i mas statim long level fil, Mista Pora i tok.

Mista Pora i egensim tu sotpela taim tasol gavman i givim long komiti bilong Konstitusenel Developmen Komisn (CDC) long kamapim dispela senis lo long putim aut long Novemba taim palamen i bung.

Em i tok i bin gat sampela lo palamen i kamapim tasol ol dispela lo i no wok gut bikos gavman i no givim inap taim na hariapim ol dispela lo long kamap.

"Mi ting yumi gat planti taim i stap olsem na yumi mas mekim samting gut na isi long en," em i tok na surikim tu olsem dispela lo i mas stap i go inap long yia 2002.

"Long yia 2002 bai yumi olgeta i ken pilai long level graun," em i tok.

Dispela bung long Madang las wik i bin kamap long kisim toktok na tingting long kamapim lo we i banisim ol memba na politikel pati bilong ol.

Dispela lo i laik sanap olsem wanem memba i sanap long ileksen long nem bilong wanpela pati na winim ileksen, em i no ken kalap lusim dispela pati bihain.

Sapos em i lusim pati bihain, em i mas go bek long bai ileksen o baim sampela sas i go

long dispela pati. Na tu nara-pela pati ino ken pulim na grisim ol memba i go long sait bilong ol.

Sapos dispela i kamap, dispela pati i ken kisim sas. Na tu ol memba i no ken pret o ol lain i no ken hensapim ol memba na pulim ol i go kam long joinim wanpela pati long taim bilong fomim gavman o vot i nogat bilip.

Ol memba i mas fri long mekim disisen bilong ol yet. Dispela lo tu bai karamapim planti samting long sait bilong ol memba na politikel pati na pasinbilokng kisim ol memba long fomim pati na kamapim gavman na planti arapela moa.

Man i go pas long dispela komiti bilong mekim dispela lo em memba bilong Bogia Bernard Mollok.

## WANTOK

All departments. Phone: 325 2500 - Fax: 325 2579  
P. O. Box 1982, Boroko, NCD, Papua New Guinea

Publishing Weekly, Thursday, for  
Word Publishing Company Ltd.

Printed and published by Anna Solomon of Bittern Place, Gordons, at Allotment 2, Section 209, Spring Garden Road, Hohola, for Word Publishing Company Ltd.

General Manager and Group  
Editor in Chief:  
Anna Solomon.  
Advertising Manager:

Papers distributed by air  
throughout PNG.  
Available by air mail  
subscription within  
Papua New Guinea  
and overseas  
Email address:  
word@global.net.pg

Advertising deadlines. Display bookings: Tuesday midday. Camera ready copy: Wednesday midday. Classified Advertising: Wednesday 5pm.

Word Publishing Company Ltd. is owned by the four major churches of Papua New Guinea: Catholic 55%, Lutheran 25%, Anglican 10%, and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Ltd. and are set out in full on the reverse side of its official display Advertising Bookings form.

## Raskol sutim tupela man dai long Mosbi

Tupela man i bin dai na faivpela i bin kisim bagarap bihain long ol sut aut long gan insait long Pot Mosbi long wiken.

NCD plis komanda Raphael Luafolo i tok olsem dispela birua long kisim bagarap long gan em nogut tru na singaut long olgeta komyuniti long wok bung wantim ol plis long stapim moa dispela ol dai.

Mista Huafolo i tok dispela kain pasin long kisim laif bilong arapela man nating nogat gutpela as en ino pasin bilong ol man na em singaut long olgeta komyuniti long wok bung wantim na stapim dispela pasin.

Komanda i tok wanpela bilong dispela dai i bin kamap bihain long ol raskol i sutim em long fran bilong YWCA taim em i traim long stapim wanpela stil pasin i laik kamap na arapela, em wanpela meri i dai long haus sik long gan sot taim raskol paia long Hohola long Fraide.

Saspek long Hohola sut aut em ol plis ino save na wok painim aut i wok long go

het yet na saspek long YWCA em ol plis i holim long fraide na painim stil kar na pistol ol i usim long kilim dispela man Samarai.

Mista Huafolo i tok saspek we ol plis i holim em nem bilong em, Dubana David Abore bilong Rigo Sentrol Provins.

Em i tok aut long nem bilong man i dai em, Lota Kaidoga bilong Losuia long Mine Bay Provins na arapela long Hohola em, Amando Sabati long Okapa Easten Haiens Provins.

Dispela meri i bin dai bihain long ol raskol i paia long gan long pablik taim ol i stil long wanpela stua we ol i kisim K600.

Long wankain taim yet long Sarere moning, ol plis long wanpela kar nating i sutim tupela risef plis husat tu i traim long mekim wanpela hol hap long Morata.

Dispela tupela risef ol i kisim bagarap en, Atren Siva na Gim Giwa bilong Mumeng

distrik long Morobe Provins.

Komanda Huafolo i tok plis bai sasim tupela bihain long ol i pinis long haussik. Long arapela hevi, ol raskol i bin holim wanpela man nem bilong em, Minson Peni long fran long haus bilong em na stilim mani bilong em. Bipo long ol i ronawe long kar bilong em ol i sutim em long namel bilong em (hip).

Long Airways Hotel, wanpela sekuriti gad i bin kisim bagarap long gan long tupela lek bilong em bihain long ol saspek i sutim em long tupela lek bilong em bipo ol i ronawe.

Long Fraide apinun, wanpela papa bilong haus kai bilong Asia i sutim wanpela man Easten haiens long pistol bihain long man ya i tromoi sol long meri bilong em.

Mista Huafolo i tok kastoma ya bin komplem long kaikai long wanem ino bin gutpela tumas na belhat na tromoi sol long meri em. Dispela kain sut long gan mas gat strongpela lo bilong en i kamap.

# Ambunti memba givim K23,000 long Nesenol Fores Sevis

JOE KANEKANE i raitim

MEMBA bilong Ambunti-Drekikir Judah Akesim i givim K23,000 i go long han bilong Nesenol Fores Atoriti long halivim ol wok hariapim ol wok bilong Nungwaia Bongos Timba eria.


Mista Akesim i tok em bilip olsem dispela mani bai halivim NFS long pinisim wanem ol pepa wok i lep i stap olsem bai dispela wok i ken pinis na timba prosek i ken go hariap.

"Mi bilip olsem sapos dispela prosek i kamap bai ol pipel i ken kisim gutpela sevis na halivim i kam long dispela prosek," mista Akesim i tok.

Menesing Dairekta bilong Nesenol Fores Atoriti i tok olsem NFA i luksave olsem i gat wanpela ten foa (14) ol nupela timba prosek i wok long stap yet long wanem i nogat mani long karim aut wok bilong ol FMA.

Mista Nen i tok dispela i planti namba olsem na NFA i bihainim nrapela rot long pulim mani we ol i raitim pasi go long ol memba bilong palamen na askim ol sapos ol inap long sapatim. NFA long surukim dispela wok.

Em i tok dispela mani em bai ol i yusim long wok bilong FMA na kos bilong olgeta samting bai i go long han bilong memba.



• Memba bilong Ambunti-Drekikir Judah Akesim (namba tri long han kais) i givim sek i go long menesing dairekta bilong NFA Thomas Nen. Ol wokman bilong NFA i sanap na lukluk istap. Poto i kam long opis bilong Menesing dairekta bilong NFA.

## Balus no moa karim leta go long Westen provins

WESTEN Provins i nau gat bikpela hevi long ol postal sevis bihain long ol liklik balus ino moa wok long karim leta bilong ol o ol i salim i go aut long provins.

Dispela em bihain long Pos (PNG) i no wok long baim fi bilong balus long karim ol leta.

Memba bilong Not Flai mista Kala Swokin i autim dispela wari bihain long em i luksave olsem ol balus ino moa wok long karim ol leta. Ol balus kampani i wok long rausim olgeta leta bek long wanem Post PNG long wanem ol ino baim ol sevis fi bilong ol.

Em i tok, "mi no save dispela hevi em bikpela olsem wanem long ol arapela hap long Westen provins tasol mi save long Kiunga mipela ino kisim leta long longpela taim pinis."

Ol balus kampani ino laik long tok aut long hamas namba bilong mani Pos (PNG) i gat dinau long ol tasol mista Swokin i bilip olsem samting olsem moa long K1 millien em Pos (PNG) i gat dinau istap.

Em i tok olsem wanem na Pos (PNG) i gat moa mani long lukautim ol senia opisa bilong en na ino gat mani long baim balus long karim ol leta na ol arapela samting bilong Pos Opis igo kam long Westen provins.

Dispela bikpela namba bilong mani ol i usim long lukautim ol senia opisa bilong ol ino mekim wanpela gutpela samting tasol em i olsem stil long san taim. em i tok ful wok painim aut mas go het na ol lain husat i mekim dispela mas go long kot.

Ol bisnis haus long Kiunga husat save mekim bisnis bilong ol long Pos Opis i nau i kisim bikpela taim long ol bisnis bilong ol.

Mista Swokin i tok dispela hevi em go bagarap olgeta na i singaut long gavman long lukluk long dispela. "Ol ministra husat i go pas long Pos (PNG) mas lukluk long dispela hevi hariap na mekim eksen" em i tok.

# Wenge laikim PDM i brukim marit wantaim ol arapela pati

PIPELS Demokretik Muvmen (PDM) memba i askim Praim Minista Sir Mekere Morauta long rausim ol memba husat i wok long pasim toktok wantaim

Oposisen sait long blokim 2000 nesenel baset taim palamen i bung long neks mun.

Memba bilong Nawae Kennedy Wenge i tok Sir

Mekere i no ken larim ol memba bilong narapela pati husat i stap nau wantaim PDM long gavman long mekim toktok long sait long salensim disisen na toktok bilong kabinet.

Mista Wenge i tok sapos Sir Mekere i save long dispela kain hait pasin i wok long kamap, em i mas givim sampela mekimsave long ol dispela memba na pati nau.

Mista Wenge i tok em i save long sampela miting i bin kamap long las wik na tu wanpela we i bin kamap long Kens Australia long las wiken we ol memba long Gavman na Oposisen sait wantaim i bung na toktok long blokim neks yia nesenel baset na tu fosim Praim Minista long risain.

"Sapos Sir Mekere i nogat, bai ol arapela kantri i no laik mekim bisnis wantaim Papua Niugini," em i tok.

Mista Wenge i tok ples klia samting we i kamap long dispela gavman em strong bilong mani i wok long go bek long antap na tu ol pren kantri i wok long givim helpim na sapatot i kam long PNG.

Em i tok helpim na sapatot Australia, Nu Silan, Saina na arapela ovasis kantri i tokaut pinis long givim i soim tru sapatot bilong ol long dispela gavman na lidasip bilong Sir Mekere.


I no olsem bipo, PNG nau i mas gat gutpela sanap long wok politik bilong en long winim sapatot na wanbel bilong ol bisnis lain long ovasis i kam long kirapim wok bisnis na strongim ekonomi bilong kantri, Mista Wenge i tok.

Em i tok dispela samting i stap long han bilong Gavman na lidasip em i gat long kamapim gutpela politik pasin. Na sapos wanpela pati lida o stet ministra i laik daunim na salensim disisen bilong kabinet na gavman, orait Sir Mekere i mas givim mekimsave long ol.

Mista Wenge i tok pilai politik, gridi na hangre long pawa em ol samting we i mekim ol lida i bringim kamap hevi long kantri we nau kantri i stap long en.

Yumi noken toktok moa long ol hevi bilong mani na bisnis we kantri i bungim i kam inap nau olsem na ol lida i mas bungim han wantaim long sevim dispela kantri long ol hevi kantri i stap lokng en tude, Mista Wenge i tok.

Mista Wenge i tok wanpela rot tasol long Sir Mekere i ken kamapim strongpela gavman we i gat bilip na sapatot, Praim Minista i mas rausim ol lida husat i wok long tok hait long sait sait na i laik kamapim hevi long dispela gavman.



• Memba bilong Nawae Kennedy Wenge.

**TOR TOO**

**PORO DRAIN NA TUPELA ISI ISI IGO LONG HAUS...**

**TAPIOKA, TAPIOKA HEI, HEI, HEI! TAPIOKA, TAPIOKA!**

**LONG HAP ROT NA ENSIN BILONG KAR I HOT TRU NA SIMUK I KAMAUT LONG FRAN BILONG KAR...**

**OH SIT! WARA MAS PINIS YAH! (Chic!) TORO PLUS PULUMAPIM LONG WARA - CHIC!**

**LONG LONG TORO I KAM AUT NA PULUMAPIM BIA IGO INSAIT LONG ENSIN...**

**AH! EM INO NIDU WARA! (Chic!) EM DRINGU LIK LIK BIA PAS-TAIM!**

**NAU TUPELA KALAP NA KRUIZ IGO.. INO LONG TAIM NA KAR I RON LONG LAIK BILONG EM..**

**HOON!!! KAR YAH I LONG LONG YAH! AHYOOO!! I LUK OLSEM EM SPAK YAH!! AAEIEEE!!!**

**YU SAVE.. TORO KAPSAITIM BIA LONG ENSIN NA EM SPAK.**

Niugini Ailans ripot wantaim BARBARA MASIKE

# WANTOK

NIUSPEPA BILONG OL PAPUA NIUGINI

### Mani i stap nau long NPF em liklik seving's bilong ol wokman na meri long praivet kampani

RIPOT i kamap pinis olsem bisnis han bilong Nesanel Gavman, Fainens Pasifik, i suvim han na laik kisim Nesanel Providen Fan.

Dispela kain pasin em i bikpela pekato tru long Nesanel Gavman i laik mekim wantaim nogat gutpela toksave. Mani i stap nau long NPF em liklik seving's bilong ol wokman na meri long praivet sekta o kampani.

Ol mani ya em strong bilong ol taim ol i pinis wok, na siaman bilong NPF Jimmy Maladina na Pasifik Fainens kampani i mas tokaut long wanem as kain pasin long tekova i laik kamap.

Mista Maladina i mas tokaut stret sapos ripot i gat kaikai o nogat. Mipela i les long NPF i mekim wankain pasin i bin kamap long Waigani Land dil.

Siaman i ken tok em i liklik samting. Tasol ol liklik manmeri i ting kain pasin Fainens Pasifik i mekim em i bikpela samting tru.

Arapela samting tu wok politiks nau i wok long bagarapim tru ol gutpela bisnis insait long kantri. NPF em i no bilong gavman, na maski long siaman na ol bot memba bilong NPF i haitim ol toktok.

Praim minista Sir Mekere i tok aut astae olsem dispela ol samting i kamap long nius i no tru long wanem dispela hevi i namel long benk na Pasifik Fainens kampani.

Sir Mekere i tok aut olsem NPF i gat dinau mak bilong K60 milien na long dispela as ol i traim long glasim sampela pepa long luksave sapos NPF i gat gutpela sans bilong bekim dispela mani.

Em i tok dispela toktok olsem tek ova i no tru long wanem dispela liklik hevi i stap namel long benk na NPF na tupela i stretim pinis.

# Redio Is Nu Briten i gat nupela stesin

## ...tenk yu long gavman bilong Japan

REDIO IS Nu Briten i gat nupela stesin na bikpela tenk yu i ken go long gavman bilong Japan husat i givim moni i nap long K20 milien long sanapim bek stesin we i bin kisim bagarap long 1994 taim volkeno i pairap.

Na opening seremoni bilong nupela stesin i bin kamap long las Fraide Oktoaba 22.

Ambasada bilong Papua Niugini i kam long Japan Tatsuo Tanaka i tokaut long amamas bilong gavman bilong em long dispela helpim.

Em i tok gavman bilong em bai amamas yet long sapos helpim bilong kantri bilong em bai stap yet long kirapim tru Is Nu Briten i go bek gen long taim pastaim long volkeno pairap na bagarapim ples.

Gavana bilong Is Nu Briten provins Francis Koimanrea i tok dispela em i wanpela bikpela samting tru ino bilong Nesanel Brotkasting Komisen tasol, tasol bilong olgeta pipel bilong provins.

Mista Koimanrea i tok amamas tru long gavman bilong Japan long helpim ol i givim na em i tok gavman bilong em tu bai lukluk yet long kirapim gem ol sevis i bin lus long taim bilong volkeno i pairap.

Memba bilong Kokopo Rabbie Namaliu i askim ol wokman bilong stesin na menesmen long lukautim gut tru ol mesin i stap insait long dispela bilding.

Mista Namaliu i tok tu olsem redio em i wanpela strongpela we tru long givim inpomesen i go long ol pipel long sait bilong helfi, edukesen, agrikalisa na ol

narapela samting.

Dispela nupela redio stesin i stap long Kokopo. Ol konstraksen samting bilong mekim dispela stesin i bin kam long Australia, New Zealand na ol narapela kantri i stap klostu. Ol lokel kontrakta tu i bin helpim long kirapim dispela stesin.

Minista bilong Komyinikesens Peter Waieng i tok amamas long gavman bilong Japan long helpim bilong em.

Em i tok redio em i wanpela bikpela rot tru long givim inpomesen igo aut long ol pipel. Em i singaut to long gavman long givim gutpela sapos long karim aut ol wok meintenans na helpim i go long olgeta redio stesin.

## Sensas wok kamap gut long Niugini Ailans

OL WOK bilong 2000 sensas i wok long kamap gut tasol long Is na Wes Nu Briten provins.

Ol toktok i kam long tupela provins i tok olsem nogat wanpela bikpela hevi i kamap.

Long Is Nu Briten, AusAID i helpim long putim wanpela telepon na feks masin long opis bilong sensas. AusAID tu bai givim moni long helpim long sait bilong trenspot long wok bilong 2000 sensas insait long provins. Samting olsem K5000 long wanwan mun bai karamapim haia bilong ol PTB ka we ol bai yusim long wok bilong 2000 sensas.


Provinsal kodineta

bilong 2000 sensas insait long provins Marakan Uvano i tok olgeta wok bilong stretim ol sensas rejista na ol map i stret pinis. Dispela wok em ol lokel level kodineta yet i mekim. Wok nau i stap yet em long stretim ol lis bilong ol rurel hap insait long provins.

Long Wes Nu Briten olgeta sensas yunit na ol map i stret pinis. I gat wanpela opis spes i stap pinis tasol provinsal komiti i laik painim wanpela bikpela spes pastaim long 2000 sensas i stat long Julai neks yia.

Provinsal kodineta insait long provins Brown Leo i tok

olsem long sait bilong pablisiti, komiti i wok long printim ol "T" set na salim bai ol pipel i save olsem 2000 sensas i kamap klostu nau. Mista Leo i tok wanpela asua tasol i stap yet em long Redio stesin insait long provins i no wok, tasol dispela bai orait bihain long dispela mun. Ol lain long redio stesin i tok wanpela pat tasol i bin bagarap tasol em i kamap pinis na stesin bai wok gen klostu taim.



• Memba bilong Kokopo Rabbie Namaliu.

## Otonomi na reperendum stap long agenda bilong ol Bogenvil lida

Otonomi na reperendum i stap olsem wanpela agenda aitem insait long miting bilong ol Bogenvil lida husat bai statim bung bilong ol long Nissan hai skul tude.

Dispela miting i bin mas kamap long Oktoaba 23 tasol ol narapela komitimen i stap na tu ol sumatin bilong Nissan hai skul i sindaun long eksam na det bilong miting i surik i kam tude.

Ol lain i go pas long oganaisim dispela miting i tok planti lain i go long miting i lusim pinis Buka long MV Sankamap long aste nait. Ol foapela MP na ol narapela lain i stap long Pot Mosbi bai mekim wokabaut bilong ol tude.

Olgeta lida bilong Bogenvil pipels kongres, Leitana kaunsel ov eldas na ol Bogenvil MP bai kamap long dispela bung. Ol biknem lain olsem Simon Kenehe, Leo Hanette, Paul Nerau na Michael Powa bai kamap long dispela miting.

Narapela bikpela samting bai kamap long dispela miting em long taimtebol bilong ol toktok bai kamap long stretim dispela hevi long Bogenvil.

Olgeta foapela MP, wantaim siaman bilong Leitana kaunsel ov eldas na wanpela mausman bilong ol Mekamui Sifs asembly bai stap tu na givim toktok bilong ol long dispela miting.

Miting ya bai kamap long tupela de, Tude (Tunde) na tumora (Trinde) tasol ol man i go pas long stretim i tok em i ken pinis long Fraide tu sapos ol toktok i longpela tumas.

Long narapela nius i kam long Bogenvil, wanpela grup ol i kolim long "Peoples Fraternity for Justice and Peace Inc" i tokaut olsem ol i egen-sim toktok bilong presiden bilong Bogenvil Pipels Kongres Joseph Kabui husat i bin tok olsem ol pipel i no nap long putim daun ol ams o stapim pait inap long taim reperendum i kamap long ailan. Mista Kabui i bin mekim dispela toktok long Oktoaba 14.

Man i go pas long dispela grup ya em long Albert Noro. Mista Noro i tok grup bilong em i no amamas long ol dispela toktok bilong presiden Kabui. Mista Noro i tok ol dispela toktok bilong Mista Kabui i no stret bikos pasin bilong pait i no gutpela na i bagarapim tumas ol pipel na ples na bringim planti hevi long ol pipel.

Mista Noro i tokaut strong tru olsem pasin bilong pait i no gutpela, na dispela i kamap long planti hap bilong wol tu we ol man i pait na sindaun i no stret.

Dispela grup i no sapatim ol toktok em presiden Kabui i mekim tasol ol i sapatim tru ol wok i wok long kamap long bringim bek ol sevis long ailan.

# WANTOK

NIUSPEPA BILONG OL PNG STRET

P. O. Box 1982, Boroko  
Telepon namba: 325 2500  
Feks namba: 325 2579


## PE BILONG WANPELA VIA 52 NIUSPEPA

PLES	AIR
PNG	K 60.00
Ostrelia na Nu Silan	US\$46.00
Esia Pasifik na Japan	US\$55.00
Amerika na Yurop	US\$95.00




Momase ripot

# Ol Momase gavena kamapim developmen tingting



• Gavana bilong Morobe Wenge.



• Gavana bilong Luther Madang Jim Kas.



• Gavana bilong Is Sepik Arthur Somare.



• Gavana bilong Sandaun John Tekwie.

**WENCESLAUS MAGUN i raitim**

OL Momase gavena i kamapim sampela tingting bilong developim provins bilong ol long yia 2000 na i go moa insait long namba tu kibung bilong ol long Vanimo insait long Sandaun Provins.

Ol i pasim tok olsem Momase rijen i ken kamap wanpela bikpela ekonomik developmen eria sapos i gat ol gutpela rot bilong kamapim rot bilong mekim mani bilong ol pipel bilong en na bilong kantri olgeta.

Ol gavena i luksave olsem Vanimo em i wanpela gutpela ples bilong promotim pasin bilong mekim bisnis wantaim ol arapela kantri aninit long "Lukluk i go long Not Polisi".

Olsem na ol pasim tok long wok hat long promotim infrastraksa na ol polisi we bai mekim dispela ol tingting bilong ol i karim kaikai.

Ol gavena i pasim tok long sapatim toktok bilong Nesenel Developmen na Rikonstraksen sapos dispela ol tingting i strongim ol developmen plen na ol namba wan tingting bilong ol provins na rijen.

Ol i luksave olsem rot i mas joinim olgeta provins long Momase bai pasin bilong mekim bisnis i ken kamap strong na go het gut. Olsem na ol i pasim tok olsem i mas gat wanpela provisen bilong kamapim rijinel rot o rot bilong ol tren na ka insait long rijen.

Ol gavena i luksave tu long ripot bilong helt, edukesen na ol

arapela sosel sevis insait long rijen we i soim olsem Momase rijen i gat bikpela hevi tru i moa aninit long planti ol provins insait long kantri. Olsem na ol i pasim tok long stretim dispela na mekim i kamap gutpela tru insait long narapela faiv yia taim.

Ol i luksave olsem namba bilong ol pipel insait long Momase rijen i olsem 1.5 milion na askim Nesenel Gavman long luksave long dispela na helpim rijen wantaim ol wari bilong ol.

Gavana Luther Wenge bilong Morobe, Gavana John Tekewe bilong Sandaun, Gavana Jim Kas bilong Madang na man i makim Gavana bilong Is Sepik Arthur Somare i sainim tok orait olsem ol i wanbel long dispela olgeta tingting i kamap long kibung bilong ol.

## Ol Barapu pipel i no amamas long pasin bilong skelim samting

**BENSTEAD TARU i raitim**

OL pipel bilong ples Barapu long Aitape Wes Sepik provins i no amamas long ol wok progrem bilong stretim sindaun na kirapim ples bilong ol bihain long bikpela bagarap bilong solwara i bin bagarapim ol las yia.

Ol pipel i raitim strongpela pas i go long siaman bilong Aitape Daiosis Rihabilitesen Komiti Tas Maketu olsem ol i no ting gavman na ol sevis ogenaisesen i stretim hariap ol wok bilong karimaut hariap ol wok helpim na dispela i daunim ol kain sevis na wok ol pipel i gat laik long kisim.

Insait long dispela pas tu ol mausman i tromoi strongpela tok i go long komiti bilong Mista Maketu olsem wok bilong restore-

sen na rihabilitesen insait long ol ples i bin kisim bagarap long solwara em komiti i wok long pundaun tru abrusim mak ol bagarap lain i gat tingting long en.

Pas bilong ol i tok long dispela as, ol i no kisim gutpela sevis i kam long dispela komiti na tu wok bilong dispela komiti i no moa sanap stret na sut stret long wok bilong stretim sindaun na kirapim ol ples i kisim bagarap.

Pas bilong ol Barapu pipel i tok tu olsem ol i luksave olsem komiti i no skelim gut mani inapim olgeta ples we sampela ples i kisim moa helpim na sapat na arapela i kisim i kam daun.

Ol i tok luksave bilong ol i klia olsem dispela komiti i gat sampela krangki tingting long ol mausman bilong ol. Olsem na skelim bilong ol helpim na sevis i

no gutpela tumas na dispela i hevi long komynuniti bilong ol.

Ol i gat tu olsem i gat ol sampela lain i laik helpim ol. Tasol pasin nau dispela komiti i mekim bai daunim dispela helpim we i laik kam long ol.

Tasol maski long ol dispela tok-tok pait, Aitape Daiosis Rihabilitesen Komiti na ol arapela helpim grup na ogenaisesen i wok long go het yet long bringim sevis wantaim helpim i go long ol bagarap lain long Aitape.

Ripot i kamap olsem i gat hevi i kamap long ples Waurain taim Aitape Daiosis Rihabilitesen Komiti laik surikim sampela helpim samting long helikopta i go long Olbrum long las wik.

Ol i no amamas long wok bilong Aitape Daiosis Rihabilitesen Komiti na brukim wanpela ka bilong ol.



• Hetmistres Paula Maru wantaim tupela tisa bilong nupela Baro Praimeri skul long Sandaun Provins i redi long tis olsem ol namba wan tisa bilong dispela nupela skul. Foto: Ari Haba

## Wok bilong Aitape restoren i go het

**PAUL GLAUT i raitim**

LONG Sande 24 Oktoba wanpela bikpela helikopta bilong Pasifik Helikopta kampani ol i kolim long Kavofi i kamap long Aitape long karim ol biling meteriel i go long Barupu na Olbrum.

Dispela operesen i bihainim tingting ol Rihabilitesen Komiti i gat long winim dispela taim nogut bilong ren long rausim olgeta biling meteriel i go stap long ples bilong wok.

Dispela Kavof helikopta em i bikpela tru na inap long karim klostu long 4.8 tan. Em i bin kamap long las wik Sande na bai wok i go inap long Sande 30 Oktoba.

Kavof helikopta em i bilong ol Rasia. Em i save stat wok long siks kilok moning na pinis long siks kilok long abinun.



Sapos planti samting i stap yet bai dispela helikopta i stap yet sampela moa dei. Taim bilong ren i kamap pinis na dispela bai bagarapim tru ol rot i go insait long ol nupela ples we ol wok bilong rihabilitesen na restoren i stap long en.

Dispela tingting ol rihabilitesen i gat long em i gutpela tru olsem sapos ren i pundaun na rot i bagarap, nogat wanpela ka inap long go insait wantaim ol biling meteriel. Dispela bai mekim olgeta wok i go isi tru. Planti bilong ol dispela rot long ol nupela ples i nogat karanas na graun i malmalu.

Planti ol biling meteriel Kavof helikopta i wok long karim em long plang, kapa, semen na ol narapela bikpela samting bilong sanapim ol haus na klasrum. Dispela helikopta i gat 5-pela kru i wok insait long em.

Taim olgeta biling meteriel i kamap long ol ples bilong wok na ren i kamap na bagarapim rot ol wok man bai stap tasol long hap bilong wok na bai nogat wari long wetim ol biling meteriel.

Rot i bin givim bikpela hevi tru long wok bilong rihabilitesen na restoren long ol hap ples Rihabilitesen Komiti i mekim wok. Kain kain hevi i kam tasol ol sanap long wanem tingting ol gat na mekim ol dispela wok na ol wok i kamap klostu nau long pinis bilong em.



HEPI BIRTHDAY

25% MORE

5 BISKETS INSIDE-1 FREE

## Man i laik senisim diwai kros bilong em

WANPELA man i kros oltaim long God bikos laip bilong em i pulap long olkain sik na wari na pen na trabel. Em i komplem oltaim long ol dispela liklik diwai kros bilong em i hevi tumas, na bilong ol arapela man/meri i no hevi.

God i les long ol komplem bilong dispela man na i tokim em olsem, "Orait, yu kism diwai kros bilong yu i kam. Yumitupela i go long faktori we ol i save wokim olkain diwai kros. Yu keh lukluk nabaut insait long faktori na sapos yu painim wanpela i pas gut long yu, orait, yu ken senisim wantaim dispela yu wok long karim nau."

Man ya i harim dispela gutpela nius na em i amamas tru. Nau em i ken painim wanpela diwai kros i isi long karim.

Orait, tupela i kamap long faktori na i go insait. Nau God i tokim dispela man olsem, "Yu go lukluk nabaut tasol. Na sapos yu painim wanpela i pas mobeta long yu, orait, yu senisim tasol wantaim dispela yu karim nau."

Nau man i tekewe diwai kros long solda bilong em na i sanapim klostu long dua. Nau em i stat long raun long faktori na traim ol diwai kros.


Em i litimapim wanpela, na i no

gat hevi bilong en olgeta. Em i putim bek.

Nau em i kism narapela. Dispela i luk nais tasol em i kwila na i hevi tumas. Kwiktaim em i putim bek. Narapela gen i longpela tumas na i paitim graun. Narapela i sotpela na i paitim lek bilong man long taim em i wokabaut.

Man i traim traim tasol olgeta wan wan diwai kros i gat sampela liklik asua long en. Klostu man i laik givap, tasol las tru em i painim wanpela diwai kros i lep na i slip long banis klostu long dua. Em i litimapim, i wokabaut wantaim em, na em i laikim em tru.

### TU MINIT TINGTING



FRANK MIHALJIC i raitim

Em i laki tru. Dispela wanpela tasol i pas stret long em.

Em i tenkyu long God na tupela i wokabaut i go ausait long faktori. Nau God i tanim long dispela man na i tokim em olsem, "Pren, mi amamas long lukim yu painim pinis wanpela diwai kros i pas stret long yu. Tasol ating yu lus tingting liklik. Dispela diwai kros yu painim klostu long dua ya, em i dispela yu yet i bin bringim i kam insait."

Man ya i kalap nogut. Nau em i lap. Em i kism save pinis. Dispela diwai kros God yet i bin givim em, em i winim olgeta arapela. Em i lo bilong God: em i no save givim yumi wanpela hevi yumi no inap long karim. Em i no laik yumi lus; em i laik yumi mas win.

## Bisop Taval laik helim ol famili na yut

WANPELA bikpela wok nupela bisop bilong Rabaul Asdaiosis, Bisop Patric Taval i gat laik long mekim em bilong helpim ol wan wan kristen famili na ol yut bilong tude.

Bisop Taval i tok long kamapim wanpela gutpela famili, ples, sosaiti o kantri pastaim i mas gat ol gutpela kristen famili na ol gutpela kristen yut. Sapos dispela i nogat famili, ples, sosaiti na kantri bai bagarap.

Em i laik helpim ol famili na yut long laip bilong ol bai dispela pasin i ken helpim na strongim laip bilong bodi na sol bilong ol. Long wankain taim em i laik helpim ol famili na ol yut long luksave long wanem samting i gutpela na wanem samting i nogut long tingting, toktok, na pasin bai ol i ken kamap ol gutpela manmeri na pikinini.

Bisop Taval i tok long lukim dispela tingting bilong em i karim kaikai, em bai yusim ol pastorel progrem bilong ol mama na ol yut we i stap pinis insait long Rabaul Asdaiosis.

Em i tok ol famili na ol yut i mas glasim kristen laip bilong ol long dispela taim na wok hat long strongim bilip na gutpela pasin i go inap long yia 2000 na i go moa yet.


Em i askim olgeta famili long beten moa yet na mekim penens bai God i ken marimari long ol na helpim ol.

Bisop Taval i bin kism odinesen bilong kamap pater long 1984 olsem wanpela pater bilong Misinari bilong Sakred Hat kongrigesen insait long Katolik Sios. Long Oktoba 2, long dispela yia ol bisop i odenim na em i kamap Bisop bilong Rabaul Asdaiosis.

Em i kam long liklik ples Taranga long Not Kos Rabaul na i kam long Vunavavar peris. Papamama bilong em i dai pinis tasol em i gat 5-pela brata na tripela susa.

Wantok i bin bungim Bisop long Mosbi taim em i redi long go long Rom long bungim Papa Santu Pop Jon Pol II na ol arapela hetman bilong Katolik Sios.

# Asbisop Hesse go stretim ripot bilong Oceania Sinod



• Asbisop Karl Hesse wantaim Bisop Patrick Taval i redi long go long Rome. Foto: Issac Ikuavi.

### WENCESLAUS MAGUN i raitim

ASBISOP Karl Hesse bilong Rabaul Asdaiosis i go long Rome long dispela wik bilong redim ol toktok insait long Oceania Bisop Sinod na givim i go long Pop Jon Pol II bai em i ken tokaut long wanem ol tingting em i lukim insait long dispela sinod.

Asbisop Hesse wantaim tupela bisop bilong Australia, wanpela bisop bilong Solomon Ailan, wanpela bisop bilong Niuzilan, wanpela bisop bilong Nauru, wanpela bisop bilong Ameriken Samoa na wanpela bisop bilong Tonga bai glasim ol toktok insait long Oceania Bisop Sinod na givim long Pop.

Ol dispela bisop bai holim tripela de miting long Rome aninit long lukaut bilong Jenerel Seketeri bilong ol Bisop Sinod, Kadinel Schotte Jan Pieter (CICM).

Em i tok dispela em i namba tri kibung bilong ol na em i bilip em bai las kibung bilong ol bisop bipo long ol i givim ripot bilong ol i go long Pop Jon Pol II.

Asbisop Hesse i tok Pop Jon Pol II bai autim tingting bilong em long dispela Oceania Bisop Sinod long wanpela kantri long yia 2001. Em bai tokaut long wanem tingting bilong em long Oceania Bisop Sinod.

Namba tu astingting bilong dispela raun bilong Asbisop Hesse em bilong soim Bisop Taval long ol bikman bilong Katolik Sios long Rom, Germany na lukim ol komyuniti bilong ol Misinari bilong Sacred Heart kongrigesen, na bungim Asbisop bilong asples bilong Asbisop Hesse long Paperborn.

Asbisop bilong Paperborn em Joanes Joachim Degenhardt. Asbisop Degenhardt na ol Katolik bilong Asdaiosis bilong em i save givim planti helpim long Rabaul Asdaiosis. Moa yet Asbisop Degenhardt bai givim wanpela vesmen na wanpela ring bilong ol bisop long Bisop Taval. Em i bin givim pinis kruse bilong ol bisop long Bisop Taval long de ol i odenim em bisop.

Bihain long dispela lukluk raun na ol wok, Asbisop Hesse na Bisop Taval bai kam bek long PNG.

## Kantri bungim hevi long Yunivesiti i pas, Deschamps i tok

I LUK olsem Papua Niugini i lusim saplai bilong wanpela yia ol sumatin bilong yunivesiti, Siaman bilong Edukesen Komisen bilong Katolik Bisop Konferens bilong Papua Niugini na Solomon Ailan i tok.

Bisop Deschamps i tok sapos dispela tok i tru, dispela i kamapim bikpela hevi long kantri. Em i tok kantri i noken westim wanpela yia bilong skul bilong ol sumatin long yunivesiti level.

Bisop Deschamps i tok pastaim kantri i lukim olsem i gat liklik namba bilong ol pipel tasol i

bagarapim hop bilong planti ol sumatin. Em i tok ol klasrum i no bin save gat ol sumatin bikos ol sumatin husat i gat laik long go long klas i save pret long ol sumatin husat i stopim ol sumatin bilong go long klas.

"We stap rait bilong ol sumatin? Ating ol papamama i mas kra. Yumi olgeta i mas kra long lukim ol bikhet lain i stiim rait bilong ol sumatin," Bisop Deschamps i tok.

Em i tok i luk olsem i nogat we aut namel long ol sumatin, yunivesiti na gavman long stretim tok tok bilong hapim skul fi.

"We stap save bilong toktok na kamap wantaim wanpela tingting bilong stretim dispela hevi," em i askim.

Bisop Deschamps i tok sapos ol sumatin i mas baim skul fi we i go antap, ol lain i kamapim dispela tok i mas save tu olsem i gat ol pipel husat i no inap painim kain mani.

"Tru tumas yumi mas wan bel long sampela rot bilong painim aut strong na save bilong wan wan sumatin na famili bilong ol bilong bungim dispela tingting bilong baim skul fi," em i tok.


Bisop Deschamps i tok pasin bilong pasim ai na aplaim skul fi long olgeta sumatin i givim baksait long bikpela wok bilong kamapim kantri. Em i tok ol lain i nogat mani i mas gat sans tu bilong stap insait long ol bikpela skul na wok bilong mekim mani, sapos ol i gat laik na i gat save bilong mekim dispela.

"I gat bikpela sori, bihain long 24 yia, long lukim ol lain husat i kism planti helpim long fri edukesen long ol yunivesiti, i mekim hat long sait bilong mani long ol lain i kam bihain long kism save," Bisop Deschamps i tok.

Em i tok i gat bikpela sori long lukim olsem ol sumatin na sosaiti, i no inap kism save bikos sampela liklik lain i no inap paitim toktok. Na taim kantri i no inap glasim ol hevi bilong mani ol pipel i bungim, kantri i givim baksait long ol turangu lain.

Bisop Deschamps i laik save wanem samting bai kamap long narapela yia.

"Hevi i no stret bikos yunivesiti i pas. Em i taim bilong soim gutpela pasin bilong wok olsem lida husat i gat gutpela tingting," em i tok.



# Hailans Nius



• Praim Minista Sir Mekere Morauta.

## Gavman bai kism K22m

NESENEL Gavman i sainim pinis wampela pepa wantem ol lain bilong Esen Developmen Benk long kism K22 milian long bringim ol sevis igo long Morobe na Isten Hailens.

Praim Minista Sir Mekere Morauta i bin tok aut long dispela last wiken taim em i bin opim Morobe So.

Dispela projekt bai helpim ol lik lik gras ruts famas long kamapim ol wok bilong ol we bai ol i ken kism mani long ol samting bilong gaden.

Sir Mekere is tok tu olsem gavman is wok tok tok wantem ol lain bilong Yuropian Yunian long kism K2 milian long kamapim wampela maket projekt we bai halivim ol man long ples salim ol kai kai bilong gaden long ol tauna ol siti.

Em i tok olsem dispela maket projekt bai sapatim ol lik lik maket long Pot Mosbi na ol maket long ol narapela taun. Planti nupela maket bai kamap long Pot Mosbi na olupela maket bai ol i ap gredim. Kundiawa

maket tu bai ol i ap gredim.

I gat ol plen tu long kamapim ol depo long Lae, Mt Hagen, Mosbi, Goroka na Kundiawa long sapatim long lik lik growas long ol ples.

Sir Mekere is tok olsem long taim bilong Nesenel Developmen bung na long Nesenel tok tok bilong Rikonstraksen na Developmen i bin gat planti tok tok i bin kamap long gavman i mas helpim tu egrikulsa o ol didman wok long kantri.

## Western Hailans kism helt ka long ADB

### PIOUS MON i raitim

NAMBA tu Westen Hailens semet (kibung) i lukim helt dipatmen bilong i kism nupela ka i kam long Asian Developmen Benk (ADB).

Dispela semet we i stat aste (Tunde) i lukim 7-pela nupela toyota len crusier ol ADB i givim i go long ol helt senta na hausik long Hagen. Dispela donasen bilong ka i lukim namba bilong ol ka ADB i givim igo long kantri em olsem 82 olgeta.

Ol arapela provins we i kism ol helt ka tu em, Enga (7), Easten Hailens (6),

Eas Sepik (6), Sentrol (4), Niu Ailan (3), Wes Niu Briten (3), Westen (2), Milne Bay

(2), Manus (2) na Gulf (1).


Ol helt ka Westen Hailens i kism ol givim long olgeta helt senta bilong ol long provins olsem, Hagen jenerol haussik, Minj helt senta, Tinsley, Kotna, Togoba, Nondugi na kol helt senta.

Dispela ol ka em ol i mekim long wokim ol rurel wok olsem, helt kontrol long ples, kempen long sut, lukluk long ol helt senta/aid pos na karim ol marasin na ol sikman.

Dispela spesol helt ka tu bai wok olsem ambalens na helt ektensen ka long mekim helt kontrol wok long kantri.

Ol namba bilong ka ol i givim long wanwan hap long kantri em long namba bilong ol pipel husat i stap long dispela hap ples we rot i go na isi long helt wok man gen mekim wok.

Maus man bilong ADB mista John Izard i tok ol dispela helt ka em ol bai mekim wok i go long ol rurel helt senta na haussik long olgeta hap long kantri. Em i tok dispela ol ka ol baim i kam ananit



• Gavana bilong isten hailens Peti Lafanama.

long Helt sekta developmen program (HSDP) we fandin i kam long ADB.

Mista Izard i tok olsem HSDP em helpim program na lon kam long gavman bilong Papua Niugini wantaim ADB i kamapim long hapim fanding levul long helt long mekim kamap Nesenel helt plen 1996-2000.

Em i tok nesenel helt plen i kamapim polisi na ol plen long kamapim gut ol helt sevis insait long kantri.

Mista Izard i tok em i bilip olsem wantaim dispela nupela ol ka, bai i gat ol gutpela improven long helt sevis. Em i tok long wankain taim yet dipatmen

bilong helt tu i tingting long givim 33 helt bot igo long Ailan na nambis ples.

Em i tok dispela tingting bilong ol long mekim dispela bai lukim gutpela sevis long helt i kamap long kantri.

Em i tok tenkyu tu i go long Ela motors long givim strongpela ka na helpim ol long karim i go long ol ples i stap long bik bus.

Dispela de wan bung i lukim toktok long wanem samting nesenel diptman, developmen agensi, Non gavman oganaisas-en long bung long yia 2000.

Gavana bilong isten hailens Peti Lafanama i bin opim dispela samet o bung long tunde.

## Maritim moa long wampela meri - poligemi i gat hevi

Dispela tok bilong wampela man tasol i maritim moa long wampela meri i gat hevi long Papua Niugini. Osem nau yet gavman i wok long painim rot bilong wokim Lo bilong bosim o pasim dispela pasin.

Yes, yumi ken tok olsem dispela pasin bilong poligemi em i pasin tumbuna bilong yumi olsem na yumi ken bihainim na i stap.

Tasol sapos yumi skelim dispela gut bai yumi luksave olsem poligemi em i wampela bikipela as bilong kankain sosel na famili hevi. Sampela taim ol meri ol yet i pait na kilim ol meri i dai na kros pait i stap namel long ol dispela meri husait i maritim wampela man.

Ol tumbuna i gat as bilong bihainim pasin poligemi; Laip na sindaun bilong ol tumbuna i narakain na ol man i maritim moa meri long wok gaden na lukautim ol pik na kamapim moa pikinini bilong banisim ol yet long ol birua bilong ol. Ol i soim ol yet olsem bikman na moni man tu.

Tasol nau insait long dispela taim yumi gat hevi. Moni na kago samting i mekim na planti man i laik bihainim pasin bilong poligemi na sem taim ol i bungim hevi i kam long famili bilong ol na long komyniti ol i stap long en.

Bilong wokim lo bilong poligemi yumi no save bai dispela lo i stap strong na bosim yumi gut o nogat. Yumi mas toktok moa long poligemi na kism tingting gut long ol meri pastaim bihain orait wokim lo bilong en.

Yumi nogat wankain tingting na pasin i stap olsem na bilong wokim lo bilong poligemi em bai i no isi oltaim. Bikos yumi nogat wankain




pasin taim wampela man i maritim namba tu meri o namba tri meri dispela i stat long bungim hevi kam long ol famili long namba wan meri olsem tok piksa.

Na ol lain pikinini bilong namba wan meir i lusim papa bilong ol i go long ples bilong ol olgeta na man i laik ol pikinini bilong em bilong namba wan meri tasol, nogat ol i lusim em pinis na ol pikinini i nogat papa long lukautim ol. Ating bihain namba tu a namba tri meri tu i mekim wankain pasin. Ol i go long kot nau na kot tu i nogat lo i banisim dispela kain famili olsem na i hevi. Long dispela as sampela lo i mas i stap bilong helpim ol dispela turangu.

Sampela man tu ol ting ol i moa yet na grisim ol yangpela meri na raun gut wantaim ol na taim ol i karim pikinini, man i ronowe long lusim meri na pikinini ya na tupela nogat papa long lukautim na bosim ol. Em i hevi long sosaiti bilong yumi PNG nau.

Olsem na tingting bilong wokim lo bilong poligemi na ol ronowe man i mas kamap na gavman bilong kantri i mas lukim olsem em i duti na wok em mas mekim na bosim ol pipel bilong en na kamapim gutpela sosaiti we pipel bilong dispela kantri mas i stap gut na amamas.

# Madang Nius



## Melanesien Faundesen helpim ol meri Sepik

MELANESIEN Faundesen wanpela non gavman ogenaisesen we bisnis man na Siaman bilong faundesen Peter Barter i kamapim, i givim K1000 i go long wanpela bos meri bilong Angoram Distrik Kaunsel bilong ol meri, Juli Gawi.

Ol meri bilong Angoram Distrik Kaunsel bilong ol meri i bin askim meri bilong Mista Barter, Jan Barter long helpim ol.

Mista Barter i tok em i gutpela long lukim ol meri i go pas long ol developmen bilong ol risos na trening Senta insait long Angoram.

"Kain ol wok olsem i mas kisim sapot bilong ol pipel. Olsem na Faundesen i amamas long givim K1000 i go long wok bilong ol Angoram Distrik meri," Mista Barter i tok.

Em i tok Melanesien Faundesen fan i stap bilong helpim ol pipel long ples, wantaim ol samting bilong skul na helt servis tasol dispela i no stopim ol long helpim wanem ol arapela komyuniti ogenaisesen we i go pas long helpim ol pipel.

Mista Barter i tok mani Melanesien Faundesen i save kisim i kam long wan turis husat i ron long "Melanesian Discoverer", turis sip bilong em.

## Wama salensim NCDC long baim 50t plastik

MEMBA bilong Madang Jacob Wama i salensim Nesanel Kapitel Distrik Komisen long baim ol pipia plastik long 50t na i no 20t.

Mista Wama i mekim dispela singaut bihain long NCDC i promotim tingting bilong baim ol pipia plastik long 20t.

Em i tok sapos Madang taun inap long baim ol plastik pipia long 50t em i no lukim wanpela as watpo NCDC i no inap hapim prais mani bilong ol i go antap long dispela mak o antap moa.

Mista Wama i tok NCDC i gat planti ol bisnis haus na olsem em i mas makim gutpela prais bilong baim ol pipia plastik.

"20t em wanem samting sapos yu tingim taim na hat wok ol manmeri na pikinini i putim i go insait long bungim ol pipia plastik bilong klinim taun na ples bilong ol," em i tok.

Mista Wama i salensim Edministreta bilong NCDC Jammie Graham, ol komisi-na bilong em na ol bisnis haus long draiv raun long siti na lukim long ai bilong ol sapos pasin na tingting ol i promotim i helpim long klinim Mosbi siti.

Em i tok bikos prais bilong baim plastik em i daun tumas planti manmeri i no bungim ol plastik na bringim i go long ol stua bilong kisim mani. Olsem na ples i pulap yet long pipia bilong plastik.

## Bisop Boneventoi blesim Baro skul

### ARI HABA i raitim

BISOP bilong Vanimo, Bisop Cesare Bonevento i blesim na opim nupela skul na haus tisa bilong Baro Praimeri skul long Sande 10 Oktoba.

Moa long 2,500 manmeri na ol pikinini long

Baro i bin kamap long amamasim dispela bikpela de.

Siaman bilong Baro Praimeri Skul Gerard Gubon i tok, dispela skul nau i gat bikpela spes long kisim moa ol gred 7 sumatin long narapela yia na i go.

Em i tok Baro Praimeri Skul em wanpela laki

skul insait long Sandaun Provins long kamap TopUp praimer skul aninit long nupela edukesen rifom sistem. Masta Gubon i tokim ol papamama olsem edukesen rifom em wanpela gutpela sistem Nesanel Gavman i kamapim insait long kantri wea olgeta papa-

mama i mas hamamas long en.

Em i tok aninit long nupela edukesen rifom sistem bai i nogat drop aut long gred 6 o gred 10. Olgeta pikinini bai skul i go.

Tasol em tok long mekim dispela sistem i wok, ol papamama i mas putim moa wok long

kamapim gut pikinini bilong ol. Em i tok ol ol papamama bai mekim bikpela wok moa long baim skul fi, lukautim skul na helpim na sapotim pikinini long go long skul olgeta de.

Mista Gubon i tok, em bai wok moa yet i go inap yia 2000 na bai enrolim gred 9 na 10 long yia 2002.



• Ol namba tu yia nius sumatin bilong Divine Word University long Madang i go stap long sampela de long Aidibal ples long lukim Klingsor Piksa Kampani bilong Germany i mekim piksa.

## Klinim ples bai ol turis i kam lukim, Labot i tok

### JASON TAU i raitim

OL pipel bilong Madang i kisim wanpela strongpela tok salens long lukautim ples bilong ol na mekim ples i luk nais bai ol turis na ol ausait lain i amamas long go lukim ples bilong ol.

Kukurai bilong Aidibal Steven Labot i tokaut long dispela taim wanpela Piksa kampani bilong Germany, Klingsor Piksa Kampani i go mekim piksa long ples bilong em.

Dispela kampani i mekim tupela hap piksa ol i kolim 'The

Bird of Paradise' o wanpela stori bilong pisin kumul.

Em i tok ol lida long ples i mas tokim ol pipel bilong ol long wokim haus long lain, planim ol flawa, na klinim ples bai ples i luk nais.

Em i tok pastaim em i no bin save long mekim piksa tasol dispela tingting i kirap taim olpela rijinel memba bilong Madang, Peter Barter na Foapela German man i go lukim em na paitim tok-tok long mekim piksa long ples bilong em.

Em i tok em i wanbel long dispela tingting na i sainim wanpela

tok orait olsem samting olsem 400 pipel bilong wan wan klen (10-pela klen) insait long ples bilong em i ken ekt insait long dispela piksa.

Moa yet em i tok ol pipel bilong ples bilong em i laik lukim na save tu long we ol i save mekim ol piksa.

Em i tok ol pipel bilong ples i wanbel tu long kisim K30 long wan wan de.

Mista Labot i tok ol pipel i nogat bilas bilong ples olsem na ol i askim ol pipel bilong ol ples long bus bilong yusim bilas bilong ol na bihain givim bek.

Em i tok dispela piksa kampani i baim rent bilong ol haus ol i yusim long ples na tu givim K500 long komyuniti bilong wan wan de ol i stap long ples na mekim piksa.

Mista Labot i tok ol pipel bilong ples bilong em i no salim kalsa bilong ol long ol ausait lain. Nogat. Em i tok ol i promotim kalsa long pasin bilong mekim piksa bai ol pipel long ol arapela kantri i ken save long ples Aidibal.

Em i askim dispela kampani long go bek long ples bilong em long narapela taim na mekim piksa sapos ol i laik.

# VAT

VALUE ADDED TAX

COMMISSION

FOR MORE INFORMATION, CONTACT INTERNAL REVENUE COMMISSION, P. O. BOX 777, PORT MORESBY, PHONE: 321 1209, FAX: 321 7962

AUTHORISED BY DAVID SODE, COMMISSIONER GENERAL, INTERNAL REVENUE COMMISSION

INFO 36P

REGISTERED BISNIS I KISIM KREDIT LONG VAT LONG TAIM OL I BAIM KAGO.

TAIM OL I SALIM GEN DISPELA KAGO LONG YU, OL I MAS SASIM VAT LONG PRAIS WE OL I BAIM DISPELA KAGO LONG EM, NA I NO VAT WANTAIM MAK AP.

VAT NA TARIFF REFORMS I DAUNIM PRAIS LONG PLANTI KAGO WE YUMI KISIM LONG NARAPELA KANTRI. DISPELA BAI KAMAPIM MOA WOK BISNIS.

VAT. HELPIM LONG KAMAPIM WOK BISNIS LONG PAPUA NIUGINI



# Lae Nius

## Ol stori FRANCO NEBAS i raitim

### Planti pipel kamap long Morobe So

LAS Morobe so bilong dispela sensari las wiken i pulim planti pipel long olgeta hap long kantri na ovasis tu i kamap long witesim.

Dispela tu de so i stat long Sarere i pinis long Sande we Prais ministā bilong Papua Niugini Sir Mekere Morauta i bin opiseli opim long Sande.

Maski bikpela hat san bilong Lae i bagarapim sindaun bilong ol manmeri ol i suwik het long lukim ol kainkain pilai na tu long lukim praim ministā Sir Morauta.

Papa kanage husat em i nambawan taim long kamap long so i bin wanpela hai lait bilong so we i pulim planti pipel long lukim em.

Narapela sten tu i pulim ol manmeri em coca cola ben sten we ol pawa ben bilong Morobe na arapela hap long kantri i wip wantaim ol stail bilong ol.

Tumbuna singsing tu em wanpela samting tu i pulim ol pipel long kamap na lukim ol stail bilong ol tumbuna we i wok long dai isi isi long sosaeti bilong PNG.

Bikpela namba bilong ol plis man na meri i bin raun i stap long so i lukim nogat bikpela hevi kamap tasol ol liklik samting ol pik poket na spak man.

Prais ministā Sir Mekere Morauta husat i opim so long Sande i tokim ol pipel olsem Morobe Agrikalsa so em i nambawan long wanem em i bringim olgeta Morobe pipel long agrikalsa bisnis na kalsa long bung wantaim.

Em i tok dispela so tu i bringim ol pipel long arapela provins kam bung wantaim ol pipel long Morobe long amamas na lukim so.

"Dispela so em narakain long wanem em i agrikalsa so we i save bringim ol fama i kam soim ol prodak ol kaikai bilong ol long pablik na tu ol kampani i kam soim ol nupela masin na samting long kamap gutpela agrikalsa wok o gaden," em i tok.

Sir Mekere i tok PNG i gat gutpela kalsa na ol pipel mas amamas long lukautim ol dispela kalsa. Em i tok sapos ol samting we i kamap long so i soim ol we yumi save stap nau orait agrikalsa tasol em mas stap.



• Antap: Gavana bilong Morobe provins Luther Wenge na namba memba bilong Nawae Kennedy Wenge sanap wantaim ol ples lain long Bosa viles long Nabak. Tupela i bin opim nupela Bosa komyuniti skul klasrum na tripela haus bilong ol tisa.

• Raithan: Saspek maket long Josey Street long Lae. Pait i bruk namel long ol marit long dispela maket we ol i kolim saspek maket. "Tingting bilong ai tasol".

Ol foto: Franco Nebas



### Sete wari long ol kalabus stap yet long plis sel

MOROBE Plis Komenda (PPC) Mista Awan Sete i wok long wari long ol trabel man o raskol we kot i givim ol taim pinis long kalabus nau i stap yet long ol aut stesin plis sel long provins.

Mista Sete i tokim *Wantok Niuspepa* long Mande olsem dispela hevi bilong ol trabel man o raskol we plis i holim na sasim ol pinis i bikpela hevi tru nau long ol aut stesin plis sel.

Em i mekim dispela toktok bihain long 10-pela trabel man o raskol husat kot i givim ol taim long kalabus i stap yet long plis sel long Garaina stesin.

Mista Sete i tok ol ino inap long kisim ol dispela lain i go daun long Lae long Buimo haus kalabus long wanem plis ino gat mani long mekim rot bilong ol i go daun.

Long dispela as dispela ol lain trabel man husat i kisim taim inap olsem long wan yia long go kalabus i wok long stap yet long plis sel.

Mista Sete i tok dispela em bikpela namba tumas long ol aut stesin plis man long lukautim dispela ol kalabus i stap long plis sel we long dispela taim yet plis i sot long mani na man pawa.

Em i tok olsem long dispela kain hevi em ol kalabus save kisim sans long brukim sel na ronawe taim plis i go het long lukim ol arapela komplek kamap long ol ples o komyuniti.

Em i tok dispela kain hevi long brukim plis sel na ronawe i kamap planti taim pinis long ol aut stesin taim ol plis save mekim wok bilong ol go aut na ol kalabus save ronawe.

Long wankain hevi long Finsafen, 6-pela trabel man i katim plis sel long x-so na ronawe. Plis i bilip olsem sampela lain i bin hatim dispela x-so na karim i go insait na givim long dispela ol lain we ol i usim long katim sel na ronawe.

Mista Sete i tok ol dispela lain em plis i sasim ol long stil, henspim ol man na bagarapim ol samting. Tupela bilong ol dispela lain em plis i sasim ol long ronawe long kalabus tu long dispela yia.

Tupela man ya em, Bob Rading kris-mas bilong em 17, bilong ples Borebogenc na Lau Sarobonney, kris-mas bilong em 21, bilong ples Bayaka long Finsafen Distrik. Mista Sete i tok tupela man ya i bin kisim 6 mun long kalabus taim tupela i ronawe. Plis wok long mekim wok painim aut yet long holim ol dispela lain.

Long Wau/Bulolo 20-pela man i brukim Jabani Trading long Bulolo na stilim ol samting we mani bilong em bikpela tru. Plis i tok planti bilong ol samting ol i kisim em ol pawa samting na ol bia. Dispela i bin kamap long Fraide tu kilok morning. Plis i mekim

wok painim aut na holim tri-pela bilong ol saspek long Lae So graun long wiken.

Long wankaim taim yet long Wau/Bulolo haiwe, Mumeng plis i holim 3-pela saspek wantaim wanpela hom med gan na wanpela bainait bihain long ol traim long mekim rot blok long ples Timini. Plis ripot i tok ol 3-pela lain ya i traim long mekim rot blok taim plis patrol bilong Mumeng i kam bungim ol na holim ol. Plis i sasim ol long nogat laisen long karim gan na katres.

Nem bilong dispela ol lain em, Angwa Buwar, krismas bilong em 32, bilong ples Parakris long Mumeng, Max Bosa, krismas bilong em 22 na Fred John, krismas bilong 15, tupela bilong ples Aro long Garaina.

Ol dispela lain nau i stap long plis sel wetim kot bilong ol.

Plis long Wau/Bulolo tu long dispela taim i mekim wanpela rot blok long wiken na i holim wanpela saspek husat i bin ronawe long plis sel. Dispela saspek em Jack Sandau husat i ronawe long Mumeng plis sel long las mun na ol plis i holim em gen long independent wiken.

Jack Sandau em plis i laikim em long ronawe long sel, stil pasin wantaim gan, Rap na bagarapim ol samting. Sandaun nau i stap long kalabus.

Long Mararana ples long lowa Watut, samting olsem 20-pela man wantaim bus knaif holim ol lain long ples na stilim gol das we kos bilong em olsem K20,000 igo K30,000. Plis long Bulolo mekim wok painim aut na kisim bek samting olsem 75 pesent (K22,000 o K25,000). Plis i holim 20-pela man na sasim ol we nau i wetim kot i stap.

### Baing lonsim 5-yia plen bilong Makam

MEMBA bilong Makam na ministā bilong Kalsa na Turisim Andrew Baing long las Fonde i opiseli lonsim 5-yia plen bilong Makam Distrik.

Long wankain taim tu ministā bilong Woks Mao Zeming i opim Markham hai skul bilding na Difens ministā Alfred Pogo i opim nupela plis stesin.

Dispela ol projek em Japanese gavman yet i fandim we kos i olsem K42 millien. Ol projek em, distrik tresari opis, plis stesin, skul dometri, mes ektensen, wanpela blok bilding bilong Markham hai skul na tu stori klasrum bilong Mutzing primeri skul "dispela em i

sans bilong yupela nau ananit long rifom na mas wok bung wantaim kansel presiden bilong yupela long strongim distrik bilong yupela, pawa em i stap long han bilong yupela, Papua Niugini ino inap strongpela kantri sapos distrik em ino strong." Ministā Baing i tok

Em i tok sapos i gat gutpela plen, ol pipel bai gat klia piksa long tingting long distrik developmerf.

Ministā bilong Difens Alfred Pogo husat i opim nupela plis stesin i mekim wankain toktok olsem mista Baing. Em i askim ol pipel long mas wok bung wantaim long bringim developmen kam long distrik bilong ol.

Ministā bilong woks Mao Zeming husat i opim Markham hai skul bilding i tok bikpela tenkyu i go long Japanese gavman long kamapim dispela ol projek na i askim ol pipel long lukautim gut dispela ol samting o projek.

"Yupela mas amamas long wanem ananit long rifom Morobe em i nambawan na wanem kain ol liklik risos yupela gat mas was long ol na lukautim gut," em i tok.

Long dispela taim yet Mema bilong Wau/Bulolo Sampson Napo i tok strong long ol pipel long noken pilai politiks na wok wantaim memba na pablik sevent long bringim developmen igo insait long


distrik. Em i tok, "long planti hap bilong kantri developmen ino save kamap long wanem long planti politik tumas na ol pipel save kisim bagarap."

Ektong gavana bilong Morobe Provins Paul Itama husat i kisim maus bilong Gavana Luther Wenge husat i stap long bung bilong ol gavana bilong Momase long Vanimo i opim distrik tresari opis.

Dispela em namba tri distrik long Morobe Provins long lonsim 5-yia distrik plen bilong ol ananit long nupela rifom. Lae distrik na Finsafen em arapela tupela distrik husat i lonsim pinis plen bilong ol.



# SAMPELA SAMTING LONG MEKIM TAIM BIRUA O HEVI I KAMAP



**Y2K Komiti i tok strong long ol Pablik na Praivet Sekta na ol manmeri wantaim, long rereim ol plen bilong ol yet, long abrusim birua sapos i kamap long dispela Y2K Hevi, taim ya i senis long mun Jenueri long ya 2000. Bihainim dispela Y2K Plen:**

- **Rekod**

Kipim na lukautim gut ol rekod insait long buk o pepa.

- **Foms na Pepa**

Raitim ol fom bilong opis wok long han.

- **Moni**

Lusim inap moni long wokples long mekim liklik wok nambaut.

- **Sekiuriti na Seifti**

Ol wokples i mas kamapim strongpela sekiuriti taim ol i go long benk, na tu ol wokmanmeri i mas lukautim ol yet taim birua pasin i laik kamap.

- **Wok/Bisnis Aua na Wokmanmeri**

Abrusim taim long wok, na abrusim nara pela dei long mekim wok, bai laikim moa wokmanmeri long wok long kamapim ol wokmanmeri wantaim ol sekiuriti.

- **Pawa, Fuel Wara na narapela samting moa**

Ol wokples i mas rereim pawa genereita, kar, fuel, wara na ol narapela samting moa, we ol i no nap kisim bagarap.

- **Kominikeisen na Kontrol Senta**

Ol wokples i mas kamapim wanpela hap insait long opis, long bihainim na tokaut

long ol samting olsem sekiuriti, seifti, moni long benk, sapos ol i wok orait.

- **Insurens**

Wokples i mas baim insurens long ol wok manmeri bilong en.

- **Autim Toktok**

Wokples i mas kamapim wanpela hap bilong kisim na salim toktok taim hevi i laik kamap.

- **Kastama Lieison na Pablik Releisens**

Dispela ol lain wokmanmeri bai i stap sambai long wokples long stretim ol hevi sapos i kamap.

Long kisim moa toksave, ring long

**telefon - 327-6472**

o yu ken rait i kam long:

The Chairman

Y2K Planning Committee

Department of Personnel Management

WAIGANI

**Pablik Afes Divisen, Dipatmen bilong Praitim Minista na NEC wantaim Y2K Plening Komiti ol i mekim kamap dispela toksave.**

## Gret 6 bai wokim tes yet, Baki i tok

Ol gret 6 studen long olgeta hap bai sindaun long fainel tes bilong ol bihainim nupela edukesen sistem inap olgeta skul i gat top ap.

Edukesen Seketeri Peter Baki i tok olgeta gret 10 skul long PNG i wok long yusim olupela sistem long mekim fainel tes bilong ol bikos top ap skul i no kisim olgeta hai skul insait long kantri yet long kamapim nupela sistem.

Mista Baki i tok wanpela as we ol gret 6 i wok long mekim tes yet em bikos dispela i ken givim gutpela sans long ol sumatin husat i save laik trensfea i go long narapela skul we ol i no gat top ap na i stap yet long olupela sistem. Dispela inap mekim skul bilong ol dispela studen i ken go orait tasol wantaim ol arapela.

Sapos wanpela studen i transfea i go long narapela skul we i no bihainim nupela sistem yet, em i ken go het yet long mekim fainel gret 6 tes bilong em na go mekim gret 7 long neks yia, Mista Baki i tok.

Tasol Mista Baki i tok bai Edukesen Dipatmen i wok strong tu long lukim olsem level na stended bilong edukesen i stap strong na wok gut long kantri. Nau yet Edukesen Dipatmen i wok hat long go insait long kamapim senis we bai i gat moa tes o fainel eksem long ol skul long bihainim taim.

## Boi Ambunti redi long paia lait long Sepik musik



### JOE KANEKANE i raitim

SAPOS yu wanpela bilong ol lain husat i save bihainim musik bilong ol Sepik, moa beta yu mas harim ol singsing bilong Timothy Nakon.

Boi Ambunti i redi tasol i stap larim yu yet skelim sapos yu inap long Sepik musik we Christian Mandawali, Willie Sebas na Ararua band i givim i orait o nogat.

Sapos yu no bel pulap long dispela ol musik, orait noken westim taim lukim feveret musik stoa bilong yu na kisim dispela kaset. Stori bilong Timothy i longpela olsem em i kamap olsem wanpela mangi long ples nating husat i gat bikpela laik long katim wanpela keset bilong em.

Taim em i stap long ples em i save beten strong tru long God papa long luksave long beten bilong em na larim em i katim wanpela album kaset bilong em. Em i muv i kam long Wewak na

em i sambai wantaim wanpela grup ol i kolim Sepik Musik Asosiesen we ol i save raun long planti hap bilong ol Sepik na mekim bikpela nem bilong ol kampani na sampela klab.

Long dispela kain pasin bilong em, em i kisim moa save long wei bilong pilaim ol musik na tu em i wok long mekim nem bilong em i kamap bikpela.

Long mun Novemba long 1991 em i kisim driman bilong em taim em i kam long Mosbi we em i rekotim namba wan kaset bilong em, Timothy Nakon Solo album.

Bihainim tasol long dispela em i go bek long Wewak we em i stap moa long seven pela yia olgeta na em pilai wantaim ol ben na mekim dispela seim wok we em i wokim pastaim.

Long dispela taim em i wok long mekim kamap bikpela Biangu na Ngingigu klap na Robert Seeto trading long Wewak.

Insait long dispela ol yia em i hamamas long wokim dispela wok long wanem em i karim em i go long planti hap bilong Sepik we wantaim ol poro bilong em ol i karim pawa ben i go long ol pipel.

"Mipela ol bois i lukim olsem i gat sapot i kam long ol pipel bilong yumi long ol bus ples husat i no gat sans long lukim ol musik i kamap long ol taun eria. Mipela i givim sans long ol pipel long luksave long ol kalsa na ol samting i wok long kamap long ples bilong mipela," Timothy i tok.

Long 1997 em i kam long Mosbi na em i bung wantaim wanpela narapela grup bilong Wewak ol i kolim Waksa 98 ol Wewak. Wantaim dispela grup ol i pairap strong tru long ol provinsel na FM radio stesin.

Wanpela singsing we dispela ben i raitim em *Blu ais bilong Santani*

we Kamos ben bilong i wok long mekim kamap bikpela.

Las yia long Septemba em i go long Rabaul we em i rekot wantaim Islands Sound Studio long katim dispela solo album bilong em.

Dispela album i pairap bikpela long ol arapea musik long wanem em i gat planti ol kain kain tokples insait long kantri i stap long dispela kaset.

Tupela singsing, Skin Buai na Dokta boi bai mekim lewa bilong yu guria long wanem pairap bilong pawa ben wantaim nek bilong singsing i bai surukim yu tu.

I gat wanpela singsing bilong Pangia tokples tu i stap insait. Sing sing em Hey, Hey, Hey we wanpela poroman bilong Timothy husat i stap long Moem bareksi bin halivim em.

Narapela singsing Endata em i bin raitim wantaim Saugaus ben taim ol i stap long Popondetta long wanpela fan raising bilong Anglican Sios.

Ol singsing bilong em i save toktok long ol pasin bilong mipela, long ples na tu long ol arapela samting mipela i wokim long taun.

"Planti samting i wok long kamap long kantri na mi bilip olsem wanpela atis mi mas luksave long dispela ol samting na mekim ol pipel i luksave. Kastom bilong mipela i dai na mi laik strongim kastom long ol singsing bilong mipela," Timothy i tok.

Em i laik salim tenkiu bilong em i go long ol sponsa bilong em Capital City Real Estate, ol bilong Ambunti kominiti long siti na tu long Robert Seeto long Wewak.

Timothy i no man bilong tok tok, olgeta tingting bilong em i stap long musik bilong em na sapos yupela save bihainim Sepik musik.

## Mosbi plis paitim ol soldia

OL plisman long Mosbi i bin paitim na kalabusim sampela ami bilong Taurama bareks long las wiken.

Taim ol plis i no givim wanpela ripot long dispela, ol ami i tokaut olsem ol bin baim bia long Club 21 na i laik draiv i go bek. Ol i go kamap long Trophy Haus long Boroko na plis ka i kam na kisim bia bilong ol na brukim.

Ol ami i tok taim ol i go kamap long Manu Auto Port, wanpela diuti plis kam i raun i stap long hap. Olsem na ol i go ripot long dispela plis ka long pasin arapela plis lain i bin mekim long ol.

Ripot i tok ol dispela ami i toktok tasol i nogat gutpela bekim long dispela diuti plis lain olsem na ol i belhat na brukim sairen lait bilong plis ya. Tasol wanpela plisman i paia long sotgan na ol ami ya i ronawe nabaut.

Tasol tupela ami long ka i bin kisim bikpela taim nogut taim ol plis lain i kam kamap na paitim tupela nogut tru.

Ripot bilong plis i tokaut tasol olsem ol bikman bilong plis na ami i bin sindaun long Mande dispela wik na stretim pinis dispela toktok.

# ELA MOTORS HANKOOK TYRES

**Plantu stail long ol kualiti Hankook tyres long fitim ol kain kain kar na trak**

Kisim ol long Ela Motors Pats dipatman na ol Tyre senta long olgeta hap.

**HANKOOK TYRES**

**KOLIM MIPELA NAU!**



**Ela Motors**  
LONG OLGETA HAP

HEAD OFFICE PH 3229614 PORT MORESBY 3229414 LAE 4722322 KOKOPO 9829100 RABAU 9821988 MADANG 8522188 GOROKA 7321844  
MT HAGEN 5421888 WEWAK 8562255 KAVIENG 9842132 KIMBE 9835155 TABUBIL 5489050 VANIMO 8571254  
PORGERA 5479367 KUTUBU 5496685 BUKA 9739915 LIHIR 9864099 ALOTAU 6410100

Sauten Rijon

# Red Shield trening skul skulim moa lokol fama

**KENNEDY EDENE i raitim**

RED Shield trening senta bilong Salvation Army bilong PNG antap long Sogeri i wok long kisim sapot na interes i kam long ol yut na ol ples lain insait lng Vesulogo lokol gavman kaunsil eria long Sogeri.

Planti bilongol dispela yut i nogat gutpela edukesen na sampela i no bin pinisim skul bilong ol.

Ol to ol i amamas tru long dispela senta long kain trening em save gimv long ol yut.

Siaman bilong komyuniti developmen Beni Sisi i tok dispela trening senta i wok long gimv gutpela trening long ol yut na viles fama long mekim samting ol yet na kamapim long helpim sindaun na laip bilong ol wanwan long ples na komyuniti.

Trening Kodineta Steven Aina i tok as tingting bilong kamapim ol kos na trening long save na level bilong ol ples lain na yut em long skulim ol long lukautim ol enimol, groim kumu na arapela kaikai long gaden, lukautim ol pato na planim kopi samting.

Mista Aina i tok dispela level bilong trening i ken gimv sampela save long ol ples lain long mekim ol kain wok olsem long kamapim liklik mani bilong ol yet we i ken helpim laip na sindaun bilong ol long ples. Na tu dispela rot i ken mekim ol ples i stap gut long ples na mekim wok na i no ken go raun nabaut long siti na taun long painim wok, em tok.

Em i tok dispela kain trening tu em gutpela long skulim ol yangpela bikos ol bai i ken go het long mekim wok long wanem samting ol i lainim long nau na i go.

Deputi Edministreta bilong Ekonomik na Piskel Plening long Sentrel provinsal gavman Uve Rova i tok dispela trening senta em i mekim bikpela na gutpela wok tru na

ol komyuniti lain i mas lukautim gut.

Mista Rova i tok dispela kain trening bai kamapim bikpela senis tru long sindaun na laip bilong ol manmeri na ol i laik mekim em olsem wanpela pailot projek bilong ol long Sogeri eria.

Em i tok tu olsem mani em bikpela hevi long kisim hariap tasol em i askim ol kodineta na trena bilong dispela trening senta long traime kisim ol helpim na sapot bilong DPI opis long Sogeri yet.

Ol lain i bin sindaun long trening long dispela senta i bin trening long lainim ol enimol na rebit tu wantaim. Nau yet i gat olsem 30 rebit long Sogeri we ol i wok long lukautim. Na tu ol i gat 7000 kopi bin we i tupela mun pinis na i stap long neseri na ol bai planim long Jun Julai long neks yia.

# Ol olupela ka bai kisim taim long Mosbi siti

**NCD RIPOT**

TREFIK long siti bilong Mosbi bai stat mekim save long ol ka we i no gutpela moa long ron long rot. Ol wokman bilong Trefik rejistri bai mekim bikpela was na sekap long rot long stapim na rausim ol ka we i olupela tru na mekim planti nois o smok i kamaut long ol na arapela samting moa we i no gutpela long ol kain ka olsem i ron long rot.

Longpela taim nau, planti ka we i no moa gutpela tasol i wok long ron yet long rot i gimv plan-

ti hevi long ron bilong ol trefik, eksekutiv siaman bilong Finance Pacific Rimbink Pato i tok.

Bai dispela wok i stat long Novemba 1 1999 taim opis bilong Motor Traffic rejistri i go long nupela opis bilong em long Hohola long dispela wik.

Mista Pato i tok long bungim wok bilong testim, laisensim na rejistresen aninit long wanpela opis, bai i isi long sekim na luk-

save long olgeta ka na draiva gut bai ol i no ken ron nabaut na kamapim hevi long laip bilong ol manmeri long rot.

Mista Pato i tok sapos ol opisa bilong trefik i sekim olsem wanpela ka i no moa gutpela long ron long rot, bai ol i gimv oda long rausim dispela kain ka na i no ken rejistaim moa.

Dispela em wanpela bikpela eksen Motor Vehicle Insurence Trust we i lukautim ol wok bilong trefik rejistra bai kamapim long neks mun stat long Novemba 1.

**MILEN BE RIPOT**

## Gudinap pipel laikim emejensi plen



• Ol sampela SVD Bruder long Bomana Koles i redi long go long wanpela wok felosip long las wik taim Wantok i kamap bungim ol.

OL pipel bilong Gudina ailan long Milen Be provins i wok long wetim yet emejensi plen bilong taim nogut we inap kamap long bhain taim.

Eria menesa Poem Wake i tok dispela hap bilong ilektoret long Milen Be provins i save bungim guria na ol birua bilong solwara bikos planti bilong ol i stap long nambis eria.

Olsem na ol i mas gat sampela kain plen o wok redi bilong was long ol yet taim taim nogut i kamap long ol long bhain.

Mista Wake i tok long planti krismas i kam nau distrik i nogat wanpela emejensi plen tasol ol i gat pret olsem ilektoret bilong ol i stap

antap long volkanu bikos long sain bilong ol guria na sampela senis olsem ailan i wok long surik i go klostu long Fegusen ailan.

Mista Wake i tok i gat planti manmeri long Gudina ailan na dispela emejensi plen em bikpela samting long skulim ol manmeri long was na redim ol yet long wanem taim kain birua i kamap long ol.

Mista Wake i tok ol i mekim toksave na askim i go pinis long provinsal disasta opis na tu long nesene opis bilong nesene disasta na emejensi long Mosbi. Tasol inap nau, ol i no kisim wanpela bekim yet i kam long tupela opis ya.



# BOROKO Foodworld

**BUTCHER SHOP SPESOLS**


Diced Beef	K7.50 Kg
Hamburger Mince	K5.30 Kg
Beef/Pork Sausages	K3.95 Kg
Ilimo Chicken Size 13	K7.38 Ea
Ilimo Choice 900gr	K5.69 Ea
Ilimo Breast 900gr	K5.85 Ea

**GROCERY SPESOLS**

Sunshine Milk 1Ltr	K2.37
Roots Rice 1Kg	K1.28
Power Rice 10Kg	K15.40
Red Apples Kg	K3.95
Brown Onions Kg	K2.30
Home Brnd Bkd Beans 420Gr	K1.67

Planti moa kaikai prais i go daun long en!

Ph: 325 7506, 325 0863 Fax: 325 7096



• Oposisen lida Bill Skate i go long Waigani Kot Haus long harim kot bilong NCDC saspensen.




• Bauabaua na Hapma Tieta grup long Wewak i mekim singsing na danis long Windjama Hotel.



• Ol plis long Lae i brukim na kukim setelmen we i laik kamap long Lae olupela ples balus.



• Sampela lain soldia bilong Moem Bareks long Wewak i bin wokabaut kamap long Lae las mun.




• Antap: Maunten paia bilong Tavurvur long Rabaul i sanap long hapsait. Dispela volkanu i bin bagarapim Rabaul taun long las yia.

• Lephau: Sampela lain famili long Mosbi i no laik sindaun nating. Ol i kisim umben na go painim pis long Kanudi nabis.



# LAGANI 2000 IA MAI LALOA HAIDA KARAIA



**Y2K Komiti be inai nega lalonai gavamani bona kampani idaidau lalonai idia gaukara taudia dekenai hadibaia hereva ia henia noho badina January 1, 2000 ia ginidae neganai kompiuta dekenai kerere haida do idia hedinarai diba gaudia dekenai durua bona hanamoa dala danu be do ia haraga. Y2K Palani karaia lalonai laloa gabudia haida be inai:**

• **Pepa Dekenai Rekodi Karaia**  
Gaukara redoki ibounai be pepa dekenai karaia.

• **Gaukara/Bisinesi ena Hereva**  
Gaukara eiava bisinesi ena hereva be pepa dekenai toredia.

• **Moni Naria**  
Moni haida be gaukara bona durua haida karaia totona dogotao bona naria.

• **Sekiuriti Gaukara**  
Kerere haida idia vara lalonai gaukara taudia edia mauri durua bona banika dekenai lao moni atoa totona sekiuriti dala danu karadia namonamo.

• **Gaukara Taudia**  
Duruva henia taudia danu gaukara dekenai do idia abidia vareai, heduru bona sekiuriti gaukara totona bona gaukara ena hora danu do idia senisidia.

• **Duruva Henia Kohu**  
Gaukara lalonai durua henia gaudia: motuka, paoa, aheaua misini, bendini bona dika haraga diba lasi gaudia abidia hegaegae.

• **Duruva bona Hadibaia Hereva**  
Moni gaukaraia, Gaukara badadia aheaua bona Kohu naria namonamo totona

gaukara gabudia dekenai durua hereva halasia bona hadibaia opesi ta karaia.

• **Insuirensi**  
Gaukara oreadia be edia gaukara taudia, moni bona kohu bema idia dika murinai hanamoa totona insiurensi umui hoia.

• **Hadibaia Hereva Henia**  
Gaukara opesi ibounai be namo infomeisin eiava hadibaia hereva henia gabudia danu karadia.

• **Gaukara Hebou Hanamoa**  
Gaukara orea ta ta be namo taunimanima dekediai gaukara hebou bona dala hanamoa totona durua hereva danu ahedinarai.

Bema oi ura durua hereva haida abia neganai, **telefoni namba 327-6472** dekenai hereva karaia eiava revareva torea lao:

**The Chairman  
Y2K Planning Committee  
Department of Personnel Management  
WAIGANI**

Inai hadibaia hereva be ia mai - Public Affairs Division, Department of Prime Minister bona National Executive Council bona Y2K Planning Komiti amo.

# spot WANTOK Wilken

## PMSA mekim tok lukaut

HENRY MORABANG i raitim

### PMSA RIPOT

POT MOSBI soka asoisesen i mekim strongpela tok lukaut long ol klab, opisel na pilaia olsem ol bai stapim kompetisen sapos pait i kamap gen long Bisini soka graun.

Presiden bilong PMSA Kuma Aua i autim dispela toktok bihain long hetkosa bilong wanpela klab na meri bilong em i mekim sampela kros pait wantaim ol pilaia bilong arapela klab.

Aua i tok sapos wanpela moa pait i kamap ol bai stapim

Presiden i tok "ol eksekutiv bilong mi bai i no inap givim moa sans long kain pasin na bai stapim gem na nogat gren fainel." Em i tok eksekutiv bilong em i mekim dispela disisen insait long miting las wik.

PMSA em wanpela biknem soka senta insait long kantri. Na kain pasin i kamap i no gutpela tumas ya.

Long wik i go pinis, wanpela pait i bin kamap namel long ol pilaia bilong tupela primia divisen klap na wanpela sinia pilaia i mekim tok pret i go long sinia referi.

Aua i tok disisen bilong eksekutiv bilong em i fainel. Wanem pilaia o klab i kamapim pait na mekim tok pret i go long arapela pilaia o opisel, em bai aut long kompetisen long neks yia.

Na wanem pilaia husat i statim pait, PMSA bai rausim em olgeta long i no inap pilai oka gen wantaim kompetisen. Dispela i min tu olsem PNGFA bai stapim dispela man tu long pilai long arapela soka senta.

Presiden Aua i tokaut olsem eksekutiv bilong em i mekim dispela disisen bikos long lukautim soka insait long NCD.

"Disisen ya em long lukautim soka na tu helpim long strongim soka gem na tu ol pilaia. Na disisen tu ya em long lukautim ol pilaia na sapota long noken kamapim ol kain pait pasin."

Las wikem, olgeta gem insait long PMSA i no bin kamap bikos ol referi i straik. Dispela straik i bihainim hevi we ol pilaia bilong wanpela primia klab i mekim tok pret i go long wanpela wanwok bilong ol.

## Wagambie helpim soka long Wewak

OLPELA biknem spotman John Wagambie i sapotim wanpela soka tim insait long Wewak soka asoisesen.

Gawi soka klab husat i save stap insait long kik resis bilong Wewak i painim hat tru long kisim sponsasip. Planti ol pilaia long dispela klab i save stap long Nuigo setelmen na ol bilong Sepik Wara long Ambunti distrik.

Wewak Soka Asoisesen klostu i autim ol long kompetisen tasol gutpela tingting bilong klab menesa na presiden John Tagit na Raphael Tagit i painim John Wagambie long sponsarim ol.

Gawi soka klab i bin fom long 1983 na i bin nogat sponsa. Olsem na ol i bin askim Wagambie long givim sampela mani long sponsa.

Mista Wagambie i tromoi K606 olgeta, na dispela mani i karamapim rejistresen fi bilong klab na nupela yunifom.

Taim Wagambie i givim sponsasip em i tok olsem em bai sponsarim klab na em i laik nem bilong klab i mas senis olsem Wagambie Gawi Soka klab. Dispela agrimen bilong sponsasip bai stap tripela yia olgeta.

Wagambie tu i bin givim sampela sapot tu i go long Wewak skwat husat i go kik long sempionsip long Independens wikem.

Presiden bilong Wewak Soka Asoisesen David Bandi i makim maus bilong Gawi soka klab na tu 2000 rejista memba bilong asoisesen long mekim bikpela tok amamas i go long John Wagambie.

Em i tok olsem Wagambie i soim tru olsem em i pikinini tru bilong Sepik na em i lusim longwe ples olsem Pot Mosbi long kam sapotim ol pipel bilong Sepik long spots.

# Gene go joinim Gateshead Thunder

FAIV-ET bilong Kumul Stanley Gene i lusim Goroka las wik Sarere long go joinim nupela tim bilong em, Gateshead Thunder long Inglan.

Gateshead Thunders em wanpela tim insait long fes divisen long Supa Lig ragbi lig kompetisen.

Gene i bin pilai wantaim Hull Kingstone Rovers long 4-pela yia olgeta na nau em i winim kontrak wantaim wanpela Supa Lig kompetisen. Supa Lig kompetisen em i strongpela kompetisen long Inglan.

Boi Goroka ya i winim planti ol awot taim em i pilai long Inglan.

Gene i kam malolo na wokim haus bilong mama bilong em long Genoka setelmen klostu long Goroka ples balus.

Em i bin les long pilai long PNG Kumul taim ol i bungim Australia Aborijin long tupela salens gem. Insait long namba wan gem, Aborijin winim PNG Kumul 58-12 na las gem ol i win gen 32-10.

Gene i lusim kantri long go hariap long statim trening bilong



• Stanley Gene.

em wantaim nupela klap long redim ol long nupela sisen.

Em i mekim wanpela bikpela disisen long lusim HK Rovers bikos em i laik pilai long strongpela kompetisen.

"Kosa bilong HK Rovers Dave Harrison i laik holim mi long stap olsem wanpela opisa long tim menesmen bilong klab tasol ol i save long as watpo na em i lusim klab.


"Planti ol sapota bilong em long Rovers i laikim em long stap tasol taim i senis long laip olsem na em i lain go painim nupela laip," Gene i tok.

Kumul faiv-et i tokaut olsem em i lainim planti samting tru taim em i stap wantaim Hk Rovers, na em bai yusim ol dispela save taim em i joinim nupela klab.

Gene i tok "Em i go hariap long joinim klab na bai stat trening wantaim ol arapela pilaia."

Em i askim ol pilaia long Goroka Lahanis na tu Kumul long tren hat long traime winim ol gem. Em i sori tru olsem PNG Kumuls i lus tasol em i laik PNGRFL i mas painim moa intanesenel gem long strongim tim long bihain taim.

Gene i tok dispela tim egensim Australia Aborijins i gutpela tasol ol i nogat strongpela fowat husat i ken kirapim paia na go pas long tim. Dispela wok em ol sinia pilaia olsem Adrian Lam, David Westley na em yet i save go pas long Kumul ya.



• Namba tu Praim minista na tu minista bilong Spots John Pundari.

## Pundari i laik Kumul-Aborijin gem i mas kamap olgeta yia

NAMBA TU Praim minista na tu minista bilong Spots John Pundari i sapotim tingting long kamapim gem namel long PNG Kumuls na Australia Aborijins tim long olgeta wanwan yia.

Pundari i autim dispela tingting taim em i go stap long Cairns long lusim namba tu gem namel long Kumuls na Aborijins we ol i win 32-10. Gem ya i bin kamap long Barlow Park, Cairns.

Namba tu praime minista em i amamas tru long Kumul tim husat i nogat ol biknem pilaia bilong kantri olsem Adrian Lam na Marcus Bai.

Dispela gem long wanwan yia namel long tupela kantri, PNG na

Australia, bai strongim gutpela prensip. Tupela bikman bilong Aborijin Spots Kaunsil Mal Cochrane na kosa bilong Aborijin Arthur Beetson i sapotim toktok bilong Pundari.

Pundari i tok olsem sapos Kumul i pilai long ol dispela kain gem ol i ken kamap strongpela tim tru

Tim bilong Aborijin i gat planti ol pilaia long NRL stret na Kumul em wanwan tasol. Ol i pilai na lus insait long las 15 minit.

Kumul i kamapim gutpela gem long namba wan hap. Long hap taim skoa i sanap 16-10.

Namba tu Praim Minista i bungim ol pilaia long hap taim na

givim sampela strongpela toktok long ol ya na givim \$1000 long tim long amamasim ol bihain long gem.

Kosa Bob Bennett tu i amamas strong bilong ol Kumul husat i kamapim gutpela gem tru wantaim ol biknem bilong Aborijin. Na em i amamas tru olsem Mista Pundari i soim pes long sapotaim nesenel ragbi lig tim.

Dispela gem ya i pulim 3000 manmeri na sampela ol pipel long PNG i bin baim balus na go lukim gem.

Sampela ol bikman husat i lukim gem em Minista bilong Egrikalsa na Laipstok Ted Diro.



• Ted Diro.


• Raithan: Susa lukaut long baksait bilong yu. Ricca Siwin (raithan) bilong Word Publishing i redi tasol long holim bal taim pilaia bilong Post Courier i laik bringim i kam insait long ples pilai. Post Courier i win 26-16.

# WIKEN SPOT EKSEN



• Antap: Presiden bilong Goroka Bowling Asosiesen Peter Huyota i sanap kisim poto wantaim wanpela poroman bilong em. Tupela ya i resis long Nesenel Triples taitel i bin kamap long Goroka las wiken.

• Raithan: I noken ting ol Sentrel tasol i save pilai netbal. Janet bilong Post Courier em bilong Hailans na em i traim save bilong em long Praivet Kampani Netbal resis long wiken



• Kepten bilong Kui Raiders Robert Benny i amamas na laik traim apim Kap tasol em i hevi ya. Siaman bilong PNGRFL Rod Pearce i sanap na lukluk long en.



• Hitman bilong Souths Robert Tia i holim bal na ron i go bungim pilaia bilong Kui Raiders long Cambridge Kap gren fainel long Goroka las Sande. Souths lus 16-12.



## Stori FRANCO NEBAS i raitim

**MOMASE KAP RIPOT****Momase Kap bai pulim planti tims long resis**

MAMOSE kap resis long dispela yia bai pulim samting olsem 28 tims bilong man na 8 long ol meri. Dispela em bikpela namba stret long rekot bilong dispela kap resis insait long dispela rijon.

Dispela resis bai kamap long Madang long Novemba 4 igo pinis long 7 long Laiwoden oval na ragbi lig graun.

Mamose tonamen dairekta John Peka i tok olsem dispela tonamen long dispela yia em i bikpela tru olsem long bipo long wanem bikpela namba bilong ol tim i soim laik long resis long dispela namba 20 Mamose kap tonamen.

Peka i tok long olgeta dispela tim long pilai em ol i nidim foapela soka fil long holim dispela resis. Em i tok, " mipela i painim tripela fil pinis tasol i lukluk yet long arapela moa. tripela fil em, Laiwoden tupela fil na ragbi lig graun."

Em i tok ol i bin toktok wantaim Madang lig opisel long usim fil na ol i bin givim tok orait long ol.

Dispela 28 tims bilong man na 8 long meri i bai pilai insait long pul. Long man i gat foapela pul na meri tupela.

Long pul bilong ol man em, (Pul A), Difendin sempions Wewak, Lahi, Mandixs (Wau), Raikost, Finsafen, Maprik, Madang tu, (Pul B), Kaiyapit, Wantoat, Madang distrik, Somgilba, Wewak distrik, Vanimo, (Pul C), Lae, Wewak tu, Yomba, Aseki, Wau, Aitape, Umi, (Pul D), Madang wan, Angoram, Bogia, Bulolo, Buang, Boana na Wewak distrik.

Dairekta Peka i tok long dispela ol yia i go pinis long resis bilong Mamose kap em i lukim olsem dispela resis i wok long go moa strong long olgeta yia. Dispela long wanem long olgeta namba bilong ol tims insait long resis long dispela tonamen i save i go moa antap.

Em i tok long dispela yia namba bilong tims em moa bikpela i winim sampela resis i go pinis. Dispela i soim tru olsem soka long Mamose rijon em i wok long go strong yet. Em tok tu olsem Mamose long dispela ol yia i kam pinis long dispela sensari i save kamapim planti ol gutpela soka pilaia, kosa na tu ol eksekutivs.

Em i bilip olsem Mamose em wanpela strongpela rijon we soka i no dai long wanem long kain bekim i kam long tims husat i save soim laik long pilai long dispela resis.

Em i tok dispela em las tonamen bilong dispela sensari we ol opisel na oganasing komiti i laik mekim dispela olsem bikpela na bes Mamose kap resis. Long wankain taim yet em i singaut long foapela gavana bilong rijon long luksave long dispela tonamen na sapatim long gutpela bilong rijon.

**LFA referi na eksekutivs wanbel long gems go het**

LAE Futbol soka asosisen (LFA) eksekutivs na referi i wanbel pinis long pinisim olgeta gems bilong ol long dispela sison.

Dispela wanbel toktok i bin kamap namel long tupela sait wantaim long wanpela miting las wik igo pinis.

Lae soka referi i bin straik bihain long eksekutivs ino bin harim singaut bilong ol long kompensasen long wanpela referi bilong ol we ol pilaia na sapota bilong wanpela tim i paitim

em.


Long dispela taim tu ol referi i laikim LFA long baim ol sevis fi bilong ol.

Jenerol sekteri bilong LFA Augustine Guarim i tokim Wantok long Mande olsem eksekutivs bilong LFA i tok orait long stretim ol dispela dinau.

Em i tok, "Mipela ino inap baim ful tasol bai traim long stretim isi isi long wanem long hevi bilong mani nau mipela i gat."

LFA i gat tripela moa gems istap bipo ol i go insait long fainels bilong ol. Long wankain taim yet LFA senia man skwat na meri i wok long go het long trening redim ol yet long pilai insait long Mamose kap long neks wiken.

Mamose kap bai kamap long Madang long Novemba 4 igo long 6. Samting olsem 28 tim bilong ol man na 8 bilong meri insait long Mamose rijon bai kamap long dispela resis.

**Pikus nupela senia man sempions long Lae Tas**

• Salamanda Tas tim husat em sempion long Open Man Divisen bihain long autim Bundi Giants 5-4 long Lae tas gren fainel las wiken.

**LAE TAS RIPOT**

KAMKUMUNG Pikus em nupela senia man sempions long Lae tas 7 asait bihain long ol i nekim Bundi Giants 9-2 long gren fainel pilai long Scout Oval long las Sarere. Dispela gren fainel tu em nambawan taim long rekot bilong Lae tas asosisen we wanpela tim i win long bikpela skoa.

Pikus em nupela klab long dispela yia i pilai insait long dispela kompitisen na mekim i go long fainels na winim taitel. Ol i soim tru kala bilong ol olsem ol i gat namba tu long pilai tas ya.

Ol i statim sison bilong ol long stail we ol i bagarapim sindaun bilong planti senia na nambawan tim bilong Lae tas kompitisen na mekim igo tru long gren fainel.

Man i go pas long dispela klab Stanley Sands na meri bilong em i

tok bikpela amamas igo long ol boi long mekim igo insait long gren fainel na winim taitel.

Em i tok, "Dispela long komitmen bilong olgeta pilaia i karim kaikaik bilong en."

Pikus ino lukluk bek taim ol i go insait long semi fainels we ol i wipim ol tims long bikpela skoa igo inap ol i bungim feveret Bundi Giants na bagarapim sindaun bilong ol long bikpela skoa 9-2.

Long gem bilong ol long Sarere, planti sapatas na opisel i bilip olsem Giants bai winim dispela gem long wanem ol i feveret tim na ol i go pas sambai long gren fainel. Tasol dispela tingting na bilip bilong ol i popaia taim ol mangi long Kamkumung i stat putim trai olsem wara Bumbu i ron. long nambawan hap yet em ol i putim 4 trais na Giant inogat.

Ol dispela trai i bin kamap long,

Johannes James husat i putim tupela, Tau Dombo na Philip Awa.

Ol trai i kamap long ol gutpela pilai kombenesen kam long, Zico Nou, Johannes

James na Philip Awa. Ol tripela lain taim ol i holim bal em save nogut long wanem ol kain fas pilai na rausim bal hariap lukim ol Giants kisim bikpela hevi.

Ol gutpela sapat pilai tu bin kam long ol lain olsem, winga Ali Aua, David Sagi, Vincent Amba, Jimmy Henanik na Ben John.

Long ol gutpela sapat pilai na difens long dispela ol lain em Giants ino gat san long skoa long fes hap.

Long namba tu hap tu i wankain olsem fes hap long wanem Pikus ino givim sans long Giants wantaim ol dispela kain fas pilai na bek hap i lukim ol paraipim 5 moa

tra i gen. Dispela ol trai em, Johannes James, Tau Dombo, Chiko Nou na Philip Awa i bin putim.

Giants i traim bes bilong ol long las minit na skoarim tupela trai kam long Kuno na Philip Kamake. Fainel skoa i sanap olsem Pikus 9 na Giants 2.

Bes pilaia awot i go long Johannes James bilong Pikus husat long Mande go bek long Mosbi.

Long ol arapela fainels, Salamanda open man i autim Giants 5-4 long winim taitel,

mix manmeri, Warriors rausim trausis bilong Salamanda 10-6 na open meri, Gobari rausim siket bilong Bees 5-4.

Ol tas opisel bilong Lae tas asosiesen i amamas tru long dispela gren fainel we i pinis gut na nogat trabel.

## Niu Ailan sofbal sempionsip bai kamap long krismas

NAMBA foa Niu Ailan Sofbal Fastpitsing sempionsip bai kamap long Kavieng long Disemba 25-27 long Kopkop So graun.

Dispela sempionsip i save kamap jihain long olgeta tupela yia. Long dispela yia ol tim bai resis long winim K4000.

Wantaim gutpela tok orait bilong mama bodi bilong sofbal, PNG Sofbal Federesen, dispela sempionsip i save pulim ol tim bilong Niu Ailan long olgeta hap bilong kantri long resis.

Kodineta bilong sempionsip John Knox i tokaut olsem dispela sempionsip em bilong asples tim bilong Niu Ailan na ol bai i no larim ol ausait tim long kam stap long dispela sempionsip.


Dispela Niu Ailan Sofbal Fastpitsing sempionsip i bin stat long

1993 na i save pulim tim i kam long Pot Mosbi, Rabaul, Vanimo na Niu Ailan yet. Namba wan sempion long dispela sempionsip em Rabaul Malangan (man) na Mosbi Malangan (meri).

AB Bears i winim taitel bilong man na meri long Niu Ailan Sofbal Fastpitsing gem 1995 na sempion i holim taitel yet em Capes Sass (man) na Livitua (meri).

Knox i tok rejistresen fi bilong wan wan tim em K150. Ol klab i mas baim dispela mani long Novemba 30. Wanem ol tim i salim fi i kam bihain long Novemba 30 bai baim K200 olgeta.

Em i tok wanem ol tim i laik givim nem i mas ringim em long 3244407 o ringim Otto Malatana long Kavieng long dispela namba 984 2489.



Presiden bilong PNG Bowling Asosiesen Fansy Fagan i slekim bol long PNG Mixed Triple sempionsip i kamap long Goroka las wiken.

# Wantok stapim win bilong Norths

### POM WIMENS SOFBAL RIPOT

SHELL Wantok i soim tru stail we i save givim ol biknem long autim Norths 3-1 long Pot Mosbi wimens sofbal kompetisen.

Norths i save win i kam na Wantok i namba wan tim long winim ol. Dispela em i namba wan lus bilong ol meri Norths.

Norths i lus orait AB Bears tasol i kamap olsem tim i no lusim yet

wanpela gem bilong ol ya.

Tupela nupela pilaia bilong Wantoks Andrewlar Moe na susa bilong em Mathilda i go pas long dispela gutpela win bilong tim.

Pitsa bilong Wantok Pauline Wakit i soim olsem strong bilong em i no pinis taim em i givim hat taim long ol biknem beta bilong Norths olsem Freda

Sam, Kilala Ronnie na Elizabeth Marsipal. long paitim bal.

Pitsa bilong Norths Fenella Sam tu i pits gut tru long givim hat taim long beta bilong Wantok.

Andrewlar Moe i brukim kiau long namba faiv ining bihain long Ensie Tovia i paitim wanpela gutpela bal long kam hom.

Insait long namba siks ining, Mathilda Moe i kamapim gutpela stail

long bet na bringim susa bilong em na Philemona Marut long kam hom na go pas wantaim skoa 3-0.

Norths i no giv ap na ol i pilai gut tru na Robertha Kaul i kam hom na soka i sanap 3-0.

Insait long ol arapela A gret gem, AB Bears i winim All Stars 4-1, Mazda wilwilim stret Chebu 14-0 na Gazelle rausim trausis bilong Malangan 7-0.

## Ol sofbal opisel risain

### GOROKA SOFBAL RIPOT

OLGETA opisel bilong Goroka Sofbal Asosiesen i risain bihain long ol i stap long opis tripela wik tasol.

Insait long namba wan jenerel miting las wik presiden Henry Pakpak Vainak, namba tu presiden Oddie Kaminiel, sekretari Jenny Susuve na tresera Grace Nandi i mekim ol deliget guria taim ol i risan. Em i min olsem ol komiti ol eksekutiv makim bai i nogat pawa

ya. Ol komiti em Joe Lumaris, Oddie Kaminiel sief skora na asisten sekretari Wally Ainui.

Ol eksekutiv i risain bihainim wanpela kot pepa we wanpela wimens sofbal i kisim egensim asosiesen. Sapos asosiesen i go het wantaim kompetisen em bai brukim lo bilong kot.

I luk olsem olupela eksekutiv em Emmanuel Tokom bai kambek long mekim wok bilong ol olsem eksekutiv gen.

## Elcom givim blek-aut long Grass Hoppers

ELCOM PAWA i yusim olgeta riserv bilong daunim pawa bilong Grass Hoppers bilong Hohola long kamap king bilong NCD mens volibal kompetisen long dispela yia. Elcom win 3-2.

Insait long arapela riserv gret, Scorpions i wilwilim stret Raukele Dolphins 3-0 long wansait gem.

Gem namel long Elcom na Hoppers i dro 2-2 na i gat sans long wanem ol tim i ken win ya.

Elcom lus long Hoppers long 1997, na dispela win long Sande i bekim dinau tasol. Ol pawaman i stat long kisim poin long stat bilong wisel taim Puksie Tore na Alex Bobola i givim strongpela spaik long Hoppers.

Kepten Vela Ralewa i wok long lukautim gut ensin rum na setim dispela tupela biknem pilaia ya.

Tasol ol Hoppers i no larim ol i spaik. Ol bloka bilong Hoppers olsem Terry Kupa, Benny Ume, Titus David na Elias Maliaki i putim strong salens long ol spaika bilong Elcom.

Elcom i winim namba wan set 26-14.

Hoppers i bekim long winim namba tu set. Ol i pilaia olsem Puksie Tore, Tom Tore na Vani Igo i wok ovataim long blokim David, Ume na Albert John. Hoppers i winim dispela set 25-18.

Namba tri set i stap likli taim bihain long Elcom pawa i blekaut. Ol boi Elcom i paul yet watpo na pawa tru i dai, na Hoppers i yusim dispela liklik hat taim long winim namba tri set 25-15.

Elcom pilai strong long namba foa set. Ol i minim bisnis stret long winim dispela gem 25-19.

Presia i wok long kamap nau long tupela tim. Ol sapota tu i bikmaus na sapotim tim bilong ol na dispela i mekim tupela tim wantaim i paul olgeta.

Elcom i wok long pilai gut tru. Ol i no wari long ol sapota i bagarapim ol o sapotim ol. Ol i pilai i go na winim las set 15-6. Kepten bilong Elcom Ralewa i tok amamas i go long ol pilaia bilong em.

Bikpela tenk yu i go long Avoa na Bobola long eksperien bilong ol, na tu Puksie long kamapim gutpela gem tru.

"Olgeta pilaia long tim i amamas na i gutpela long winim dispela taitel ya," Ralewa i tokaut.

Kepten bilong Hoppers Albert John i tok amamas long ol boi bilong em long pilai long sisen i kam inap long fainel.

"Mipela yet i mekim asua long las set olsem na ol i win. Bikpela amamas i go long ol pilaia olsem Terry Kupa na Titus David long kamapim gutpela gem stret ya," John i tok.

Na insait long gem bilong ol meri, API PTC i winim Raukele Dolphins long win 3-1 long NCD wimens volibal gren fainel.

Em i gutpela gem stret we ol biknem pilaia olsem Dorothy Kivung, Gloria Maro, Alice Ito na Piti Johang i salensim ol pilai olsem Hazle Vovote, Jean Kairi na Martha Awadu.

Namba wan set i strongpela stret tasol Kivung na Ito i isi tru long spaikim bal na brukim blok bilong Raukele. PTC i winim namba wan set 25-23.

Ol pilaia bilong Raukele Martha Dick na Lucy Au i wok ovataim stret yet long setim bal bilong Kila Vagi, Kairi na Vovote. Tasol ol PTC i strong tru na winim namba tu set gem 25-22.

Long namba tri set Raukele i kamapim gutpela pilai stret long winim dispela gem 25-19.

Tasol long namba foa, PTC i pasim ai tasol na mekim save stret long ol meri Hula na winim long sem skoa 25-19.



Bikmeri ya i tromoi bal ya long resis bilong PNG Mixed Triple sempionsip long Goroka las wiken. Photo HENRY MORABANG

## Pitsa Murat helpim MSC long dro

### POT MOSBI MENS SOFBAL RIPOT

PITSA bilong MSC i soim olsem em tu i ken stapim ol pilaia long paitim bal taim em i helpim tim bilong em long dro wantaim Brown Eagles 5-5 long Pot Mosbi mens sofbal kompetisen.

Em i wok bung gut tru wantaim ketsa bilong em Thomas Remi

MSC i go pas wantaim skoa 4-0 long namba foa ining bihain na Brown Eagles i kam rekotim ol skoa long namba faiv ining.

Em i no pits gut tasol nogat em yet i kam hom na helpim tim wantaim tupela ran bilong em. Ol lain pilaia husat i kam hom long namba

wan ining em Philip Samuel, Peter Benson na Thomas Meta long helpim MSC long go pas wantaim skoa 5-1. Ol Brown Eagles em Penias Puka i skorim dispela ran long namba tri ining.

Long dispela ining nau, Brown Eagles tu i kirapim stret paia bilong ol. Ol i stat long rekotim ol skoa long dispela ining we i kam long Ekonia Pagal, Thomas Bunbun, Chris Timi, Damin Wartovo na Robert Okole.

Thomas Bunbun nau i pitsa bihain long olupela pitsa Esau Vinarang i pits wantaim nupela klab, Burma Raiders. Insait long arapela ol A gret gem; Gazelle winim Malangan 4-0

Insait long dispela gem, Harry Mathew i paitim wanpela hom ran na bringim em yet wantaim ol tupela pilaia Henry Meli na Paskalis Pinia.

Bernard Pamel i rekotim arapela ran bilong Gazelle long bringim skoa 4.

FAI Manalos i wok long win yet taim ol i autim Taubmans Tigers 5-1. Dick Bart Jnr, Paul Bogan, Danny Mong, Edwin Mila na Jerry Albert i rekotim dispela win. Albert Gabore i skoa long sait bilong Tigers.

Alert Elcom i wilwilim Dolphins 11-0, Hawks autim Taubar 6-3 na AB Bears i nekim Burnah Raiders 11-4.

## Hevi long Is Timor

Australia sanap long  
gutpela sindaun  
long Is Timor

RAUN bilong Australia Prait Minista John Howard i kam long Papua Nugini i no longtaim i go pinis i bin givim Mista Howard sans long tok-save long wanem samting Australia i mekim long Is Timor na wok poroman wantaim Indonesia, Australia Hai Komisina long PNG Nick Warner i tokaut.

Long stat yet, mi laik toksave olsem gavman bilong Australia i bilip olsem nesanel interes bilong em bai kamap strong sapos Indonesia i stap bung wantaim wanpela strongpela ris kantri na gutpela strongpela wok poroman namel long Australia na Indonesia, Mista Warner i tok.

Australia i rispektim tru dispela pasin poroman wantaim Indonesia. I tru, ol pasin em i mekim, olsem Piskipin fos (ol ami) long Is Timor, Australia i wokim bihainim orait bilong Indonesia gavman, em i tok.

Mista Warner i tok em i bikpela samting tu long luksave olsem INTERFET (intanesenel ami grup) i wanpela trupela intanesenel grup, em ol Esia Pasifik rijen i givim helpim long en olsem Nu Silan, Pilifins, Singapo, Tailan, Amerika na mani yet i bin kam long Japan. Ol dispela kantri wantaim wari bilong Australia na rot em i bihainim, olgeta i save na luksave pinis long en na oraitim. Na long soim bel hevi long dispela trabel long Is Timor, 51 kantri i bin tok long miting bilong Yunaitet Nesen Sekyuriti Kaunsil na givim orait long risolusen bilong kirapim dispela Pis Kiping Fos. Tu miting i bin kisim orait bilong ol kantri long dispela risolusen kwik taim tru.

Mista Warner i tok wok bilong Pis Kiping Fos i helpim Indonesia long taim nogut i kamap long kantri bilong em. Dispela fos i gat ol save manmeri ol i bihainim stret lo karamapim dispela wok bilong ol long Is Timor. Wok bung namel long INTERFET na Indonesia i kamap gut tru. Em i tok Indonesia tu i helpim long wokim kwik sampela bikpela tingting olsem as bung long ol ami bilong go long Is Timor. Australia i ting olsem bai ino longpela taim na Pis Kiping Fos bai i go na Yunaitet Nesen Pis Kiping Fos bai kisim ples.

Mista Warner i tok em i laik toksave olsem Australia i nogat arapela hait tingting long dispela kempen long Is Timor. Astingting bilong mipela em long helpim ol pipel bilong Is Timor em ol i kamap birua na tu ol bagarap i kamap long Is Timor, long wanem mipela i laikim tru gutpela sindaun bilong ol pipel long dispela rijen long bihain. Tingting bilong Australia em long kamapim gutpela sindaun long bihain, Mista Warner i tok.

Is Timor lida tokim ol pipel  
long lusim sin bilong ol birua

LIDA bilong Is Timor Xanana Gusmao i tokim ol lain bilong em long lusin sin bilong ol birua bilong ol long dispela wik.


Dispela rot tasol bai Is Timor i kamap wanpela gutpela kantri tru insait long wol, em i tok.

Moa long 10,000 manmeri i bin kalap na danis na tromoi han i go antap long biktaun bilong ol long Dili long soim amamas bilong ol.

Mista Gusmao i bin kamaut long opis bilong Gavana wantaim tupela han bilong em i go antap na tokaut, "ol man na meri, susa na brata, tude yumi amamas tasol yumi wari tu," em i tok. "Planti strongpela Is Timor manmeri i dai pinis, ol pren na famili bilong yumi. Yumi no ken lusim tingting long ol."

Taim em i wok long toktok long ol manmeri, ai wara bilong em i pundaun kam daun long waitpela mausgras bilong em. Ol pipel i kra wantaim em. "Tasol yupela i sanap strong," em singaut strong taim ol ami bilong Australia i sanap sait long em wantaim ol masin gan.

Taim Mista Gusmao i wok long toktok long ol manmeri, ol Australia ami antap



• Is Timor lida Xanana Gusmao.

long het bilong opis ya i wok long testim masin bilong ol long traim lukim nogut bai i gat sampela birua lain i giaman hait namel long ol manmeri long kamapim birua long Gusmao.

Ol Australia ami i bin hait tasol na kisim Gusmao i kam long Is Timor long Fonde nait bai em i ken toktok long ol pipel bilong em.

"Maski yumi bungim hevi, yumi mas kirap na wokim nupela Is Timor pipel na kantri," Mista Gusmao i tok. "Yumi mas mekim plen long sindaun bilong Is Timor long bihain na soim olsem Is Timor em naispela kantri. Yumi win pinis. Yumi independen nau."

"Viva Timor," ol manmeri i singaut. "Viva Xanana Gusmao... Presiden Xanana."

Intefet Komanda Maja Jenerel Peter Cosgrove na Mista Gusmao i tokaut olsem ol bai traim long stapim ol Falintil gorila husat i wok long hait yet long ol maunten na traim tu long toktok gut wantaim ol sait Indonesia ami long pinisim ol hevi long hap.

"Mi wanbel long em olsem wanpela lida," Jenerel Cosgrove i tok.

"Mi ting em i gat save long wok bilong militeri (ami) na politiks. Mi ting em bikman bilong kantri," Jenerel Cosgrove i autim tingting bilong em long Xanana Gusmao.

## Ol Is Timor manmeri stat long go bek long asples

BIKPELA sip i pulap long ol manmeri bilong Is Timor husat i bin ronawe long pait na birua long las mun i kam bek gen long kantri bilong ol las wik. Long las wik yet, ka i pulap long ol manmeri we Yunaitet Nesen ami grup i traim long kisim ol manmeri i go bek long Is Timor. Tasol long boda bilong Wes Timor we Indonesia ami i stap, ol i traim long stapim ol ka long i no ken brukim boda bilong Wes Timor i go long Is Timor.

Ol lain i bin go long sip i go isi tru na kamap gut long Is Timor-we Yunaitet Nesen Hai Komisina bilong Refiuji Jacques Franquin i bungim ol.

Long dispela taim tu ol ami

bilong Intanesenel Fos (ovasis ami) long Is Timor i karimaut wok bilong ol na holim 40 birua lain o gorila grup bilong Is Timor yet husat i bin egensim Independens bilong kantri.

Ol dispela ovasis ami i bin go insait long wanpela taun ol i kolim Ambeno long 5 kilok moning na kisim ol sotgan, naip na bainat long han bilong dispela 40 birua lain ya, Meja Jenerel Peter Cosgrove i tok.

Nau ol ovasis ami i lukautim ol bikpela eria we ol Is Timor i ken stap long en na mekim disisen long ron bilong kantri bilong ol. Dispela operesen bilong ol ovasis ami i kisim olsem wanpela mun long winim bek ol dispela hap we birua

bilong ol gorila lain i strong long en, Jenerel Cosgrove i tok.

Ol ovasis ami i bin go insait long wanpela eria ol i kolim Lambelu long Wes Timor we ripot i kamap olsem ol birua lain i bin kilim 70 Is Timor manmeri.

Wanpela lapun i tok ol pret na hait bikos ol i pret long raitim nem bilong ol long soim olsem ol i laik go bek long asples bilong ol long Is Timor. Ol i pret bai ol birua lain (gorila) i lukim nem bilong ol na kilim ol o bagarapim ol meri bilong ol.

Ripot i tok planti tausen manmeri bilong Is Timor mak olsem 370,000 i bin ronawe nabaut

na go kamap long Wes Timor. Ol i brukim boda na go long nait. Sampela i ronawe nabaut i go tu long ol arapela hap bilong Indonesia taim pait i kamap long Ogas 30 long tok-tok bilong kisim independens bilong kantri, Is Timor.

Yuniatet Nesen ripot i tok klostu mak olsem 60,000 ronawe i go long Kupang, wanpela taun. Na 5500 i wok long go bek long asples bilong ol long las mun i kam.

Long las wik planti manmeri wantaim pikinini na liklik bebi i kam bek long Dili biktaun bilong ol long bikpela sip Lambelu we ol ovasis ami i go kisim ol i kam bek.

## Ripot long dai bilong ami pailot i kamap gen

DAI bilong wanpela ami pailot long 1986 long taim bilong trening i kamapim narapela ripot olsem i luk olsem sampela balus i bin sut long gan long dispela de bilong trening. Dispela pailot opisa em Craig Mackelmann krismas bilong em 22.

Ripot bilong wanpela ami pailot we i tok em i bin sut long sotgan long dispela taim tasol em i no bin sutim wanpela balus i no kamap gut. Bikos arapela ripot i no go wankain olsem stori bilong em.

Long dispela trening, tripela ami balus i bin ron bihain long wanpela balus we i pulim wanpela mak we ol dispela tripela balus i mas sutim.

Papa bilong dispela dai ami pailot Mista, Grahame Mackelmann husat tu em wanpela pailot bilong balus i wok long mekim kemon long 13 krismas olgeta long painimaut wanem samting tru i kamapim dai bilong pikinini man bilong em long balus ya.

Bikman ya i bilip olsem narapela balus i mas sutim pikinini bilong em o narapela balus i mas ron klostu tru long balus bilong pikinini bilong em we win i pusim balus bilong pikinini bilong em i go pundaun o sampela paul i kamap long balus long dispela



• Ami pailot husat i bin dai Craig Mackelmann.

taim we i kamapim dai long pikinini man bilong em.

Ombudsmen ripot i bin tokaut olsem lukluk long olgeta ripot na evidens, i nogat narapela balus i bin ron wantaim Craig Mackelmann i no bin sut long gan. Ombudsmen ripot i bilip nogat kain samting olsem i kamap.


Tasol long mun Me dispela yia, Edministretiv Apil Traibunel i givim oda long RAAF i kamapim wanpela lukluk gen long ol kamera bilong balus long dispela taim bilong trening long 1986. Bikos ol kamera long

balus i save wok hariap tasol taim ol sotgan bilong balus i paia.

Narapela ami pailot husat tu i bin ron long balus long dispela trening wantaim Craig Mackelmann i tokaut long dispela nupela ripot olsem em i bin sut long sotgan long sutim dispela mak narapela balus i pulim i go long fran. Tasol em i no sutim wanpela balus. Long dispela taim tripela balus wantaim, balus bilong man i dai ya na narapela tupela ami balus i ron long sait sait na sut long wanpela mak narapela balus i pulim i go long fran.

Narapela ami pailot ya em Tracey McCormick na em i tok tru ol i sut long dispela taget. Na sapos i gat kamera long balus we i kisim piksa long ol sut bilong sotgan, bai i ken soim stret olsem olgeta sut i kisim dispela mak o taget long fran na i no narapela balus nabaut.

Ripot bilong dispela pailot i kisim planti tingting na wok pairimaut nau long sekim ol masin bilong balus bilong em na ol kamera bilong balus long sekim gut ol sut bilong sotgan i go olsem wanem long dispela taim ol tripela pailot ya i bin mekim trening long 1986.



• Meri ami ya i helpim ol Is Timor refiuji i kam daun long sip.

Hevi long Is Timor

# Laip long Dili i kamap isi

Isi isi ol pipel i wok long go bek long Dili, biktaun bilong Is Timor. Maski ples i bagarap, ol haus i paia, ol pipel i wok long go bek na go hetim sindaun bilong ol long dispela taun we ol bin kolim ples bilong ol taim independens vot long Is Timor i kamap long Ogas 30 bikpela pait i kamap na bagarapim ples na ol pipel tu. Na insait long hevi, ol soldia bilong Indonesia na ol militia lain i bin kukim ples.

Ol pipel i wok long kamapim ol tent haus na kem long stap long ol.

Ol lain husat i wok long go bek sindaun long Dili i tok maski sapos i nogat gutpela haus bilong stap long en, mipela i amamas long kam stap klostu long ples bilong mipela. Bai mipela i fiksिम.

## UN bai salim faivpela man long mekim wok painim aut

Yunaitet Nesen Humen raits Komisin bai salim faivpela man grup i go long Is Timor long mekim ol wok painimaut long ol-bagarap na dai we ol militia na ami bilong Indonesia i kamapim long ol Is Timor pipel bihainim Ogas 30 independen vot.



• Ol soldia bilong Australia i pundaun long Maliana. Piksa i kam long Weekend Australian niuspepa

Long ol ripot, Komisina bilong UNHRC Mary Robinson i tok grup bilong em i promis long wok bung gut wantaim Indonesia. I kam inap nau, Indonesia i no laikim inkwairi i kamap long ol ripot bilong bagarap na dai we i sut long ami bilong em. Em (Indonesia) i laikim nesenel humen raits grup bilong em tasol i karimaut ol wok we i sut long dispela samting.

Sonia Picado, wanpela loya na memba bilong Lejisletiv Asembli bilong kanti Costa Rica long Saut Amerika i go pas long dispela grup. Sief Jastis bilong yumi long PNG Jastis Mari Kapi i wanpela long dispela humen raits grup husat bai karimaut ol wok painim long ol bagarap long Is Timor. Ol

narapela lain long grup em long A M Ahmadi husat i bin holim wok olsem foma sif jastis long India, Sabine Leutheusser Schnarrenberger, wanpela loya bilong Gemeni na Judith Sefi-Atah wanpela loya bilong Ghana, Africa.

Bos bilong ol ami long Indonesia Jenerel Wiranto i tok em no amamas long dispela enkwairi grup bikos i nogat rekot long ol ami bilong em i kilim dai nating ol man.

Em i tok ol sodia bilong em em i no wokim dispela pasin. Na em i sutim tok long UN na ol rilif ejensi lain na UN long wokim ol ripot nogut long bagarapim ol soldia bilong em.

## Tripela moa soldia i dai

Bikpela pait i bin kamap long las Sarere namel long ol Intenesel Pis Kipas (Interfet) na ol militia long Is Timor we tripela paitman i bin dai long en na tripela moa i kisim bagarap, ol ripot long Dili i tok. Nogat memba bilong Interfet i dai o kisim bagarap long dispela pait.

Ol ripot i tok hevi i bin kamap long marko, wanpela boda ples

we i stap 15 kilomita longwe long boda bilong Is na wes Timor we ol Interfet i lukautim. Kenel mark kelly bilong Austraila husat i go pas long grup i tok samting olsem 20 militia i bin go kirapim pait long samting olsem sikipela Interfet husat i bin kem i stap.

Ol ripot i tok pait namel long tupela grup i bin kisim samting olsem 60-90 minit.

Ol ripot i tok long kain stail bilong pait bilong ol, i luk olsem ol militia i wok long kisim trening na ol i save gut long pait.

## Stori long musik laip bilong Slim Dusty

Slim Dusty na meri bilong em Joy McKean i patna long sait bilong musik we ol i bin stat long singsing 45 yias i go pinis. Na ol i go het yet.

"Mi na misis bilong mi Joy i bin stat wokabout long rot bilong singsing 45 krismas i go pinis. Na mipela i no save stop. Mipela i nogat tingting tu long stop.

"Sampela taim mi save les liklik, tasol bikpela samting em mi save amamas long wok bilong mi olsem musikman na mi go het yet. Ol pipel i gutpela na mi no inap long lusim tingting long trupela piksa bilong Australia," Slim Dusty i tok.

Dispela gutpela pren pasin namel long trupela pipel na laip long asples Australia i lukim Slim Dusty i kamap na stap olsem wanpela long ol namba wan top musikman long Australia moa long 50 krismas.

"Mipela bai autim namba 99 rekot albam long namel bilong neks yia na bihain long en, rekot namba 100 bai kamap," Slim Dusty i tok.

Slim Dusty i no wanpela manki nating, nogat ya. Stat yet long taim em i gat 10-pela krismas, em i raitim namba wan singsing bilong em na kirapim wok olsem wanpela musikman. Long dispela taim em i raitim namba wan singsing bilong em, em bin ringim David Gordon KirkPatrick long fam bilong em long Nulla Nulla klostu long Kempsey. Dispela em long 1937 na nem bilong singsing em long "The Way the Cowboy Dies." Wanpela yia bihain lon dispela, em i autim namba wan rekoting singsing bilong en em long "Song for Aussie and my Final Song." Tasol

samting i no go olsem dispela singsing ya i tok long en.

Long 1945, em bin raitim biknem kantri singsing we i kamap strong long tude yet. Dispela em long "When the Rain Tumbles Down in July." Wanpela yia bihain em bin sainim namba wan rekoting kontraktwantaim Regal Zonophone kampani na em bin kamapim sikipela singsing taitel long en.

Bihain long dispela, laip long Australia i bin hat tasol Slim Dusty i no wanpela man we ol hevi i save daunim em, nogat ya. Maski long 1952 Slim Dusty i bin maritim musik meri Joy MaKena na wanpela yia bihain namba wan pikinini bilong ol Joy i bin kamap, Slim Dusty i no slek.

Long yia 1953, em i fomim singsing grup bilong em yet na kolim long Slim Dusty so. Na ol i save raun long ol so graun long kantri long putim aut so na ol singsing bilong ol. Long dispela tam ya em i bin gat tent so bilong em yet.

Tasol long 1957 wol bilong em i senis. Dispela em taim em i rekoitim singsing em i kolim long "Pub With no Beer." Singsing ya i kisim gut tingting bilong ol lisna na pipel bilong Austraila na Nu Silan.

"Mi no inap giamanim ol odiens bilong mi tasol mi no lukim narapela rot long tasol we mi bihainim em yu mas i gat bilip long samting yu singsing long en, Slim Dusty i tok.

Dispela bilip i strongim em long wok bilong em na tu karim em long faivpela dekat (50 krismas) long musik karia bilong em. Na em i peintim trupela piksa bilong

Australia na ol pipel bilong Australia we i no planti man bilong raitim histri bilong Austraila i ken mekim.

Sampela awod em i winim long musik bilong em em long MBE, Atis of The Deced, Asivmen ov the Yia, Siaman bilong Kantri Musik Asosiesen ov Australia na 29 Golden Gita Awod. Em i raitim tupela laipstori bilong em, kisim invait olsem ges long bikpela Kantri na Westen musik festival ol i kolim long Gren Ol Opry long Nashville, Tennessee, kisim OA, kamap memba long Aria Hal ov Fame na long las yia, Nesenel tras i bin makim em long stap insait long 100 Living Nesenel Tresa bilong Australia.

Wanpela awod we nogat man bai rausim long Slim Dusty em, wanpela gol 78 rpm rekot, em wanpela rekot long dispela kain i stap long Australia.

Komonwel Gavman i givim awod bilong luksave long ol sinia Australia pipel long dispela yia tasol ol sinia Australia i kisim narapela luksave awod gen long gavman bilong ol.

Dispela awod i luksave long ol sinia manmeri long Australia husat i wokim gutpela na bikpela kontribusen i go long ol lokol komuiniti na kantri. Ol wan wan memba bilong palamen long Australia i wok long holim ol selebresen long makim ol luksave long dispela samting. Tasol long namel bilong neks mun, Novemba, bai i gat bikpela selebresen long luksave long ol sinia sitisen na dispela bai kamap long nesenel level.



• Stail bilong em baga man wantaim gita na hat bilong em biknem kantri na westen musikman bilong Australia, Slim Dusty. Bai yu luksave long dispela man long stail hat na gita bilong em. Piksa i kam long Australian niuspepa

M em bilong Slim Dusty em planti pipel long PNG i save gut long en, bihainim ol gutpela singsing bilong em we i save kamap strong tru namel long yia 1960 naleit 1970s. Sampela ol singsing bilong em we ol redio stesen insait long PNG i save pairapim na ol man i save laikim tumas em long "The Pub With No Beer", "When The Rain Tumbled Down In July" na ol planti arapela gutpela Kantri na Westen singsing moa we i autim stori bilong ol pipel na kain sindaun long kantri sait bilong Australia.

Long las mun, Slim Dusty i bin kisim awod olsem Komonwel Gavman Sinia Australian ov the Yia. Dispela em bihain long Gavman bilong Australia i luksave long bikpela kontribusen em i mekim long kantri long musik bilong em. Dusty i winim planti musik awod pinis. Wanpela long ol em Australia's 100 Living Nesenel Tresas. Na nau awod em i kisim em long Komonwel Gavman Sinia Australian ov The Year.

Praim Minista John Howard i bin prisenim awod ya long Septemba 30 insait long wanpela seremoni we ol bin holim long Kenbera Rydges Hotel. Ol arapela bikman long kantri i bin kisim ol awod bilong ol tu long dispela taim long luksave long dispela yia olsem "Intenesel Yia bilong ol Olda Pipel".

Slim Dusty i amamas long kisim awod na luksave we gavman i givim em. Long wankain taim em i kisim awod olsem top long ol sinia sitisen awod, em i no pilim olsem em i wok long go lapun, nogat. Na em no tingting long malolo yet long singsing.

# LAI PSTAIL



• Memba Wenge i traime nupela bres.

## Hevi bilong rot na bres i bikpela long kantri

### FRANCO NEBAS i raitim

HEVI bilong bres o rot i go long ol ples long Papua Niugini em bikpela samting stret nau long olgeta hap bilong kantri. Dispela long wanem ol ples bilong yumi i stap insait tru long bik bus we yu mas brukim planti bikpela wara, maunten na bus bipo yumi kamap long ples.

Long dispela as, planti pipel bilong yumi long ol ples ino save kisim ol kain sevis olsem helt, edukasen na ol arapela gavman sevis.

Tasol long wanwan hap tasol i save gat sans long kisim ol dispela kain sevis olsem long bres, skul, hausik o rot i kamap long ples. Sampela bilong dispela sevis i save kam long ol ovasis dona olsem AusAid bilong Australia na ol arapela NGO grup tu long arapela ovasis kantri.

Kistuen bres em wanpela long ol projek we halivim i kam long ovasis dona i lukim dispela waia bres i sanap. Kistuen fut bres em i stap long Boana distrik long Morobe Provins na i krosim kistuen wara samting olsem hap kilomita long Kasanombe stesin ples balus.

Dispela wara strong bilong em i moa bikpela we planti taim i go pinis ol pipel long dispela hap ol ples i save kisim hevi long brukim. Planti laif i bin lus pinis long taim bilong ol tumbuna i kam inap nau we dispela bres i sanap.

Memba bilong Nawae Mista Kennedy Wenge i bin gat bikpela wari long ol pipel bilong em long dispela hap ples taim em i kisim pawa olsem lida bilong ol. Em i traime hat pait long kamap bres inap ol AusAid i kam insait na sanapim bres.

Long namba 26 de bilong mun Sektemba, long dispela yia, ol



- Antap: Ol lida kisim presen long pipel long ples.
- Raitim: Memba bilong Nawae Kennedy Wenge wantaim ol skul pikinini long Kistuen Bres Kasanombe.

pipel bilong Kasanombe na Kistuen i lukim nupela fut bres bilong ol i op. Bres i op i lukim planti lain i wari na amamas wantaim long wanem em nambawan taim ol i lukim strongpela waia bres i kamap long ples we ol ino inap moa long brukim wara olsem bipo long taim bilong tumbuna.

Long histori bilong dispela wara i tok em i bin karim pinis planti manmeri na pikinini long taim bilong ol tumbuna i kam inap nau bres i sanap. Dispela nupela bres em longpela bilong em olsem 30 mita na daun bilong em inap 60 mita.

Long taim bilong bres i op, bikpela kaikai na singsing i bin kamap na tu ol yut grup i amamas paitim geta long dispela bikpela de. Ol pipel long ples i amamas tru we ol i paitim kundu na singsing maski liklik ren bilong maunten i pundaun na



kol i kisim ol ges, kundu paraip mekim olgeta kol i ronowe nabaut.

Dispela bres i stap namel long tupela bikpela maunten we long go ples bres i stap bai yu wokabaut hap hua long Kasanombe stesin ples balus i go daun. Ol pipel long dispela hap save wokabaut tu de long kamap long ples rot i stap long kisim kar i go daun long Lae.

Long go long dispela hap bai yu flai long balus o helikopta tasol save pinis hevi bilong mani i mekim ol pipel i kisim bikpela hevi we wanpela rot tasol long go long taun na baim ol samting olsem sol, suga o sop em yu mas wokabaut yet.

Op bilong dispela bres tu i lukim rot i op long ol pipel long ples long go kam long arapela ples istap long hap sait na tu em wanpela rot ol i bai usim long go long Lae.

Long dispela hap tu em ples bilong kaikai olsem raun kabis, swit patotoe, na planti ol fruits olsem suga pruit, banana na kukumba.

Yu go long dispela ples bai yu no inap lus long kaikai ya, long wanem taim bilong mipela long go bek long Lae, helikopta i pulap wantaim ol kaikai na kepten i rausim sampela bilum kaikai bilong mipela go daun. Dispela de em ol lain long ples i

amamas we singsing i buruk i go i nap long narapela de.

Memba bilong Nawae Mista Kennedy Wenge, Minista bilong Woks Mao Zeming,

Minista bilong Provinsel na lokol levul gavman Andrew Kumbakor na Minista bilong Lens na pysical plening Dr Fabian Pok i bin kamap tu long witnesim dispela seromoni.

Minista bilong Provinsel na Lokol Levul Gavman Mista Andrew Kumbakor i bin opiseli opim dispela bres.

Mista Kumbakor i tokim ol pipel olsem planti yia i go pinis na ol pipel bilong yumi long ol ples ino kisim ol kain sevis olsem. Em i tok, "dispela bres em i soim tru lida bilong yupela i tingting long ol pipel na i mekim wok komitmen bilong em helpim long sanapim dispela bres.

Dispela bres ino bilong mipela ol lida o memba bilong yupela, nogat em bilong yupela ol pipel. Long dispela as yupela mas lukautim gut dispela bres long wanem yupela em laki ples kain projek i kam long ovasis dona i kam long yupela we ol arapela ples long Kantri ino kisim kain projek olsem."

Kistuen bres em ol lain long Opis bilong Lokol Gavman Teknikol Sevis husat i wanpela divisen bilong Dipatmen bilong Woks i go pas long givim tingting long kamapim dispela bres. Cardno na Davies Intanesenol Pty Ltd i mekim pepa wok long kisim fanding na ananit long PNG-AusAid progrem long stretim bres na mekim nupela i tok orait long fanding.

Lokol Gavman Teknikol Sevis opisas long Madang i bin go pas long karim wok stadi long sanapim dispela we ol i salim ripot i go long AusAid long kamapim mani.

Kos bilong dispela projek i olsem, K78,340 olgeta.

Memba bilong Nawae Kennedy Wenge i bin givim K10,000 tu long helpim dispela projek.

# Ol papamam bai het pen taim Yunivesiti i pas

JOE KANEKANE i ratim

**7**AIM mi stap long seken yia bilong mi long Yunivesiti ov Papua Niugini ol sumatin lida bilong mipela i askim mipela long holim wanpela protes mas na tu long lusim skul long wanem ol memba bilong palamen i apim pei bilong ol.

Long dispela taim ol sumatin lida bilong mipela i tok olsem sapos mipela i no sanap na egensim dispela pasin bai ol memba i go het long dispela pasin na tu ol bai mekim moa pasin olsem.

Wei bilong toktok we ol sumatin lida i givim long mipela i kirapim tingting na mipela i pasim ai tasol na bihainim toktok bilong ol.

Tru, dispela pasin bilong mipela i soim ol memba long palamen olsem mipela egensim tingting bilong ol, tasol mipela wok long bagarapim skul bilong mipela.

Long wanem mipela i lusim planti taim long straik na mipela i no harim toktok bilong ol tisa olsem ol bai pasim skul.

Mipela i bin tingting olsem ol i wok long traime bel bilong mipela long go bek long skul olsem na mipela i no bisi long wanem kain toktok bilong ol.

Planti taim Vais Sensela long dispela taim Joseph Sukianomb i wok long askim mipela long go bek long klas tasol mipela i sanap strong tru olsem mipela no inap go long skul inap long taim ol memba i daunim dispela pei bilong ol.


Wanpela taim, mipela i harim tok win olsem sapos mipela i no go bek long skul bai ol i pasim skul.

Mipela i ting olsem dispela em tok win tasol, long wanem long rekot bilong Yunivesiti i nogat wanpela taim we ol i bin pasim Yunivesiti na mipela i ting olsem ol bai no inap pasim.

Long mun Julai, 1991, Yunivesiti Kansol long wanpela emejensi miting bilong ol i wokim wanpela disisen olsem Yunivesiti i mas pas long wanem mipela i lusim skul longpela taim nau.

Man, mipela olgeta i kirap nogot olgeta. Wanpela wik i go pinis mipela kamap strong olgeta olsem nogat wanpela samting bai kamap long mipela, na taim mipela kisim nius, mipela nogat toktok.

Bai mipela wokim wanem nau? Yunivesiti i pas nau. Yunivesiti kansol i tok ol no inap senisim tingting bilong ol, skul i mas pas.



• Olpela UPNGVC, Joseph Sukwanomb i toktok long ol sumatin long go bek long skul.

Yunivesiti kirap nau, givim mipela tupela wik long pek ap na go long ples. Man, mipela ol lain i wok long bihainim ol sumatin lida i kisim taim stret.

Mipela ting olsem ol gat aidia long wanem ol rot ol bai karim mipela i go, tasol taim mipela i kisim dispela nius olgeta toktok bilong mipela i pinis.

Wan bai wan mipela karim ol kago bilong mipela na painim wanem rot mipela i ken long stap long siti.

Sampela bilong mipela i nogat wantok long siti olsem na mipela wok long silip long wanpela haus i go long narapela.

Ol kampani i no kisim olgeta sumatin long wok, sampela ol sumatin i gat ol wantok i laki long wanem ol i halivim ol.

Mipela sampela i kisim taim stret. Bipo taim mipela stap long han bilong gavman mipela i save lap long wanem gavman i save givim mipela poket alawens tasol nau nogat wanpela toea long poket bilong mipela. Sampela ol sumatin i kisim tiket bilong ol na go stret long ples.

Sampela bilong mipela i raun nating long Boroko, taun na Waigani opis olgeta dei, sapos sampela wantok bai sore long mipela o nogat. Sampela taim ol sore na givim sampela bas fea na baim lans, sampela taim ol i

no bisi long mipela. Long dispela taim olgeta sumatin i save pulap tru long Hos res kampani, long wanem dispela tasol em wanpela rot bilong ol long kisim mani.

Sampela bilong mipela kamap ol konman. Long dispela taim Yunivesiti long Papua Niugini i pulap long kainkain kon man. Long wanem sapos yu no kon yu no gat sans long kisim mani o kaikai.

## Hevi bilong ol papamama

**M**i bin pret long go long ples long wanem mi nogat wanpela as long tok klia long ol lapun olsem ol i pasim skul na mi mas stap long ples.

Mi wok long traime tingim olgeta eskus tasol nogat wanpela i gutpela long tokim ol.

Mi sore long ol papamama long wanem long save bilong ol, ol ting olsem mi wok long stadi na ol weit tasol long lukim mi kisim digri bilong mi, na taim skul pas mi pilim olsem bai mi putim moa hevi i go long ol.

Mi sem tu long lukim ol lain wanpisin bilong mi husat i salim mani, o wokim liklik prosek we ol kisim makmak na tingim mi.

Mi save tu olsem mama papa bai gat planti askim long mi, long wanem ol laik save bilong wanem na mi stap insait long straik na mi no laik tok nogat na egensim ol narapela sumatin.

Yu save, long Yunivesiti, yu wanpela man i no inap long wokim wanpela samting sapos olgeta sumatin i stap long wanpela sait.

Na tu, sampela ol sumatin husat i bin fiil i raun raun long skul na ol wok long patim ol sumatin i laik go long skul, olsem mi nogat wanpela sans long wokim wanpela samting.

Mi mekim disisen olsem mi bai no inap go bek long ples inap mi pinisim skul bilong mi.

Laki bilong mi long wanem, long skul bilong kamap niusman i gat sikspela mun we mipela i mas wok wantaim ol kampani na yunivesiti bai givim mak long kisim digri olsem na mi yusim dispela long painim wok.

Mi wok wantaim Ok Tedi kampani olsem wanpela pablik rilesen asisten, na laki tru mi go stap antap long Tabubil inap long 1992 taim skul i stat. Long wanem long Mosbi i nogat haus long slip.

## Ol arapela sumatin

**M**i no save long wanem samting i kamap long ol arapela sumatin tasol, dispela nius i kisim ol long taim nogut. Ol nogat wei long go. Narapela samting em ol meri sumatin i kisim bel na planti i karim pikinini long wanem, nogat wok na mipela i stap nating long Yuni.

Ol lain husat i go pas long ol kristen wok long skul i pundaun lusim bilip bilong ol.

Insait long tupela mun, ol sumatin i sanap strong tru namel long ol yet na i nogat wanpela samting inap long brukim dispela strongpela sapot bilong ol.

Sampela bilong ol sumatin i go na go long ples olgeta, inap nau ol i no kam bek na pinisim skul bilong ol.

Sampela bilong ol i go wok na stap olgeta. Long wanem taim ol i laik go bek ol tingting long femili bilong ol. Natu planti bilong ol i lain long holim mani na long go bek na kamap sumatin gen i no go gut wantaim ol.

Mi ken tok olsem dispela pasin i soim planti bilong mipela long noken pilai long skul. Planti tru i no inap long kam bek long skul long 1992 long wanem skul i pas namel long yia olsem na hat long ol i kam. Ol i wet inap 1993 long

namba tu hap bilong yia na ol i kam long skul.

## Ol sumatin lida

**M**i bin painim aut olsem ol sumatin lida i bin painim wok bihain long dispela straik na ol i wok i stap inap long taim ol i go bek long skul. Na tu ol i save long wanem rot ol bai go, tasol long sampela bilong mipela, mipela i kisim taim tru.

Wanem samting bai kamap long dispela ol sumatin em no gat man i save. Tasol luk olsem planti bilong ol bai kisim taim tru sapos ol i kam bek neks yia long wanem, ol i no save sapos Yunivesiti bai tok orait long ol long wanem.

Yunivesiti tu wok long statim tripela tem olsem na planti ol lain bai kisim traime long wanem nau skul bilong ol i stap long han bilong ol tisa.

Ol lain bilong mi i kisim bikpela taim olsem na mipela i kisim longpela taim long kisim pepa bilong mipela, tasol mi no save ol dispela lain nau bai wokim wanem samting.

Mi save olsem bai ol kisim bikpela taim, long wanem i gat kain kain hevi bai bungim ol long wanem mipela i bin wan kain olsem long taim mipela i stat.

Tude taim mi lukluk i go bek long dispela straik, mi no save tingting gut long wanem mi save paul sapos mipela i bin wokim gutpela pasin o nogat. Tru, tingting bilong mipela long egensim ol memba i gutpela tasol wanpela yia long laif bilong mipela i go nating. Mipela inap long wokim sampela bikpela samting long dispela tasol nau i luk olsem mipela i no inap wokim moa.


Tasol mi sore long ol papa mama long wanem ol i mas painim moa mani, long givim long ol pikinini bilong ol.

**FRI BAIBEL  
KOS  
LONG PAS**

I kam long wanpela pren long America sapos yu laikim fri kos salim nem na adres igo long:

**WOL BAIBEL SKUL  
WBS - PNG 12,  
P.O. Box 9346,  
Austin, TX 78766 USA.**

# Tewel meri tanim olsem liklik susa



paia i stap, bikpela susa tok taim tupela kukim kaikai na kaikai pinis, bai tupela i go painim abus long nait. Orait liklik susa i wanbel long tok bilong bikpela susa. Tupela kaikai pinis na liklik susa i pilim skin i tait liklik olsem na em i tok long slip liklik na kirap orait bai tupela i ken go.

Tasol wanpela tewel nogut bilong bus i sanap na harim dispela toktok pinis na em i painim rot bilong trikim bikpela susa. Taim bikpela susa i go arere liklik long paia, tewel ya i hariap tasol tanim kamap olsem liklik susa na bihainim bikpela susa i go long na tokim em, orait nau, mitupela i go long wara na painim abus long wara. Bikpela susa i no save na ting olsem em liklik susa tasol olsem na em i tok orait na tupela i go daun long wara.

Orait tupela i go kamap long wara na tupela laitim mambu na stat long painim abus i go kamap long hap we tupela wara i kam bung. Tasol taim meri tru i laik tanim lukluk, dispela tewel meri i wok long kaikai pis tupela i kisim na pulapim tasol ol het bilong pis i go bek long bilum. Olsem na em i kisim tingting pinis olsem dispela em tewel meri.

Orait em tingim wanpela plen nau na em tokim tewel meri ya, yu painim abus bihainim dispela wara i go kamap long het bilong em na mi tu bai mekim olsem bihainim narapela wara ya i go antap we mitupela bai bung long het bilong wara. Sapos mi go kamap pas long yu, bai mi wetim yu o sapos yu go kamap pas long mi orait yu wetim mi na bai mitupela i go wan-

taim long ples, bikpela susa i tokim tewel meri ya.

Taim tupela i bruk na go long wanwan wara, meri tru i go namel liklik long wara na em sekim ol pis na abus em i kisim i planti olsem na em stat long bihainim wara i kam bek. Taim em i go daun, em i wok long tromoi wanwan pis na kindam samting i go daun long rot na em i go kamap long wanpela bikpela diwai limbum na go antap tru long het bilong diwai ya na sindaun i stap.

Taim tewel meri ya i go kamap long het bilong wara na lukim olsem bikpela susa ya i no kamap, em tanim na kam daun bihainim wara. Long rot em i lukim ol pis na kindam na em wok long kisim na kaikai i kam daun inap em kamap long as bilong dispela bikpela diwai limbum. Taim em kamap long diwai ya, em smelim smel bilong meri ya na lukluk i go antap long diwai na lukim meri tru ya i sindaun long het bilong diwai i stap. Orait tewel meri ya i

singautim olgeta tewel manmeri i kam na ol i laik brukim diwai ya na kisim meri ya na kaikai.

Tasol meri tru na i wok long singaut antap long diwai na ol ples lain i harim na ol i kam wantaim spia bunara na kilim olgeta dispela lain tewel ya na kisim bikpela susa ya na em i go bungim liklik susa bilong em na tupela i go long ples.

**Greg Keniombo**  
Ereti viles  
Sandaun provins



Name: Leo Huasinaka Gramoxion  
Krismas: 15 man  
Adres: Kavui Section 11, P.O. Box 682, Kimbe, West New Britain Province.

Save Laikim: Pilai politiks wantaim gavman na developmen sindaun bilong famili. Raitim pas long poromanmeri bilong serim pas i go i kam wantaim poto. Lau be oi diba lasi kekeni, rua lasi lau tamona momokani.

Name: Francis Charly  
Krismas: 20 man  
Adres: Kavangvang Village, Uvol Catholic Mission, Private Mail Bag, Rabaul, East New Britain Province.

Save Laikim: Go long lotu, pilai tas, soka, volibal, raun long bus, waswas long wara na save tok pilai wantaim ol poroman.

Name: Simon Tonny  
Krismas: 27 man  
Adres: P.O. Box 3332, Tanam Trading, Lae, Morobe Province.

Save Laikim: Pilai musik, harim musik, na pilai soka, na lainim ol nupela save long Vokesinol Senta, na tu laikim long senisim poto na leta. Mi redi tasol long bekim ol leta.

Name: Allan Moses  
Krismas: 17 man  
Adres: Kanabea Primary School, P.O. Kanabea, Via Kerema, Gulf Province.

Save Laikim: Go lotu na pilai futbol na tok stori.

Name: Hans Ururubia Serero  
Krismas: 17 man  
Adres: P.O. Box 750, Bogia, Madang Province, PNG.

Save Laikim: Ritim buk, pilai ragbi tas, lukim TV, harim lokol musik.

Name: Gregory Mapua  
Krismas: 16 man  
Adres: Kanabea Primary School, P.O. Kanabea, Via Kerema, Gulf Province.

Save Laikim: Go lotu, pilai futbol, volibal, basketbal, tok stori wantaim ol pren na wokim fani.

Name: Buie Hanson  
Krismas: 16 meri  
Adres: Church of Christ, P.O. Box 102, Wau, Morobe Province.

Save Laikim: Go long lotu, harim PNG musik na gospol, wokim wok bilong skul na raun lukim ol prens.

Name: Richard Nuata  
Krismas: 17 man  
Adres: Kanabea Primary School, P.O. Kanabea, Via Kerema, Gulf Province.

Save Laikim: Go lotu na pilai basketbal, soka, volibal, harim lokol musik na gospol musik.

Name: Bernard Yanevako  
Krismas: 13 man  
Adres: Kanabea Primary School, P.O. Kanabea, Via Kerema, Gulf Province.

Save Laikim: Go long lotu, pilai soka na harim lokol musik na gospol musik.

Name: Vincent Tokusasa  
Krismas: 24 man  
Adres: Shorndcliffe PNG, P.O. Box 2202, Rabaul, ENBP.

Save Laikim: Go lotu long olgeta Sande, serim tok bilong God. Ritim baibel wantaim narapela brata sosa. Raitim pas i go i kam na salim prseens i go kam. Raun, tok stori, kuk kaikai, tok pilai wantaim kristen brata susa na ol prea na painim meri bilong marit na krus long taun i go long ples.

Name: Ben Balls  
Krismas: 18 man  
Adres: Cf- Albert Peter Mewari Village, Kanabea Code Centre, P.O. Box 220, Kerema, Gulf Province.  
Save Laikim: Pop musik lava, walkaton, pilai spot olsem soka, baseket, volleybal, tas ragbi.



## Papamama laikim meri long ples



**Dia LAIPLAIN,**  
Mi wantaim pren meri bilong mi i bin pasim tok pinis long stap wantaim long bihain taim. Mitupela i pasim dispela tok-tok sampela krismas i go pinis.

Tasol papamama bilong mi i laikim mi mas maritim meri long ples bilong mipela yet. Olsem na bai mi harim tok na maritim dispela meri ol famili bilong mi i pasim tingting pinis long en?

WHO DECIDES?

**Dia PREN,**  
Yu gat bikpela wari na hevi wankain olsem planti yangpela long tude i wok long bungim

Pastaim long yu mekim disisen bilong yu, i gutpela long yu mas skelim na glasim gut olgeta rot na pasin insait long dispela samting. Na tu i gutpela long olgeta lain husat i gat toktok long marit bilong yu i mas klia long wanem samting bai i kamap.

Namba wan samting em, yu gat sampela tingting long wanem as tru na papamama bilong yu i no laikim yu maritim dispela pren meri bilong yu?. Nogut ol i ting pren meri bilong yu bai i no inap kamap gutpela meri bilong yu. Nogut ol i pret bai yu no inap pas moa long ol sapos yu marit i go long narapela hap. Sapos yu inap painimaut wanem as tru na ol i no laikim yu maritim dispela pren meri bilong yu, orait yu ken traime long stretim dispela tingting bilong ol.

Na tu, wanem as na papamama bilong yu i laikim yu maritim dispela meri bilong ples?. Ating ol i ting olsem dispela ples meri bai kamap gutpela meri bilong yu, o ol i pasim dispela tingting bikos ol i laik strongim pasin

poroman namel long famili bilong yupela na arapela famili long narapela klen, o nogut i gat arapela as tingting long dispela tingting bilong ol long yu mas maritim meri bilong ples we ol i laikim.

Sapos yu klia long wanem as tingting bilong ol, yu inap toktok wantaim ol na senisim tingting bilong ol.

Namba tri samting, yu bin tokim ol tu long laikim bilong yu long dispela pren meri bilong yu o nogat?. Ol i klia tu long laik bilong yutupela long narapela o nogat?.

Wanpela bikpela askim em, famili bilong pren meri bilong yu i ting wanem long yu maritim pikinini meri bilong ol?. Ol i amamas long yu maritim pikinini meri bilong ol o nogat?.

Sapos nogat, yu bai i gat bikpela wok long mekim yet. Long narapela sait tu, sapos ol i amamas long yu maritim pikinini meri bilong ol, ol bai traime long helpim yu long stretim sampela hevi bilong yu.

Mipela i tok strong long yu i mas traime long painim ansa long ol dispela askim. Bai yu ken luk-save gut long wanem kain disisen yu inap mekim. Gutpela samting tu em long traime kisim gutpela tingting long ol sampela gutpela lain long toktok wantaim yu na givim sampela stia tingting long yu. I gat sampela lain we yu save laikim olsem kandre man o kandre meri o sampela bikman bilong ples o lotu i stap long helpim yu long dispela wari bilong yu?.

Dispela man o meri tu inap helpim yu na senisim tingting bilong famili bilong yu.

Long bihain sapos famili bilong yu i les long senisim tingting bilong ol, yu yet bai i mas kamap wantaim wanpela disisen. Tasol em i gutpela moa long yu yet i mas traime long senisim tingting bilong ol lain bilong yu. Olsem na mipela i ting yu inap wok hat long mekim dispela samting i kamap.

LAIPLAIN

Sapos yu gat hevi, raitim pas long LIFELINE, PO Box 6047, Boroko o ring long telefon 326 0011. Taim yu raitim pas long mipela, raitim nem na adres bilong yu. Mipela inap bekim pas bilong yu stret sapos yu raitim adres na adres bilong yu stret. Long dispela seksen, yumi save toktok stret long ol hevi na wari stret tasol tru nem na arapela samting long yu em mipela i no save soim.

# Stadi long kamapim saksak bisnis long Flai Riva eria

SAKSAK em i kaikai bilong planti pipel insait long kantri. Long ol provins olsem na Wes Sepik, Manus na Galp, em i bun kaikai tru. Ol i save wokim ol kain ail long en, kaikai wantaim abus sem pis, pik na ol arapela moa na em bikpela kaikai bilong ol.

Antap long kaikai, saksak i ken amap olsem wanpela bisnis we ol pipel i ken pulim mani tu long en.

Komyuniti Agrikalsa progrem long Ok Tedi Maining insait long Westen provins i karimaut wanpela wok painimaut long developim saksak olsem wanpela bisnis long pulim mani long en a tu sekurim em (saksak) olsem gutpela kaikai bilong ol pipel insait long Westen provins.

Tony Power bilong Saksak Industris imitit kampani bilong Mosbi i bin karimaut ol wok stadi long dispela samting.

As long dispela wok stadi em long asim na skelim sapos ol ken developim saksak long sekurim olsem kaikai au na long bhain taim. Na tu, skelim us bilong em long sait bilong agrikalsa a bisnis long kantri na tu long salim i go ovasis. Dispela ol stadi i sut long Flai Riva ketsmen eria we Ok Tedi main stap long en.

Long ripot bilong Mista Power we em in redim long OTML em i tok "Ol pipel bilong Flai Riva bai i benefit gut tru sapos ol i kirapim saksak bisnis long sait bilong kaikai sekyuriti na bisnis tu."

Progrem Manesa bilong OTML David Wissink i tok "OTML na ol pipel insait long Flai Riva komyuniti i laikim tu dispela tingting long kirapim saksak bisnis long Flai Riva.

"Mipela bai givim tok orait bilong mipela long karimaut stadi long dispela

samting long ol mun i kam wantaim ol lokol komyuniti na provinsel gavman long luksave long ol wok we bai go insait long saksak bisnis na tu long painim na makim wanpela gutpela hap long kirapim saksak fektori. Mipela bai skelum, glasin na painim wanpela gutpela bisnis grup long eria bilong kirapim na ranim dispela bisnis," Mista Wissink i tok.

Saksak bisnis developmen long Flai Riva eria bai sapatim ol arapela liklik agri bisnis we OTML i sapatim. Dispela em long raba, painap, sili, kopra na ol arapela agrikalsa bisnis we bai i kamap long eria long ol pipel i pulim manim-long en taim kopa main i pas.

Sapos saksak bisnis i kamap gut na ol i kirapim fektori, em bai kamapim saksak flawa bilong salim insait long kantri na ovasis tu. Fektori bai baim ol saksak long ol ples pipel na strongim ol tu long planim bek ol nupela saksak diwai.

Ripot bilong Mista Power i tok "ples Sarawak long Malesia em i kamapim bikpela mak long saksak flawa long wol. Tasol planti bilong en ol i save salim long Malesia yet long yusim long kaikai bisnis we i save kamapim glas nudels na fis kreka.

Saksak bisnis long wol i liklik na mak i stap aninit long wan pesen long wol maket. Dispela em bikos i nogat bikpela prodaksen long en.

Em i tok Australia i save bai 20,000 ton stas long olgeta yia na saksak bisnis bai i gutpela maket bilong PNG sapos prais i orait. Domestik maket long PNG i wet tasol long developim saksak bisnis na dispela i ken kisim 10-20 pesen bilong rais maket we nau i kisim 150,000 ton long wanpela yia."

# AusAID sapatim kompyuta kos

VERONICA HATUTASI i raitim

AusAID i bin sponसरim wanpela kompyuta trening kos long skruim save bilong ol sinia eksekutyutiv wok lain long wok kompyuta long long sait bilong bisnis akauns. Dispela kos i bin kamap long long las mun long Mosbi long las mun na sevenpela pipel i bin sindaun long en.

Kodineta bilong AusAID long dispela kos, Margaret Renault i bin tok i gat bikpela nid long gat ol trening bilong skruim save na karimaut ol wok, moa yet dispela we i sut long ol kompyuta wok. Na wok akaunting em i wanpela long ol eria we ol woklain i gat nit long skruim trening bikos ol senis i save kamap long olgeta taim. Na ol kain kos bai helpim tru ol woklain long wok eria bilong ol, em bin tok.

Em bin tok taim moa PNG lain i wok long luksave olsem i gat nod long gat gutpela fainensel menesme, AusAID bai givim helpim long ol lain i askim long fandim ol dispela kain kos.

Ms Renault i bin aski sevenpela kos greduet long strongim ol wanwok bilong ol we ol i lukim bai benefit long dispela kain kos long apai.

Em i tok ol lain bilong pablik sekta i ken putim aplikesen bilong ol i go long Dipatmen bilong Pesenel Menesmen na ol lain long Praivet sektai kn go long Dipatmen bilong Emploimen na Yut.

Ms Renault i bin tok AusAID bai fandim narapela kos na dispela taim ol sinia manesa bai sindaun long en.

Kos ya em ol i kolim long Eksekutyutiv Fainensel Manesmen na em i kisim tupela wik

# Literesi woksop bai skruim save long ranim wok bisnis

HELEN REI i raitim

GRUP Young Womens Christian Association (YWCA) em wanpela long ol Non Gavman Ogenaisesen we i wok long helpim ol pipel insait long kantri long rit na rait.

Tupela wik i go pinis, Asosisen i bin holim tupela wik literesi trening woksop bilong ol meri long Koiari Yunaitet Sios seket insait Sogeri Distrik, Nesenel Kapitel Distrik.

Woksop i kamap long Depo Misin stesen na 21 pipel i bin stap insait long en.

Ol meri bilong Rigo eria tu i bin stap long dispela literesei woksop ya.

YWCA i bin salim tupela wokmeri bilong en, Janet Pat na Regina Piam long ranim woksop.

Planti long ol lain husat i bin sindaun long kos em ol meri husat i no kisim bikpela skul. Sampela i no skul na sampela i bin go skul inap long Gret 4 tasol.

Lohia Ea long makim ol meri

long kos i bin tok dispela kos i bikpela samting long laip bilong ol meri bikos em i helpim ol long karimaut ol wok bilong ol insait long famili na komyuniti.

Em bin tokim ol wanlain bilong em husat i sindaun long kos olsem ol gat bikpela wok long helpim ol arapela meri husat i no save long rit na rait.

Nesenel Presiden bilong YWCA Deim Rose Kekedo taim em i prisenim ol setifiket pepa i go long ol meri i bin tok ogenaisesen bai yusim ol long karimaut wok long skulim ol arapela meri.

Em bin tokim ol meri olsem "Sapos yu no inap long rit na rait, bai yu no inap long painim ples bilong yu long sosaiti. Wantaim ol pikinini em i narakain tasol wantaim ol bikpela manmeri, mi askim strong yupela long go bek long ples na skulim ol pipel long rit na rait.

"Long go het long laip long dispela wol, manmeri i mas save long rit na rait

"Rit na rait i no min olsem yu mas painim wok long taun, nogat. Planti meri long dispela taim i gat ol liklik bisnis bilong ol na save long rit na rait i helpim ol gut tru.

"Save long rit na rait i opim planti dua. Em i strongim ol manmeri long kaunim mani na yupela em ol tul bilong mipela long skruim wok long komyuniti bilong yupela.

Em i wok bilong Edukesen Dipatmen long strongim wok bilong literesi tasol YWCA i wok long helpim skruim dispela samting.

Kepten Galamo bilong Salvesen Ami taim em i autim tok amamas bilong em long ol lain meri husat i bin sindaun long kos i tok salens em taim yumi lainim nupela samting tasol yumi i mas eksensim ol samting we yumi lainim long en. Yumi noken lokim samting we yumi lainim nau tasol skulim ol arapela lain bilong yumi tu long en.

# KAR TRAFIK REGISTRASI

## OLGETA MANMERI I PAPA LON KAR NA OL DRAIVA INSAIT LON NCD


The Motor Vehicles Insurance Trafik Registri lon Wards Rot, Hohola bai pas olgeta lon 3 kilok lon Fridei, namba 29 dei mun Oktoba.

Niupela Trafik Registri lon Kunai Strit, Hohola bai op lon Mandei namba wan dei lon mun Novemba.

Bisnis hawa bai 8 kilok monin igo inap 3 kilok abinun, Mandei igo Fridei na 8 kilok monin igo 11 kilok lon Sarere (publik holidei nogat).

Sapos yu kisim third parti insurens, registresen blo kar or dravin laisens lon Wards Rot, lon namba wan dei lon mun Novemba yu mas lukim niupela registri lon Kunai Strit lon kisim dispela ol sevis.

Sapos yu save kisim ol dispela sevis lon Sentral Trafik Registri, yu ken go yet lon ol, bai nogat wanpela samtin bai senis.





# KANAGE

"Em nau, narapela wik bilong mi ken"



**K**anage em i bilong Moruma long Simbu provins, na i go lukluk raun long Hagen So. Tudak nau na em i tingting long go bek long Simbu na em i kukim i go long bas stop stret. I nogat bas long go long Simbu So Kanage i wet 3-pela minit i go na wanpela bas i kam. Na boskru i tok Lae. Kanage i kirap na putim han i go long poket long askim kilok bilong en. Na taim bilong em i sanap stret makim 5 kilok. Man Kanage i lukim kilok bilong em na em foa pinis olsem em i leit pinis. Kanage i wokabaut i go long bas i tok Lae, Lae na em i askim boskru olsem em i laik i go long Simbu tasol em i gat K2 tasol na em sot long narapela K2.00 na boskru i bekim tok na em tok Navamine yumi ol Hailans ya kam. Kanage i go sindaun long sit na em i tingting planti long boskru i tok Navamine long em. Man draiva i spit narakain tru tasol Kanage i no amamas bas i kam pinis long Kundiawa na i stap. Kanage i lusim sit i go klostu long dua na tok putim wanpela long boskru na tok olsem. Yu gupela man we. Yu tu yu Navamine. Na olgeta pasindia kilim skin long lap tasol Kanage i no lap long ol.

## Bobyee Kuipa Simbu

Kanage em bilong Lumi distrik. Wanpela taim Kanage wantaim poroman bilong em wanpela manki Madang, tupela i stap long Lumi na i laik kisim balus na go daun long Aitape. Orait taim tupela i kalap long balus na i tekov i go long Aitape, tupela i stori gut tru na stori tu i paulim het bilong Kanage. Taim balus i len long eastrip orait poroman bilong Kanage i rausim sit bel bilong em na i go ausait na Kanage i traim hat tru long rausim sit bel bilong em i stap i go na pailot i lukim em na askim em. Hey bikman, whats wrong, na Kanage i guria na tokim pailot olsem, Mr, this baten mas resting anda Pine hat form to lusen, bring mi the oil hariap soim some in this ras baten. Taim pailot i harim na lap nogut tru long Kanage, na Kanage i pilim sem na tekov i go long ai bilong planti manmeri na pikinini.

## Exlee Ainyis Aitape

Kanage em wanpela marit man bilong wanpela ples long Sepik wara stret na em i fit man bilong tok pilai. Wanpela taim em lusim meri pikinini long ples na go daun raun long Wewak. Taim Kanage i kamap long taun, man, em lukim planti ol yangpela meri i raun i stap. Olgeta tingting bilong em long painim ol kaikai samting bilong meri i pinis. Man, em stat singaut long ol nau, hot! Ol bataflai, yupela painim wanem man gen mi tu wanpela boi i stap. Wanpela yangpela ya harim na tok, wanem hap bilong yu em boi na mipela wanem ol bataflai



bilong yu ah, planti ol bataflai pulap long rot stap. Kanage harim na tokim meri ya, olsem wanem yu laik mi kolim yu wanem, blari! Ol warawara saksak ya, ol meri harim na tokim Kanage olsem, lukim yu pastaim, konim ol meri olsem yu wanpela boi, maski, traipela lapun konman. Go painim ol lapun mama long maket na kaikai kol saksak bilong ol. Taim Kanage harim olsem, olgeta tingting bilong painim ol meri i pinis.

## Kisox Jeremiah Wewak

Kanage em wanpela manki Morobe. Em i save stap tasol long ples. Em i no save kam raun long taun. Wanpela taim em salim gol pinis na em tokim ol lain bilong em olsem yupela stap long ples. Mi go long Lae bai mi kam bek. Em kalap long PMV na em harim ol man long PMV bas ol wok long toktok long ol tokples. Em nau em kirap na askim ol man, em ol wanem kain lain. Na ol pasindia bekim ol bilong Rabaul. Taim ol kamap long ples Kanage kamdaun long bas em i lukim meri Tolai. Na em i askim wanpela man na man i bekim em tasol Kanage laik bekim long Tolai stail na olgeta lain kil long lap.

## Wilson Kasres Lae

Kanage em bilong Gombeli distrik. Taim Kanage stap yangpela boi i kam inap nau em bikman. Taim bilong ol man idai em i no save long laip taim bilong em. Long wanem taim ol man i krao sori Kanage i no save long dispela pasin. Wanpela taim meri tru bilong em idai na turangu Kanage pilim hat tru long krao. Kanage i go tasol long gaden bilong em na em kisim sampela wail salat na kwiktai em rausim trausis na em rapim salat long as bilong em turangu em i no laik pilim pilim na kukim salat. Abrus na em kukim salat stret long het bilong liklik boi ya na tarangu Kanage pilim pen nogut na em singaut strong na ron i kam long

ol man i krao i stap na tok maski tingim dai man em i go pas tingim man i stap yet em tu i kisim bagarap. Taim Kanage i tok olsem ol man kirap nogut na ol stikim Kanage nogut tru. Na turangu em Kanage kisim bikpela bagarap na hangamapim lek bilong em antap na stap long Goroka haus sik.

## Francis Gimbo Yaka Goroka

Kanage em wanpela 4th yia Unitech sumatin, orait insait long skul laip bilong em, em i save amamas long ol skul wok na ol arapela samting tu. Tasol wanpela samting em i save mekim long taim stret bilong en, em long tromoi rabis bilong em long liklik haus (simel haus) long dispela tasol em i feil liklik. Em i no save long yusim dispela simel haus bilong ol Whiteman, em save tasol bilong ples (Kanaka). Yu save insait long simel haus bilong whiteman bihain tu tromoi rabis bai yu presim baton na wara sut i go daun na rausim ol rabis i go. Orait dispela bagaros lusim klasrum na givim siksti go long liklik haus bihainim tasol, taim bilong tromoi rabis i fosim em. So em i go insait long rum. Yu save kain pasin bilong em long ples (simel haus), i no putim tupela lek i go daun long semen flo na putim as tasol bilong em long arere long hul bilong tromoi rabis, em mekim save i stap sindaun antap tru winim mak bilong en. Long sem taim wan skul bilong em tu i laik peks na raun i go insait, i ting nogat man. "Oooh!! Oloman em lap nogut tru long lukim baga nogut stailim stret antap i stap, sindaun olsem sikau bilong diwai. "Oooh. No!!" paia bilong wanskul manki idai isi tru fosim "Nature Call" bilong em i go bek long bel na i go bek ong klasrum. Bikpela saveman. Sem kilim em!!!

## Naks Nakmia Lae

Kanage em bilong Banz long Westen Hailans provins tasol em i no save lukim solwara liklik long

laip bilong em. Tasol wanpela taim em kam raun raun long Lae siti na go lukluk raun long Vokopon. Yu save kain bilong ol Hailans ya bikmaus nabaut nabaut na pundaun: Hr-ri-ri-ri, Hr-ri-ri-ri. Misis Kanage singaut Pu-u-u Wagpara man puhed rong wara Burade-e-em yupara kam rukim ma-ya-o-o mina save em i go-o-o Buku bilong arere hariap ya ko.

## Dickson Pebila Banz

Kanage i bilong Makam long Morobe provins. Wanpela taim em i pulim lain wantaim ol bois na ol i go waswas long wara Makam. Long dispela taim wara Makam i tait na i wok long karim ol hap diwai na ol pipia i kam. Na ol bois i wok long kalap na kisim ol diwai na tromoi i go antap. I no longtaim wanpela braunpela flai olsem liklik pukuk i slip antap long diwai na i kam na Kanage i kalap long kisim ya nogat, flai, putim tit stret long em man Kanage i slip long wara na singaut i stap. Ol bois i pulim em i kam antap na em i giaman long dai. Orait ol i pasim laplap long 2-pela diwai pinis na 4-pela man i karim Kanage na man em i kisim gupela pilings stret. Taim ol i kamap namel long rot ol i harim bel i krao, na ol i tok yupela ol paitim bel long lotu o man idai? Ol i tok olsem na tromoi Kanage i go daun, man Kanage i no wet olsem em i pundaun long hot wara na taim em i kirap, em i go siksti das i kirap winim ol na i go pas sindaun long ples na lap i stap.

## Ben John Lae

Kanage bilong Madang em save raunraun long taun i stap em i no save wok em save raun nating nating i stap. Na wanpela taim em sik na i go long haus sik. Em i go kamap long haus sik em i go sindaun long pom na lukluk i stap na ol narapela sik manmeri kisim marasin na nes wok long raitim kat na askim ol long yia

mama karim ol long en. Na baga nogut harim pinis na em sindaun isi tasol i stap em kirap nogut nes i kam na askim em. Papa hamas krismas bilong yu em sindaun. Em tingting i go i go na em kirap na tok pikinini 16 na nes tokim em papa em yia bilong ol skul mangi. Baga nogut harim olsem na sem na i go ausait na tekov i go.

## Justine Minei Kimbe

Kanage em bilong ples na em man bilong wok gaden. Em man bilong planim brus stret na tu em yet save hapim nem bilong em yet na tu em man bilong toktok long em yet. Na wanpela em i go sekim gaden brus bilong em. Kanage i go kamap long gaden na sanap lukim gen na em yet paitim brus bilong em na lap na tok olsem long ol broos bilong em, em toromoi hap tok bilong ol waitman em brukim bus na tok. Whats there in the garden, I plant trees or pawpaws. Na em i no save Misis sanap long beksait na ai sait em lukim Misis em ting olsem tewel man em kirap nogut na tekov i go insait long bus na lus olgeta.

## Justine Minei Kimbe

Wanpela taim i gat art sosol long nambis bilong Bogia. Long dispela taim Kanage bilong Bogia tu i laik go long dispela sosol. Orait em i tokim ol wanpisin bilong em olsem: "Yupela i ting olsem wanem taim bai yumi go lukim sosol long nambis o nogat?" Yu laik i stap em laik bilong yu. Ol i tokim em olsem Kuam yumi. Tasol Kanage kirap tasol na bekim tok, "Kuam yumi go nau, nogut sampela wanpisin i no ting em mipela long sampela dring." Orait ol i stat wokabaut i go long ples bilong sosol long rot ol i waswas pinis na olgeta wanpisin bilong Kanage i werim hat na dak - spetikel na Kanage tu i werim hat na i painim dak - spetikel. Orait ol i go kamap long wanpela stua na Kanage i askim stua kipa olsem. "be Bee hamas long dispela beer?" Na stuakipa i tokim em olsem. Mi nem bilong mi i no "Beer, Beer," na yu kolim mi Beer, Beer, yu harim kiau long long yu." Orait Kanage kirap tasol na hatim stuakipa na tok. Yu don't know me tokim yu, you want for every, a," Kamaun a!! Orait stuakipa i laik kisim bia tasol tingting bilong em i stap long kros na em ting em givim bia long Kanage tasol em givim cooking oil long Kanage. Kanage kisim cooking oil na pulumapim hariap tasol long bek bilong em na i go long wanpisin bilong em. Na Kanage i no laik olsem olgeta long dring bia bilong em. Kanage i lusim wanpisin bilong em na hait long sait bilong geit na spetim em yet wantaim cooking oil. Bihain em i pilim olsem cooking oil i laik go ausait na i painim dua. as bilong Kanage i kam nogut tru na olgeta bun bilong em i slek. Kanage i sanap na holim long sait bilong geit na pekpek bilong Kanage i sut olsem pispis i save sut. Pekpek i bihainim longpela jin trausis na i go daun na kamap insait long su bilong em. Na gen su pulap na mekim hevi long Kanage. I no tulait yet Kanage i lusim ples bilong sosol na wokabaut isi isi i go long ples bilong em.

## Selestu Kovaka Madang

# KANAGE



**K**anage i go long pablik toilet long Lae maket pinis na em kam aut. Taim em kam aut, em lusim tingting long pasim jipa bilong trausis na windua bilong trausis i op na em kam aut long pablik ples. Em wokabaut na planti manmeri i lukim na lap long em tasol Kanage i no luksave. Em raun long maket i go na wanpela liklik manki i lukim na lap long Kanage na tokim em, "het bikman, sem bilong yu stap ples klia ya". Kanage lap na tokim manki ya, "yu liklik rokok samting nating, save bilong yu em wara wara yet. bipo yu no sem, yu kam aut as nating nogat trausis long as bilong yu na pekpek pulap long as bilong yu". Ol manmeri i harim na lap olgeta bikos Kanage i gijaman karamapim toktok wantaim ekstra tok nam-baut.

Masta Wai Gerehu

Kanage dring bia long Islander Hotel long Mosbi i stap. Em wanpela sindaun dring i go na lukim tupela waitman i sindaun bilong tupela yet long kona na dring isi na stori gut tru i stap. Mani bilong Kanage long baim bia i pinis olsem na em i gijaman kok liklik na go sindaun wantaim tupela waitman ya na tok halo long tupela. Tupela waitman tu i tok halo na Kanage tokim tupela, "my name is Ruffy, and I'm from Key. I am a chairman of the Key timber company". Tupela waitman harim na bilip long em na ol i sikan na baim moa bia na ol dring wantaim. Tasol Kanage em spak hariap long tupela waitman ya na mekim planti toktok tumas na tupela waitman i stat long les nau.

Taim ol ba meri i karim bia i kam na givim koins, Kanage bai holim olgeta koins na putim long fran bilong em. Mekim i go na tupela waitman i les olgeta. Na wanpela i askim, "yu are are chairman, whats your company telephone number and your business card?". Kanage pilim hat na tok, "our company just started this morning and I will get those things done shortly".

Waitman askim gen, "whats your assets like?". Kanage paul long dispela na em paitim tebol na taitim masol na tokim tupela waitman, "look at my face, I am a very important man. Nobody ask this kind of question to me, okay". Isi tasol tupela waitman ya i kirap na lusim ol hap bia i stap na tekov i go aut. Kanage lap long em yet na bungim hap hap bia bilong tupela waitman ya i go pulap long wanpela botol na dring. Na tu em poketim samting olsem K30. koins mani bilong tupela waitman ya. Em amamas tasol na tekov i go daun long Convention Centre (CC) na kilim danis igo tulai.

**Kanage Konman Mosbi**

Kanage em bilong Madang na em wanpela wokman bilong misin. Planti taim em save go long haus lain na sve skulum ol manmeri na pikinini long pasin bilong lotu. Wanpela taim em bungim wanpela

naispela yangpela tisa meri. Taim Kanage lukim dispela yangpela tisa meri, tingting bilong wok misin i no ron stret nau. Baga tromoi tok pisin long tisa meri olsem em wanpela wokman bilong misin na em laik kam long haus bilong tisa meri ya. Turangu tisa meri ya i no save long hait tingting bilong paps Kanage olsem na em tok orait. Paps Kanage ino wet, apinun em kam long haus bilong tisa meri, tupela sindaun na Kanage stat autim tok long wei bilong painim gutpela sindaun na painim gutpela man bihainim gutpela kristen pasin. Bai yu lukim dispela man yet bai kam long haus bilong yu, Kanage i tok. Yu mas save em dispela man tasol em yu mas maritim bikos em plen bilong bikpela. Bikmoning tru tisa meri i slip yet na Kanage kam sanap long dua bilong haus na wet i stap. Taim tisa meri ya i kirap long moning, em opim dua na kirap nogut long lukim paps Kanage i sanap long dua. Isi tasol Kanage tokim tisa meri ya, "Noken pret, em mi tasol. Wanem tok yu harim pinis, nau i kamap tru. Em i no driman, em mirakel stret yu mas bilip na wanbel long em". Tisa meri ya i tingting paul olgeta tasol em tingim hap tok Kanage i bin mekim long aste na em bilip na larim Kanage i go insait long haus na tupela stap wantaim olgeta.

**Chris Dahl Madang**

Wanpela taim junia Kanage askim paps Kanage, dedi, inap yu painim wanpela brata bilong mi bai mitupela i ken pilai mabol wantaim. Na paps Kanage tok, noks bisi boi, bai mi painim wanpela brata bilong yu hariap tasol. Orait ol i stap 5-pela mun pinis na junia askim paps Kanage gen, dedi, wantaim taim bai yu painim brata bilong mi kam. Na paps Kanage tokim junia, wetim 4-pela mun moa. Olsem na redim planti mabol i stap. Taim junia Kanage harim olsem, em amamas nogut tru na taim em i go pilai ausait, em isave tokim ol manki olsem long 4- mun em bai ig at wanpela brata bilong em na

tupela bai winim mabol bilong olgeta manki. Sampela bikman i sindaun na skelim dispela toktok na ol kisim tingting na ol i lap nogut tru.

**Ian Mawai Makam**

Kanage em bilong Kerema na em save wok boskru antap long wanpela sip. Long wanpela Trinde em harim olsem ol Blues na Maroons bai pilai gren fainel long Stet of Origion long 8 kilok nait. Kanage em strongpela sapota bilong Maroons stret na em wet tasol long harim long radio bikos sip bilong em i stap long solwara na em i no inap long lukim televisen (TV). Taim bilong kik op nau na kepten bilong sip i putim radio i go long radio Australia na Kanage wantaim ol wanwok bilong em i sindaun na harim pilai i stap.

Radio man olgeta taim i wok long kolim Queensland na Nu Saut Wels olgeta taim. Gem i go long hap taim na ol i statim seken hap na radio man i wok long kolim Queensland na Nu Saut Wels yet. Olsem na Kanage harim na bel bilong em kaskas olgeta bikos em ino harim nem bilong Maroons liklik olsem na isi tasol em askim kepten na ol wanwok bilong em long sip, "hey olsem wanem na ol Blues na Maroons i no pilai yet?". Kepten wantaim ol wantok bilong Kanage i harim na kilim stret long lap na Kanage paul olgeta.

Yu save Kanage i save long Blues na Maroons tasol. Turangu em i no save olsem Queensland na NSW em i narapela narapela nem bilong Blues na Maroons.

**Karo Yama Lae**

Kanage bilong Siassi na em marit long meri Kabwum na i gat tripela pikinini. Ol lain Kabwum i askim long kisim pe bilong meri olsem na Kanage pasim tupela pik na baim K2000. Ol lain Kabwum tu i pasim wanpela dok man na K1000 na givim long ol lain Siassi.



TASOL NOGAT, 4-PELA DE OLGETA EM RON YET IGO DAUN LONG MAUNTEN.. SOLWARA INO STAP KLOSTU.. KANAGE, ATING MOABETA YU KISIM BALUS NA GO..

Tasol kastom i tambu long Kanage wantaim misis bilong em i noken kaikai bikos em kaikai bilong ol lain tambu tasol. Kanage sindaun daunim spet tru long kaikai wanpela hap mit bilong dok na taim em lukim misis i katim lek bilong dok na tromoi i go insait long sospen, em wokabaut i go klostu na tokim isi long misis bilong em, plis daling, yu save dok em abus tru bilong mi olsem na yu katim wanpela hap mit tasol na gijaman tromoi i go daun long paia na bai mi kisim. Misis Kanage i pilim sem bikos Kanage i strong long brukim kastom. Misi Kanage kirap karim wanpela hap bun na tromoi i go daun long paia. Longwe yet ai bilong kanage i glasim pinis na em kalap olsem dok i go long paia na holim dispela bun long paia. Wantu tasol em subim olgeta bun ya i go long maus na i laik planim tit ya nogat, abrus na olgeta tit bilong em i bruk nabaut na em kaunim star stret. Ol lain tambu long Kabwum i lukim blut i ron long maus bilong Kanage na ol askim na kanage tok, nogat susa bilong yupela ya i givim wanpela strongpela buai tru na bagarapim tit bilong mi ya. Tasol misis Kanage harim na kam ausait long haus na tokim ol, nogat ya, em gijaman ya, narapela brata bilong em yupela givim long mi kukim ya i belhat na kaikai em long maus ya. Man ol lain tambu bilong Kabwum i harim na i nogat toktok. Tasol ol lain Siassi yet ol i save pinis na mekim save long lap i stap.

**Basong Hinge Lae**

Kanage wantaim meri bilong em tupela i stap na Misis Kanage i gat bel. Na tingting bilong Kanage em i askim olsem meri bilong em i mas karim wanpela pikinini man long wanem em i tok em mas stap olsem senis bilong em olsem na wanpela taim em kisim Misis bilong em na tupela go long Hagen taun haus sik. Taim Kanage i kisim i kam na ol nes i tok sori Kanage Misis bilong yu bai stap long haus sik inap em i kisim pikinini orait bai

mipela rausim em. Kanage i tok orait em i ken slip long dispela taim Kanage i go bek long haus man Kanage em i stap long haus tasol em i no inap sindaun gut long wanem meri bilong em bai karim bebi olsem na em i amamas nait em i no slip gut em i wok long tingting i stap go i go na tulait na em i no kukim kaukau gut em i kukim tasol. Em i no sapim gut yu save Kanage mekim save karim wantaim sip bilong paia na em i no .dastim tu em putim insait long plastik na hap aninit yet em i kirap wokabaut i go long haus sik. Long dispela nait Misis Kanage i karim wanpela pikinini man. Taim Kanage i kam long haus sik long dua bilong wod stret em i bungim wanpela nes na askim em: My wife born boy o girl na nes tok boy. Man Kanage i amamas nogut tru na tromoi dispela kaukau plastic. Em i singaut kraung na tok olsem no play up - Thats the way to do it. Ol manmeri na ol nes i lap nogut tru na Misis Kanage i sem na i kros.

**Backy Boy Mt Hagen**

Kanage em bilong Goga insait long Madang provins. Em i save lukim ol man i ronim ka na em i tokim ol lain bilong em olsem yupela mas bungim mani na baim wanpela ka bilong yumi. Yu save pinis ol lain long ples ya ol i bungim mani i go na kamap stret. Nau ol i go long Ela Motors long Madang na Seils Menesa i tokim ol yupela kisim dispela enrolmen fom i go na pilim pastaim ok yupela karim i kam bek. Ol i kisim enrolmen fom i go putim i stap long ples na ol stat long mekim pom bilong sindaun na ol i karim i kam bek long Ela Motors. Na Seils Menesa i kirap na askim ol pom we na ol i tok mipela putim pom ausait. Na seilsman i kirap na askim wanem kain na ol i bekim pom bilong sindaun menesa harim olsem na em idai long lap.

**Wilson Kapre Lae**

## Ol pipel bilong Grin Riva mas makim gutpela lida

**Dia Edita,**

Mi wanpela mangi bilong Hailens i groap long Vanimo taun. Mi laik bekim dispela pas bilong yu Mista Nakmai.

Dispela rot bilong Grin i kam long Amanab na i go long Imonda na bihain kapsait i kam long Bewani na bungim rot bilong Bewani na i kam long Vanimo em wari bilong Open Memba bilong yu.

Mi laik tok klia long yu o husat manmeri bilong Grin, Amanab, Imonda na Bewani. Taim PNG i kisim Independens, yupela ol lain long bus yet i holim dispela sia bilong Vanimo Grin Riva Open inap nau.

Sapos mi olsem yupela ol busman bai mi sem long raitim dispela pas wari bilong dispela rot prosek. Em i wok bilong Open Memba na i no wok bilong Rijnel Memba husat em i Gavan bilong provins.

Mi laik tokim yupela ol lain bilong Grin, Amanab, Imonda na Bewani, yupela ol lain i save gridi. Yupela i no save votim ol man we i gat bisnis long bringim sevis i go long ples bilong yupela long bus. Yu lukim mipela ol Hailens Provins, mipela save skelim lidaman husat i gat bikpela bisnis na mipela i save makim ol, olsem bai ol i bringim sevis i kam long ples.

Nau mi stap long Hagen na mi yet wokim bisnis bilong mi na mi laik tokim yu Nakmai na lain bilong yu olsem yupela i misim sans bilong yupela long makim wanpela pikinini man bilong yupela yet long Vanimo Grin Riva long taim em i go traim long sanap long 1997 Jenerel Ilekseen an em i no win.

Tasol dispela man i save long kisim dinau mani long wol benk long mekim bisnis bilong em na em i no wari nau long sanap moa. Mi yet i bin stap na harim long kempein bilong dispela man long 1997 olsem em i save kisim dinau. Em i tok em i traim helpim ol lain bilong em tasol ol lain i no luksave olsem na em i lus tingting nau.

Mi laik tok klia olsem yupela ol Sandaun i gat gutpela Gavana tasol nogat gutpela Open Memba bilong yupela. Traim na senisim memba na givim i go long man i gat save long kisim dinau mani long wol benk long gavman garenti dinau long mekim rot na bai yupela i yusim ka na i no inap go long bus moa o wokabaut.

Em tasol brata Mark Tandulia Wo.

**Henry Kuk  
Kuk Enterprises  
Hagen**

## Ol papa graun i stil

**Dia Edita,**

Mi wanpela mangi long Mendi tasol mi stap long Kimbe na mi laik autim wari bilong mi i go olsem.

Mi save lukim ol papa graun long ples Unbai i save stil tumas long ol setelmen klostu long Kapiura pientesen.

Ol i save tok olsem ol setelmen lain i no balm graun bilong ol na ol i go long laik bilong ol na i save kisim kakaruk na gaden kaikai. Dispela pasin ol Umbai i save mekim i no gutpela. Dispela em ples bilong God na yupela traim yusim het bilong yupela na noken stil.

Sapos em graun bilong yupela, orait wokim bisnis na noken go stil long ol 'kam manmeri'.

Em tasol wari bilong mi na yu husat i laik bekim dispela pas, mi welkam tasol.

**Stanley Robert Max  
Kapiura  
Kimbe**

## Sandaun Provins i ken senis

**Dia Edita,**

Mi laik sapatim na mekim strong olgeta plen na tingting bilong tupela man Sandaun em long Gavana na Eking Edministreta bilong provins.

Tupela i bin mekim sampela gutpela toktok long Septemba 16 bilong amamasim 24 yia bilong PNG i kisim independens.

Tasol mi askim Sandaun pipel long tingting long ples, distrik na provins na skelim sapos provins i gat senis o nogat?

Traim lukluk i go bek long 1975 na i kam, Sandaun Provins i senis o i stap olsem bipo? Wanem samting i rong bai yumi sutim pinga i go long wanpela Open Memba, Gavana, Nesenel Gavman, Lokol Level Gavman, o wanpela bikman bilong Sios na ples.

Kamon Sandaun pipel, nau em taim yumi lukluk bek long wanem rong, pasin yumi wan wan i mekim we i no helpim ples na provins bilong yumi na traim lukluk long nupela we na stretim dispela asua bilong yumi.

Toktok Gavana John Tekwie i mekim i kisim tru bel bilong mi, na mi i laik strongim na mekim strongpela tok antap long en. Plis ol pipel bilong Sandaun, yumi i ken mekim senis

sapos yumi lusim pasin bilong tingting long wan bus, wanples, wantok, ples, brata susa, kandre na planti moa. Yumi mas wok bung wantaim na mekim ol samting i kamap long plen, tingting, save na stail bilong Sandaun.

Ol pipel bilong Sandaun, traim bihainim pasin tumbuna bilong yumi. Strongim pasin bel isi na rispek bai liklik provins bilong yumi i ken stap gutpela. Pasin bilong yumi ol Sandaun pipel i ken senisim ol arapela provins insait long kantri.

Nau em i no taim bilong yumi long poinim pinga, kros, pait o laikim sampela lain. Em taim bilong yumi long wok bung wantaim na tok Sandaun yumi ken mekim samting.

Nogat samting em i hat. Yumi mas wok bung long lukim driman bilong Gavana Tekwie bilong kamapim 'Fri Tred Zon' long provins bilong yumi i karim kaikai. Em tasol liklik luksave bilong mi.

Tenkyu PNG na pipel bilong Sandaun long ritim dispela pas bilong mi.

**Marki G. Nakmia  
Unitech, Lae.**

## Maski yusim nem Arop nating long Warapu Lagun

**Dia Edita,**

Mi wanpela mangi Warapu na ples bilong mi tu i stap long bikpela bagarap long birua bilong sunami long las yia 1998. Mi laik bekim pas bilong brata Noan Apeex Alois long Arop olsem pasin bilong daunim narapela brata bilong yu em i no gutpela tumas long ai bilong God na em bai i gat sas long yu taim yu no givim trupela histori bilong yu.

Maski yusim nem Arop nating long bagarapim gut pipol bilong Arop na tu Sandaun na laip stail bilong Arop. Yes brata yu tu no ken traim na tok pait long dispela lagun. Harim, mi sem tru long harim yu bagarapim trupela histori bilong mi taim yu yet i no save long histori bilong lagun.

Brata, sapos yu save long trupela histori bilong lagun em bai yu sapatim brata Gabriel Ante long ples Warapu husat i rait na yu traim long bagarapim trupela histori em i traim long kamapim long gutpela save bilong yu.

Long nem Sissano lagun em bikos Sissano em i sab distrik olsem na ol i kolim dispela nem long raun wara. Brata mi bilong Warapu na mi save long histori bilong mi. Na yu i luk olsem yu no save long histori bilong yu na long

dispela raun wara.

Long skelim histori wantaim yu brata, taim Warapu i pait long lagun, Warapu i save pul i go na putim kanu wantaim Namba Wan Arap na pait i go long Namba Tu Arop. Yu stap we na yu no save long dispela histori bilong pait.

Brata, yu skelim ken, taim tupela bikman bilong Warapu i pait, dispela em i las pait.

Brata askim i go long yu long painim wanem mak bilong Warapu taim em i pait wantaim Arop. Husat tru i win, yu o husat man? Wanem samting tru i kamap bihain long tupela bikman ya i pait? Wanem hap tru em tupela bikman ya i pait? Wanem lain Arop i no save pait wantaim Warapu tasol ol i helpim long pait wantaim yu Arop yet? Bilong wanem na ol i helpim Warapu long pait.

I gutpela long yu askim bikman bilong ples Kamairu, Tonris Katamun, Mista Sapien, Mista K. Ramero, Mr Yavandu, Mista Remene na ol bai tokim yu long trupela stori.

Taim Warapu na Arop i kamapim toktok bilong wanbel pasin long stopim pait namel long tupela yet, yu stap we na yu no save long dispela samting.

Long skelim histori bilong yu

## Gavman mas helpim CIS

**Dia Edita,**

Mi wanpela eks kalabus man bilong Buimo haus kalabus insait long Morobe Provins. Mi laik putim komplek bilong mi i go long pepa we ol pablik i ken ritim na save.

Planti taim yumi save harim ol gavman bilong yumi i save toktok long lo na oda hevi long kantri. Mi yet i lukim olsem gavman i save givim moa helpim long ol narapela lain i save mekim wok bilong lo na oda na tingting lus long Koreksenel Sevis (CIS).

CIS em ol lain i save mekim wok bilong lo na oda tu. Ol i mas kisim gutpela sevis tu bai ol i ken mekim gut wok bilong ol. Ol i mas gat ka bai ol i ken wok gut long de na nait, gutpela haus bilong slip, gutpela pe na ol gutpela samting bilong skelim ol kalabus bai ol i ken kisim gutpela save na kamap ol gutpela man taim ol i pinis long kalabus na go aut na mekim bisnis.

Sapos yumi laikim lo na oda hevi i go daun orait givim wankain luksave long olgeta ol lain i save mekim wok bilong

lo na oda.

Bikpela askim bilong mi i go long olgeta ol komanda bilong ol haus kalabus long kantri long noken pasim maus na stap isi olsem olgeta samting i stap gut. Traim opim maus na toktok liklik. I gat ol man o bisnis grup i amamas long givim helpim i stap tasol maus na dua bilong yupela i no save op olsem na nogat lain i kam long helpim.

Laspela askim i go long ol gavana bilong olgeta provins na ol memba olsem, sapos yupela laikim lo na oda bilong provins i go daun orait yupela mas givim wankain helpim o luksave i go long ol lain i save mekim gut wok bilong lo na oda na no ken tingting lus long CIS.

Em tasol liklik komplek bilong mi na yu husat i laik agensim o sapatim mi orait rait tasol long Wantok niuspepa na bai mi ken lukim.

**Eddie Gurua  
Kamkumu blok  
Lae**

## Mao Zeming kisim tok salens

**Dia Edita,**

Mi wanpela man Dedua na nau mi stap long Lae. Mi laik autim bel hevi bilong mi long Wantok niuspepa bai olgeta lain i ken lukim na skelim.

Yes mi laik askim dispela askim i go long Memba bilong Tewae Siassi, Mao Zeming.

Askim bilong mipela ol Dedua i go olsem. Mista Zeming yu i stap yet o yu dai pinis? Yes brata, ating yu i dai pinis ya. Sapos yu i stap bai mipela i save long yu.

Mipela ol Dedua i bin askim yu long mekim rot bilong mipela long Wandokai i go long Kapawa na Butenka ples. Na wanem taim bai yu stretim na skurim dispela rot i go bungim olgeta bus ples olsem Masa, Turuo, Ondeu, Hobo, Zageheme na ol narapela ples.

I luk olsem yu bin digim dispela rot long politik pasin tasol na winim ileksen.

Ating dispela ol masin em bilong gavman na yu sutim bel bilong ol man na yu kisim vot.

Nau mipela harim olsem yu minista bilong Woks na inap yu tingim mipela ol pipel manmeri long ilektoret bilong yu. Na maski long givim nating mani bilong Tewai Siassi i go long narapela ilektoret olsem yu givim long Botana rot ya.

Mipela i gat dispela wari na mipela

bai amamas long bekim bilong husat brata o susa bilong Tewae Siassi.

**Konsenas Dedua  
Lae**

## Pasin birua long rot bilong Simbu i go bikpela

**Dia Edita,**

Mi wanpela mangi Dumun insait long Simbu long Sinasina Distrik. Mi laik putim komplek bilong mi long rot blok.

Ol mangi i stap aninit long 20 krismas i wok long blokim rot na hansapim ol draiva na kisim mani.

Na taim graun i bruk o wel na ol ka i pas, ol i pusim ol ka i go antap long gutpela rot na sasim ol draiva long kisim mani. Sapos draiva i no givim ol, ol i paitim draiva na kisim olgeta mani bilong ol pasindia.

Dispela pasin i kamap bikpela insait long Kamtai na i go long Muaina Hai Skul.

**Enoch Dua  
Simbu**

## TOKSAVE KAM LONG EDITA

Wantok i prinim nau let bilong ol manmeri wantaim potu we i soim klia pes bilong yupela. Olsem na yupela ken salim tu potu bilong yupela i kam long dispela adres. **Painim Penpren, Wantok Niuspepa, P.O. Box 1982, Boroko, National Capital District.**

ken brata, i luk olsem yu no save long histori bilong lagun na yu yet wantaim. Olsem na noken traim long bagarapim gut nem bilong Arop pipol o ol lain famili bilong mitupela long Arop.

Nogat man inap kamap nating long hia. Soim trupela histori bilong yu olsem mi Warapu i soim. Mipela i kam long Vanimo na kam stap hia olsem na Warapu i winim yu long histori bilong em.

Yu husat i mas tingting gut na noken bagarapim trupela histori bilong Warapu ples na sindaun bilong ol pikinini i kamap long bihain taim.

**Patrick Possani  
Warapu Irivave  
Sandaun Provins.**

## Ol lain bilong baim kopi mas rispektim ol grasrut

**Dia Edita,**

Mi wanpela mangi bilong Henganofi Distrik long Isten Hailens Provins. Mi wanpela lokal fama na sem taim tu mi wanpela man i save baim kopi long ples tu. Mi laik sapatim pas bilong brata Sparky Gendimali we i bin kamap long Wantok niuspepa long Oktoba 9, 1999.

Pas bilong brata ya i bin tok olsem ol lain i save baim kopi i save paulim ol trangu long ples. Dispela tok em i tru olgeta.

Bilong wanem mi tok olsem?

Mi yet i tok pinis olsem mi wanpela lokal man i save baim kopi long ples. Olsem na taim mi baim kopi na karim i go long taun, mi save lukim i gat bikpela senis tru long skel.

Mi yet i gat skel long ples olsem na taim mi laik go long taun, mi save skelim wanpela bek na karim i go. Taim mi go skelim dispela bek kopi, mi save lukim olsem ol skel i no save stret.

Ol lain i save baim kopi i save giaman tru na paulim ol kastoma. Ol trangu long ples i no save go antap tasol i go daun.

Olsem na ol lain i save baim kopi, plis mekim samting stret na baim kopi. Maski giaman nambaut na stilim kopi long ol trangu lain long ples.

Em tasol na yu husat i laik sapatim o egensim mi, rait tasol long Wantok na bai mi lukim.

**Jay Neps,  
Henganofi**



## Ron bilong Pasindia Sip September 1999

Vessel	Vcy No.	Salling from Lae for:	Day	Date	Time
Nagada	437 A	Finsch/Lablab/Lae	Wed	1/9/99	4pm
Maneba	524 N	Loengau (Mag)	Wed	1/9/99	4pm
Nagada	437 N	Fin/Sio/Wasu/Bali/Biliau/Mag	Fri	3/9/99	12nn
Rita	486 B	Fin/Lab/Fin/Lae	Fri	3/9/99	5pm
Rita	486 D	Oro Bay/Lae	Sat	4/9/99	8pm
Rita	487 N	Fin/Wasu/Mag/Wewak	Mon	6/9/99	9am
Mamose exp	626 N	Kimbe/Rabaul/Kimbe/Lae	Mon	6/9/99	3pm
Nagada	438 N	Finsch/Wasu/Long/Lok (Mag)	Tue	7/9/99	4pm
Maneda	525 N	Loengau/West Coast (Lae)	Wed	8/9/99	4pm
Mamose exp	626 B	Fin/Lab/Fin/Lae	Fri	10/9/99	5pm
Nagada	438 S	Dogura/Lae	Sat	11/9/99	4pm
Mamose exp	626 D	Oro Bay	Sat	11/9/99	8pm
Mamose exp	627 N	Fin/Wasu/Madang/Wewak	Mon	13/9/99	9am
Rita	488 N	Kimbe/Rabaul/Kimbe/Lae	Mon	13/9/99	3pm
Maneba	526 N	Finsch/Wasu/ (Mag)	Tue	14/9/99	4pm
Nagada	439 A	Finsch/Lablab/Lae	Wed	15/9/99	4pm
Umboi	534 N	Loengau (Lae)	Wed	15/9/99	4pm
Nagada	439 N	Fin/Sio/Wasu/Gali/Biliau/Mag	Fri	17/9/99	12nn
Rita	488 B	Fin/Lab/Fin/Lae	Fri	17/9/99	5pm
Rita	488 D	Oro Bay/Lae	Sat	18/9/99	8pm
Rita	489 N	Fin/Wasu/Madang/Wewak	Mon	20/9/99	9am
Mamose exp	628 N	Kimbe/Rabaul/Kimbe/Lae	Mon	20/9/99	3pm
Umboi	585 N	Finsch/Wasu/ (Mag)	Tue	21/9/99	4pm
Mamose exp	628 B	Fin/Lab/Fin/Lae	Fri	24/9/99	5pm
Mamose exp	628 D	Oro Bay	Sat	25/9/99	8pm
Mamose exp	629 N	Kimbe/Rabaul/Kimbe/Lae	Mon	27/9/99	3pm
Nagada	440 C	Dogura	Mon	27/9/99	4pm
Maneda	528 N	Finsch/Wasu/ (Mag)	Tue	28/9/99	4pm
Totoi	798 A	Finsch/Lablab/Lae	Wed	29/9/99	4pm
Umboi	586 N	Loengau (Lae)	Wed	29/9/99	4pm
Nagada	440 D	Kandrian/Arawe/Lae	Thu	30/9/99	12nn

## Ron bilong Kago Sip September 1999

Vessel	Voy no	Salling from Lae for	Day	Date	Time
<b>Main Ports</b>					
Maneba	524 N	Loengau....(Mag)	Wed	01/9/99	4pm
Wewak	358 N	Madang/Wewak/Vanimo	Fri	03/9/99	10pm
Kuder	228 A	Madang	Tue	07/9/99	6pm
Maneba	252 N	Loengau/West Coast (Lae)	Wed	08/9/99	4pm
Kuder	228 N	Madang/Wewak/Vanimo	Fri	10/9/99	10pm
Wewak	359 A	Madang	Tue	14/9/99	6pm
Umboi	584 N	Loengau (Lae)	Wed	15/9/99	4pm
Wewak	359 N	Madang/Wewak/Vanimo	Fri	17/9/99	10pm
Kuder	229 A	Madang	Tue	21/9/99	6pm
Maneba	527 N	Loengau (Lae) Dangerous	Wed	22/9/99	4pm
Kuder	229 N	Madang/Wewak/Vanimo	Fri	24/9/99	10pm
Wewak	360 A	Madang	Tue	28/9/99	6pm
Umboi	586 N	Loengau (Lae)	Wed	29/9/99	4pm
<b>Small Ports</b>					
Nagada	437 A	Finsch/LabLab/Lae	Wed	1/9/99	4pm
Nagada	437 N	Finsch/Sio/Wasu/Gali/Biliau/Mag	Fri	3/9/99	12nn
Umboi	583 N	Aitape	Mon	6/9/99	4pm
Nagada	438 N	Finsch/Wasu/Ion/Lok (Mag)	Tue	7/9/99	4pm
Nagada	438 S	Dogura/Lae	Sat	11/9/99	4pm
Maneba	526 N	Finsch/Wasu/ (Mag)	Tue	11/9/99	4pm
Nagada	439 A	Finsch/Lablab/Lae	Wed	15/9/99	4pm
Nagada	439 N	Finsch/Sio/Wasu/Gali/Biliau/Mag	Fri	17/9/99	12nn
Umboi	585 N	Finsch/Wasu/ (Mag)	Tue	21/9/99	4pm
Nagada	440 C	Dogura/Lae	Mon	27/9/99	4pm
Maneba	528 N	Finsch/Wasu/ (Mag)	Tue	28/9/99	4pm
Totoi	798 A	Finsch/Lablab/Lae	Wed	29/9/99	4pm
Nagada	440 D	Kandrian/Arawe/Lae	Thu	30/9/99	12nn

### Memba bilong Telefomin kisim tok salens

**Dia Edita,**

Mi wanpela grasrut mangi bilong ples long Telefomin Distrik long West Sepik Provins. Nau mi stap pasindia long Tabubil insait long Westen Provins.

Mi laik toktok long Memba bilong Telefomin Open Mista Robert Sakias. Mista Sakias i mas dai pinis long Haus Palamen long Mosbi o em i stap laip yet.

Sapos yu stap yet orait yu i no fit long toktok long Haus Palamen na yu i no fit long kisim ol sevis i go long Telefomin Distrik.

Orait long ileksen 2002, yu i no ken sanap. Lus tingting na givim spes long narapela man o meri, bikos yu i no fit tumas long kisim ol sevis i go long ples bilong yu?

Plis ol brata na susa. Sapos yu husat i laik sapatim pas bilong mi, rait i go long Wantok niuspepa bai mi ken ritim.

**Haikson Andrew Iililin  
Sandaun**

### Inap ol Lae MP i kamapim wanpela pati?

**Dia Edita,**

Mi wanpela man Mesem tasol nau mi i stap long ples Poasi long Lae. Hia em bel hevi o wari bilong mi. Olsem wanem, inap olgeta Memba bilong Lae kamapim wanpela pati bilong Morobe o nogat?

Mi askim dispela long wanem olgeta taim ol i laik joinim ol pati bilong arapela lain. Olsem wanem ol i bihainim mani o ol laik kisim pawa tasol. Plis mi askim yupela olgeta Open na Nesanel Memba bilong Morobe, noken tingting long mani na pawa na kalap tumas long ol pati.

Plis inap yupela ol Open na Nesanel Memba bilong mipela i traim na kamapim Pati bilong yumi ol Morobe pipel stret long Palamen? Long wanem yumi i no mangi moa na bai yumi bihainim ol arapela lain pati. Dispela em i wari o bel hevi bilong mi. Sapos yu husat man o meri i laik sapatim tingting bilong mi o egensim em i orait tu.

Rait i go long Wantok niuspepa na bai mi ken lukim. Tenkyu olgeta manmeri bilong God.

**Moksray Peter  
Lae**

## Ol turangu lain bagarapim Hagen siti

**Dia Edita,**

Mi wanpela man Gumine long Simbu Provins tasol nau mi wok long Mitre Hardware. Mi stap 12 yia long Hagen na mi save lukim planti ol longlong manmeri i kam pulap long Hagen taun.

Ol i save sindaun long ol rot o pes bilong stoa o bekeri nabaut na save singaut long wan toa na tu toa long ol kastoma o ol pipel i go i kam.

Ol kastoma i raun long baim ol samting. Ol i no raun long givim ol samting long ol kain lain. Ol dispela

lain, i gat pren, wantok o famili i stap orait ol i mas kisim ol i go long asples bilong ol na wok gaden na lukautim ol.

Dispela Hagen siti em i namba wan siti bilong PNG, tasol dispela pasin i kamap na i no luk stret long ai bilong mi.

Husat yu laik sapatim o egensim mi, em yu ken rait i go long Wantok niuspepa na bai mi ken lukim.

**John Wamil  
Hagen**

### Kundiawa taun i bagarap

**Dia Edita,**

Mi wanpela Simbu man. Mi makim maus bilong olgeta pipel insait long simbu Provins. Yupela olgeta memba bilong Simbu yupela olgeta i go stap we?

Yupela lukim liklik taun bilong yumi Kundiawa i bagarap o nogat. Kundiawa taun em i wanpela naispela taun tasol yupela ol Memba i no lukluk long taun bilong mipela.

Kundiawa taun i luk olsem wanpela liklik distrik i stap insait long bus. I no luk olsem taun bilong mipela. Yupela ol Memba tingting long developim taun i go bikpela na kamap gutpela o nogat. Yupela olgeta Memba bilong Simbu yupela ai gris long mani. Wanem mani i go long en yupela bihainim tumas na yupela stap nating tasol. Yupela i no mekim wanpela liklik wok i kamap long ai bilong mipela olgeta pipel bilong Simbu.

Wanem taim na wanem yia Simbu Provins bai develop i kamap gutpela gen?

Olgeta samting taim mipela i stap liklik mangi na mipela i lukim long en i stap yet. Nogat wanpela liklik samt-

ing i senis long ai bilong mipela. Mipela i no lukim wanpela liklik han mak bilong wanpela memba yet. Na tu mipela i go harim toktok long Palamen tasol mipela i no lukim wanpela Memba bilong mipela i sanap na toktok strong. Yupela olgeta i kamap bek bensa na nogat maus bilong yupela stret.

Mipela votim yupela bilong karim ol hevi na laik bilong mipela i go long Palamen na bringim ol gutpela sevis na developmen i go long ol komyuniti na provins. Mipela i no votim yupela bilong i stap nating na bihainim lek bilong ol meri nabaut. Wanem kain pasin yupela i save mekim long laip bilong yupela yet olsem ol Memba i no gutpela long mipela ol pipel bilong Simbu.

Yupela i mas traim na soim yupela yet olsem ol memba na raun. Yupela raun na mipela i no tok olsem yupela Memba. Wanem taim bai yupela i kamap olsem ol gutpela Memba.

Em tasol wari bilong mipela tenkyu.

**Joseph Bre  
Kundiawa**

### PNG lo i mas lukautim PNG politik

**Dia Edita,**

Mi laik sapatim toktok bilong Minista bilong Stet, Peter Waieng. Em i tok olsem, politik i bagarapim kantri.

Yes dispela tok i tru. I gat tupela save, pasin na tok stret bilong tok ol i save tok politik.

Trupela tok politik em i tingting na save tru bilong gavman long mekim kamap gut laip bilong ol pipel bilong en yet. Narapela politik em i wantok sistem na i no long save. Dispela politik i bagarapim kantri tude.

Gutpela politik o save bilong gavman i mas i stap, na ol wantok sistem politik i mas pinis long wanem em i bagarapim tru kanti bilong yumi.

Sapos i nogat politik bai i nogat gavman na bai yumi i go long we nau? Ples i bagarap i wetim yumi i stap.

Wanpela rot nau i stap long stretim ol hevi long kantri, em long kamapim ol gavman polisi, we i mas i stap olsem namba wan tingting na save bilong stretim ol hevi kantri i wok long bungim. Dispela ol polisi i mas stretim pasin politik, ekonomik na sosel hevi bilong PNG tude. Na mekim dispela ol polisi i kamap mama lo.

**Philip A. Pais  
Vanimo**

### Memba bilong Nawae kisim tok salens

**Dia Edita,**

Mi wanpela mangi bilong ples na mi laik bringim komplek bilong mi i go long Memba bilong Nawai.

Memba bilong Nawai, Kenedy Wenge em i wanpela wansait memba, bilong wanem, dispela mani K500,000 em i no bin

brukim stret na givim long olgeta Nawai pipel. Nogat tru ya! Em i mekim wan sait olgeta na em i givim dispela mani i go long ol rot projek insait long Nabak eria tasol. Na ol eria bilong Wain, Erap na Bukawa em i nogat tru.

Ating Kenedy Wenge em i memba bilong Nabak tasol na i

no bilong Nawai Distrik olgeta. Olsem na yumi mas noken tok olsem Kenedy Wenge em Memba bilong Nawai. Nogat. Yumi mas tok olsem Mista Wenge em Memba bilong Nabak.

**T.K. Sapyone Simbang  
Lae**

**WANTOK**

Askim long klasifaid ads: Miri Aiori Ext. 214, John Iagata Ext. 218

**KLASIFAIID**

**Birthday Memorium and Thankyou**

**GRACE ISSABELLA  
SAWINJO MALENKI**

**24<sup>TH</sup> BIRTHDAY - 30/10/1999**

**BORN: 30/10/75**

**DIED: 30/06/99**

Its 2 months on your passing away before your 24th Birthday Anniversary.

Will remember you as our treasure and will be sadly missed by the Malenki family, families of Boiken and Koikin village, Students of Massey University - New Zealand, Friends, Colleagues in E/Sepik & PNG.

The family also wishes to acknowledge Sir Anthony & Lady Siaguru, Hon. Bernard Narakobi MP, Universities in Parlmastone & Auckland - New Zealand & Families in Port Moresby & the Administration & Staff of the Dept of East Sepik for the contributions, Comforts and Prayers of those who have assisted in the funeral of our late Daughter, Sister and Auntie and say Thankyou on her 24th Anniversary.

*Ave Rest in Peace.*



**WANTOK NIUSPEPA REACHES THE PEOPLE WHO WANT GOOD VALUE!**

Some advertisers tend to underestimate the buying power of the average Wantok Niuspepa reader without appreciating the dynamic attributes of Wantok's audience.

Wantok Niuspepa is reaching 150,000 readers per week. Consider this is more than twice the readership of any other newspaper.

Most read the Wantok word for word. Every advertisement gets the attention it deserves.

Wantok Niuspepa readers are loyal in their product preferences. Price is a concern but familiarity and perceived value guides their buying behaviour.

Advertising in Wantok Niuspepa can influence their buying patterns and create loyal customers of your product and services range.

*Wantok Niuspepa* is reaching the readers who really matters and it will be to your advantage to educate your target market more thoughtly.

*Wantok Niuspepa* can be your alternative point of sale venue in merchandising your product and services. After all, consumer conversion can only come through approaching your target market directly.

**ADVERTISING SPACE COST  
.... PRICES QUOTED EXCLUDES 10% VAT**

Advert Size	Mono	One spot colour	Two spot colour	Full colour
Full Page- 38cm x 7col	K 784.70	K 984.70	K 1,184.70	K 1,584.70
Half Page - 28cm x 5col	K 413.00	K 613.00	K 813.00	K 1,213.00
Half Page-19cm x 7col	K 392.35	K 592.35	K 792.35	K 1,192.35
Quarter Page-19 x 4col	K 224.20	K 424.20	K 624.20	K 1,024.20

Compare Wantok's cost per column cm!  
K2.95 per col/cm against the Dailies K7.82 for the same size!!  
Volume discount rates are also available on request



**Save With  
MOROBE SAVINGS  
AND LOAN SOCIETY**

*For your Credit needs In the new Millennium*

- School fees for children
- Medical Expenses
- Holiday Expenses
- Wedding Expenses

**or**

- Business Project that you want to kick start.

Why not call in and see us before it is too late.

We are at Vele Rumana Building, on the Ground Floor.

**P.O. Box 3488, Fourth Street, Lae  
Phone: 472 1777 - Fax: 472 1778**

## Finschafen Pikinini Spots Soka holim gren fainel

FINSCHAFEN Pikinini Spots Soka i bin holim namba wan gren fainel bilong ol long Finschafen station las wik Sarere.

Memba bilong Finschafen na Minjsta bilong Difens Alfred Pogo i kik-op long dispela gren fainel bilong anda 10, anda 15 na anda 18.

Presiden bilong Finschafen Pikinini Spots Soka Ogeng Dengkeo i tokaut olsem em i amamas tru olsem minista Alfred Pogo i givim taim bilong em long stap wantaim ol liklik skul mangi.

Dispela gren fainel i pulim planti ol bikman bilong Morobe Provinsal Edministeses na tu Finschafen Distrik i bin kamap long lukim gren fainel bilong skul pikinini.

Insait long anda 10, gem ya i bin kamap gut tru namel long ol liklik

mangi ya. Tasol ol boi Musi i strong long winim Royals 1-0. Planti ol bikman i amamas long lukim ol yangpela i soim kain stail we i ken karim soka long Finschafen long bihainim taim.

Long Anda 15, Musi ken i traim strong bilong Dreghafen 3A sul. Tupela tim wantaim i kamapim gutpela pilai na nogat wanpela gol i kamap long fultaim. Olsem na ol i pilai ekstra taim na gol i no kamap na ol i kisim penalti.

Insait long kik bilong penalti Musi i winim ol long 4-3.

Long Anda 18, tupela tim bilong Dregafen Hai Skul yet i skelim strong bilong tupela yet. Ol i bin pilai na nogeta wanpela gol i bin kamap long fultaim na tu long ekstra taim. Olsem na long penalti, ol Dregafen 5A i winim Dregafen 5B 4-3.

# PMSA gems bai kamap long dispela wiken

OLGETA gems bilong Pot Mosbi soka asosisen (PMSA) long las wiken bai kamap gen long dispela wiken.

Dispela long wanem ol referi ino bin laik long kisim ol gems bihain long wanpela pilaia long Difens soka klab i bin mekim poret toktok long wanpela senia referi.

PMSA presiden Kuma Aua i tok disisen long karim ol gems bilong las wiken i kam long dispela wiken i bin kamap bihain

long wanpela miting namel long memba klab na eksekutiv long Bisini soka graun .

Aua i tok sori long disisen ol eksekutiv i mekim long putim op ol gems long las wiken i westim taim bilong olgeta tims.

Presiden i tok, "Ol komiti bilong mi na mi yet i amamas long gutpela sapot i kam long olgeta afilate klabs husat i bin kamap long Mande apinun long stretim dispela hevi na pinisim gut 1999

sisen wantaim gren fainel."

Aua i tok ol eksekutiv i bin givim tok orait long PMSA long go het long panim arapela rot long lukim ol gems i go het sapos ol referi i les long kisim fil long dispela wiken.

Long dispela taim presiden i tok olsem tok lukaut bilong ol komiti bilong em long las wik i stap yet olsem sapos wanpela pilaia o klab i mekim tok poret long ol pilaia o klab opisels.

## KIUNGA VOLIBAL RIPOT

# Kalas winim taitel

KALAS em i kamap sempion long namba tu taim bihain long em winim Solo long bikpela volibal gren fainel bilong Kiunga las Sarere.

Gutpela de stret wantaim. Olpela sapota na pilaia i redi tasol long pilai volibal long Kiunga basketbal kot.

Ol boi Kalas i no wari. Ol i kamapim gutpela gem stret na win. Ol pilaia i gat gutpela strong long kamapim nem bilong Kalas long bihain taim.

Kepten bilong Kalas husat i save skul long Abel Moses. Em i go pas long setim tim bilong em long winim dispela gem.

Na tu Moses tu i winim awot olsem wanpela top pilaia long Kiunga gren fainel.

Yangpela Moses i ken kamapim yet nem bilong em long spot bilong volibal sapos em i gat gutpela kosa. Em tasol i wok long go pas long Kalas long winim dispela gem 3-1 egensim Solo.

Em i namba wan yia bilong Solo long kompetisen bilong Kiunga volibal.

Presiden bilong KVA Joaching Komoru husat i kosa bilong Solo i tok gren fainel i kamap gutpela tru ya.

Em i tok amamas long Kalas husat i bin kamapim gutpela gem. Em i tok kompetisen bilong Kiunga i wok long kamap gut bikos planti ol yangpela i givim taim bilong ol long pilai ya.

Em i tok ol pilaia olsem Moses,

Nomi Nelson na Tony Aisa i gat bikpela strong bilong kamap PNG pilaia long bihain taim.

Intanesenel pilaia bilong PNG Vali Kali i mekim wok ampaia long dispela gem. Em wantaim Nigel Ongapa bilong Tabubil i lukautim dispela gem na ol i amamas tru long kain stail bilong ol yangpela boi bilong Kiunga.

Solo i statim gut gem wantaim kepten Chris Kihanges long winim namba wan set 25-19.

Tasol taim ol i senis, ol pilaia bilong Kalas olsem Moses, Aisa na Richard Urio i wok bung na kamapim gutpela pilai stret na levelim skoa 1-1.

Namba tri set i kamap strong tru. Poin i wok long senis planti taim na Kala i strong tru na winim 25-18.

Long namba foa set, Kihanges i kamapim gutpela pilai. Tasol kanage bilong Kiunga Norman Misieng i poroman gut tru wantaim Tim Markus na ol i kamapim strongpela gem bilong Solo.

Tasol ol boi Kalas i no wari. Ol i daunim het na pilai i go na ol i amamas tru long taim referi i winim wisel long fultaim. Kalas i winim 25-23.

Long gren fainel bilong ol meri, Kula i winim Meps 3-1. Kiunga volibal asosiesen i wok long pulim planti tim tru nau long dispela yia. Nau yet i gat 8-pela tim bilong man na 10-pela tim bilong ol meri.



• Kepten bilong Kui Raiders Robert Benny i toktok long maikrofon long presentesen bihain long Raiders winim Souths 16-12 long Cambridge Kap gren fainel las wiken long Goroka.

## Kui Raiders winim Cambridge Kap

### HENRY MORABANG i raitim

KUI Raiders bilong Mt Hagen i kamap nupela Cambridge Kap sempion bihain long em i autim Downer Construction Souths 16-12 long gren fainel las wik long Sir Danny Leahy oval.

Raiders i kamapim strongpela gem tru long salensim ol boi long Pot Mosbi. Ol boi Westen Hailens i soim olgeta strong olsem watpo ol i sempion taim ol i givim hat taim tru long Souths.

Ol Raiders i no westim taim Kuli Jacob i putim namba wan trai. Dispela trai i kamap bihainim gutpela gem plen we Jacob i pasim ai na abrusim olgeta pilaia bilong Souths long putim trai.

Souths i no tingting gut long gem ya. Ol i kamapim planti ol liklik asua we Raiders i yusim gut long pilai.

Raiders i go putim namba tu trai long go pas wantaim skoa 8-0. Dispela trai i kam yet long Steven Pugim bihain long em i kisim gutpela bal i kam long hukta Steven Petro.

Simon Duna inap long surikim skoa tasol em i abrusim stret

wanpela penalti kik ya.

Orait Eric Abba i putim namba wan skoa bilong Souths. Roy Amburi i kikim konvesen na skoa i sanap 6-8.

Raiders i strong yet na Kuli i go putim namba tu trai bilong em. Skoa nau i sanap 12-6. Dispela skoa i sanap i go inap long hap taim.

Souths i putim wanpela trai tasol referi i no harim hap taim wisel na larim trai. Referi Luxie Metta i no harim belo na larim pilai i go na Souths i putim trai.

Orait ol pilaia bilong Kui Raiders i no amamas na mekim sampela strongpela toktok na ol sapota tu i singaut nambaut.

Referi Luxie Metta i toktok wantaim tupela referi na tu Francis Matmilo bilong PNG-FL opis long Goroka na rausim dispela trai ya.

Insait long namba tu hap, Roy Amburi i kikim wanpela penalti gen na skoa nau i sanap 12-8. Dispela skoa i stap long liklik taim na Robert Benny kepten bilong Raiders yet i putim namba tri trai.

Andrew Gee i no kikim gut konvesen na skoa bilong Raiders nau i stap long 16 na

Souths 8.

Insait long 19 minit bilong seken hap, winga bilong Souths Robert Tende i putim wanpela trai long mekim skoa i luk gut. Dispela trai bilong Tende i helpim Souths long pilaia strong tru. Skoa nau i sanap Raiders 16 na Souths 12.


Ol pilaia bilong Raiders olsem David Koldop, Solomon Kiap, Eilen Atepe, Andrew Gee i kamapim gutpela pilai long fowat. Ol i no surik long ol mangi Souths.

David Kaiabe, Robert Tende, Ravu Tala na Wayne Moary i kamapim gutpela pilai long beklain.

Long fowat Robert Tia, Mike Wako, John Togola, Jackson Etape, Luke Minjuka na John Pandia.

Kosa bilong Raiders David "Spaceman" Kunjil i tokaut olsem em i gat bilip olsem tim bilong em bai win ya. Em i tok Souths i save kamap long niuspepa olgeta taim na dispela i daunim tru tingting bilong ol.

Kunjil husat i statim dispela klab i amamas tru olsem ol wapisin bilong em i pilai gut tru na win.



• Volibal gren fainel eksen namel long Kalas na Solo. Kalas win 3-1.



# Wiken Spot Dro

## PORT MORESBY SOCCER DRAW

Saturday 23rd, October 1999

**Bisini 1**

0800	M2	Eda Ranu V M. Kayaks
0920	M2	SPB V Don Bosco
1040	W2	Rapatona V University
1200	W2	Cosmos V Adu
0120	M1	Cyclone V Wanzesi
0240	M1	Tawala V Verave
4000	P	Cosmos V Tarangau

**Bisini 2**

0800	M2	Dolos V R.B. West
0920	W2	IBS PS United V Tawala
1040	M1	Bulolo Mocs V Nisco
1200	M1	YM2 V Bao Mitas
0120	M1	Sobou V Bau Futz
0240	M1	SPB V M. Gaindu
4000	P	Rapatona V Momase

Sunday 24th October 1999

**Bisini 1**

0800	M2	ITI Muma V M. Kayaks
0920	M1	Sobou V Cyclone
1040	M1	Tawala V Nomads
1200	M1	Pom United V Togelu
0120		
0240	W1	University V Togelu
4000	P	Babaka V ICF University

**Bisini 2**

0800	W2	Rapatona V Murat
0920		
1040	R	Rapatona V Defence
1200	M1	Nisco V Verave
0120	M1	SPB v City Kings
0240	P	Rapatona V K. Andra
4000	P	Cosmos V Adu

### Midweek games

Tuesday 26th October 1999

0430	M1	Nisco V Pom United B1
0430	M1	M. Gaindu V Murat B2

**Note:** 1. Finals begin on 30th October. 2 All O/S games must be played before 30th. 3 Arrange O/S games with Apa or Bakuwai. 4 All U/19 games will be halted, see SGT Bakuwai or Apa for explanation.

### PMSA DRAW

Progressive points ladder - October 23rd, 1999

**Division: Premier**

Teams	P	W	L	D	F	B	F	A	P
Rapatona	22	14	5	2	1	2	43	16	53
IBSPS Uted	23	13	4	6	-	2	40	17	51
University	23	12	4	7	-	2	56	30	49
TST Babaka	23	12	5	6	-	2	48	26	48
Blue Kumuls	23	12	6	5	-	2	48	27	47
Defence	24	11	7	6	-	2	33	23	45
Momase	22	6	6	10	-	2	42	27	34
Tarangau	23	7	10	6	-	2	26	32	33
Cosmos	22	7	10	5	-	2	30	31	32

Guria	21	5	9	7	-	2	25	32	28
K.Andra	20	5	12	3	-	2	29	41	24
Adu	22	5	11	6	-	1	22	31	24
Telikom	23	1	20	2	-	2	13	58	11

### Division: Women One

Telikom	22	16	1	3	2	-	67	2	57
University	21	12	-	7	2	-	40	4	49
WMI Togelu	20	10	1	8	1	-	26	9	41
Defence	21	7	3	9	2	-	25	20	36
Babaka	22	8	5	8	1	-	22	11	35
Tarangau	22	8	9	4	1	-	23	23	31
Sobou	22	4	7	10	1	-	12	15	25
Guria	19	5	9	5	-	-	16	28	20
Naniu	22	1	13	6	2	-	10	24	15
Blue Kumuls	21	3	14	4	-	-	12	41	13
Wanzesi	19	2	14	3	-	-	10	38	9
Nomads	20	1	17	3	-	-	6	48	6

### Division: P/Reserve

LBC Defence	23	12	1	9	1	2	35	18	54
Rapatona	21	13	5	3	-	2	30	13	48
Momase	22	10	3	7	1	2	31	15	46
TST Babaka	23	11	8	4	-	2	40	26	43
Blue Kumuls	21	7	3	11	-	2	27	19	38
University	22	8	10	3	2	1	34	25	37
Guria	20	8	5	7	-	1	26	24	34
Tarangau	21	8	11	2	-	2	22	23	32
Cosmos	22	5	8	8	1	2	32	26	32
Telikom	21	6	10	4	1	2	32	27	31
IBSPS Uted	22	6	11	5	-	2	25	31	29
Kurti Andra	21	2	10	9	-	2	15	23	21
Adu	22	4	15	3	-	1	13	36	18

### Division: Women Two

Cyclone	24	15	4	3	2	-	46	9	54
Kula	26	13	4	6	3	-	32	10	54
Cosmos	25	13	3	8	1	-	35	8	50
IBSPS Uted	23	13	5	5	-	-	30	12	44
Murat	24	8	5	7	4	-	26	15	43
Tawala	23	7	5	8	3	-	17	13	38
Rapatona	25	6	5	12	2	-	33	14	36
Adu	22	8	8	4	2	-	22	18	34
Pom United	23	4	10	6	3	-	22	18	27
Blue Kumuls	23	4	10	7	2	-	17	26	25
City Kings	23	6	10	7	-	-	14	27	25
University	21	1	11	9	-	-	9	25	12
W.Heights	20	2	16	2	-	-	10	48	8
M.Gaindu	20	1	16	3	-	-	7	44	6

### Division: Men One

Tawala	32	21	2	8	1	-	60	20	73
SP Brewery	32	18	3	10	1	-	63	19	67
YM2	32	16	4	10	3	-	41	21	67
Verave	29	18	2	9	-	-	64	24	63
Sobou	30	17	6	7	-	-	41	26	58
Nomads	31	15	4	12	-	-	47	19	57
Cyclone	31	11	9	10	1	-	37	31	46
Bulolo Mocs	34	9	10	15	-	-	19	18	42
Pom United	30	9	8	13	-	-	33	43	40
Bao Mitas	32	10	12	10	-	-	38	36	40
Bau Futz	32	9	12	11	-	-	38	33	38
Wanzesi	33	8	15	8	2	-	36	37	38
Murat	30	8	11	11	-	-	24	36	35
Nisco	30	6	14	10	-	-	28	35	28
D.Murika	32	5	14	13	-	-	26	46	28
WMI Togelu	30	4	46	10	-	-	22	37	25
M.Gaindu	28	5	14	9	-	-	22	37	24
City Kings	30	3	21	6	-	-	15	52	15

### Division: Men Two

Korion	29	20	3	6	-	-	64	22	66
Kula	30	16	4	9	1	-	41	16	60
Naniu	26	13	3	9	1	-	33	15	51
Bavaroko	30	12	6	11	1	-	31	25	50
Mukaso	29	13	8	7	1	-	40	24	49
Dolos	27	14	7	6	-	-	27	24	48
Eda Ranu	26	12	8	5	1	-	33	23	44
M.Kayaks	30	10	14	5	1	-	33	43	38
ITI Muma	29	10	15	4	1	-	25	34	37
SP Brewery	27	9	11	7	-	-	33	30	34
City Kings	28	8	12	7	1	-	25	31	34
W.Heights	29	7	11	11	-	-	27	28	32
Don Bosco	25	9	12	4	-	-	28	38	31
R.B.West	28	6	14	7	1	-	16	39	28
Cyclone	27	3	14	10	-	-	14	32	19
Kutu	29	3	24	2	-	-	17	71	11

### Division: Under 19

IBSPS Uited	26	14	4	7	1	-	34	18	52
Nisco	26	15	6	3	1	-	48	25	51
Telikom	23	14	3	5	1	-	40	18	50
LBC Defence	28	14	7	7	-	-	41	16	49
Guria	21	12	4	3	2	-	32	14	45
Bao Mitas	28	12	11	4	1	-	38	25	43
Pom United	24	10	7	4	3	-	33	19	43
Cosmos	26	12	9	4	1	-	29	21	43
Kurti Andra	30	8	12	6	4	-	34	32	42
Blue Kumuls	25	9	8	6	2	-	36	21	39
Tarangau	23	9	6	8	-	-	35	29	35
TST Babaka	23	8	8	6	1	-	27	32	33
Adu	22	10	9	3	-	-	19	23	33
University	23	5	7	9	2	-	20	20	30
Momase	23	4	12	7	-	-	14	25	19
Bavaroko	21	4	15	2	-	-	10	29	14
M.Gaindu	26	2	17	7	-	-	13	45	13
Rapatona	20	3	14	3	-	-	9	32	12

**Note:** For changes and or corrections to the points ladder, forward records to either George or Bakuwai at Bisini over the weekend or contact Apa on phone 3224241/3224242.

## PORT MORESBY WOMENS SOFTBALL RESULTSGAME 3 WEEK 3

**A Grade**

- Gazelle beat Malangan 7/0
- Mazda beat Chebu 14/0
- AB Bears beat All Stars 4/1
- Wantoks beat Norths 3/1

**B Grade**

- AB Bears beat All Stars 13/2
- Admiralty beat Dolphins 15/6
- Sunkist beat Mazda 7/5

**C Grade**

- Wantoks drew Norths 4/4
- Admiralty beat Sunkist 13/11
- Malangan beat Sharks 7/6
- Chebu beat Dolphins 20/1

## PORT MORESBY WOMENS SOFTBALL DRAW

1999/2000 SEASON DRAW 30/10/99

**DIAMOND #3**

TIMETEAMS	GRADE
0900 Admiralty vs Sharks	C
1030 AB Bears vs Gazelle	A
1200 Wantoks vs Chebu	A
1330 All Stars vs Malangan	A
1515 Mazda vs Norths	A

**DIAMOND #2**

0900 Wantoks vs Chebu	C
1030 Dolphins vs Mazda	B
1200 Admiralty vs Sunkist	B
1330 Dolphins vs Norths	C
1500 AB Bears vs Gazelle	B

**DIAMOND #1**

0900 Sunkist vs Malangan	C
All Stars "bye"	

## PUBLIC SERVANTS TOUCH ASSOCIATION DRAWS

Sunday 31, 1999  
Season proper - Sir John Guise Stadium




Time	Category	Team
12:30	Mix/F1	Auditor Vs Prime Ministers
12:30	Mix/F2	Elcom Vs M.Resources
12:30	OM/F3	Treasury Vs Fire Service
12:30	OM/F4	Health Vs Post PNG
1:00	Mix/F1	NJSS Vs OCA
1:00	W/F2	Water Board Vs Works
1:00	W/F3	Central Vs Transport
1:00	Mix/F4	Sports Commission Vs IRC
1:30	Mtrs/F1	Defence Vs N.Parliament
1:30	W/F2	A.General Vs P. Ministers
1:30	W/F3	Elcom Vs M.Resources
1:30	Mtrs/F4	Treasury Vs Fire Service
2:00	Mtrs/F1	Health Vs Post PNG
2:00	W/F2	NJSS Vs OCA
2:00	Mix/F3	Water Board Vs Works
2:00	Mtrs/F4	Central Vs Transport
2:30	Mtrs/F1	Sports Commission Vs IRC
2:30	Mix/F2	Defence Vs N.Parliament
2:30	Mtrs/F3	A.General Vs P.Ministers
2:30	Mtrs/F4	Elcom Vs M.Resources
3:00	W/F1	Treasury Vs Fire Service
3:00	W/F2	Health Vs Post PNG
3:00	Mtrs/F3	NJSS Vs OCA
3:00	Mtrs/F4	Water Board Vs Works
3:30	OM/F1	Central Vs Transport
3:30	W/F2	Sports Commission Vs IRC
3:30	W/F3	Defence Vs N.Parliament
3:30	OM/F4	A.General Vs P. Ministers
4:00	OM/F1	Elcom Vs M.Resources
4:00	Mix/F2	Treasury Vs Fire Service
4:00	Mix/F3	Health Vs Post PNG
4:00	OM/F4	NJSS Vs OCA
4:30	OM/F1	Water Board Vs Works
4:30	Mix/F2	Central Vs Transport
4:30	OM/F3	Sports Commission Vs IRC
4:30	OM/F4	Defence Vs N.Parliament

Bye: Harbours



# ZENAG - Gutpela kiau

# WANTOK SPOT



# PMSA i no klia long konstitusen

## HENRY MORABANG i raitim

I GAT wanpela singaut i go long ol soka referi long mas tingting gut na holim straik bilong ol.

Dispela singaut i kam long wanpela sinia kosa na administreta husat i no laik givim nem i tokaut olsem ol referi i no gat pawa long straik.

Em i tok aninit long konstitusen, referi i no gat pawa bikos ol i kam aninit long PNGFA o lokel soka asosiesen.

PNGFA na PMSA i gat komiti long lukautim wok bilong referi, na ol i save kolim Referi komiti.

Em i toktok strong olsem sapos ol referi i laik straik ol i mas risain. Ol referi i mas stap olsem namel man.

Dispela kosa i tokaut olsem sapos referi i gat belhevi, ol i mas sindaun na stretim toktok wantaim PMSA, na i noken straik nating, nating.

Nau yet i luk olsem PMSA na Referi Asosiesen long Pot Mosbi i no save gut long wok bilong ol. Sapos referi i straik, PMSA eksekutiv i mas tokim ol long noken straik bikos ol i nogat pawa.

Dispela straik bilong referi i wok long bringim nem nogut long soka insait long kantri ya.


Sapos ol referi laik go het long straik, orait olgeta mas lusim wok olsem referi. PMSA eksekutiv mas mekim save long ol referi o nogat i mas toksave long PNGFA, na PNGFA i ken mekim save long ol.

Sapos PNGFA i mekim save long o nogat, FIFA bai redi tasol long rausim ol long mekim wok referi.

Kosa ya i tokaut olsem nesanel kodineta bilong PNGFA referi i mas mekim wok bilong em. I luk olsem hevi i wok long kamap bikos planti ol referi i ting ol i narapela asosiesen na ol i ken straik long laik bilong ol. Samting tru, ol i kam aninit long lokel asosiesen na PNGFA.

Soka referi i no wankain olsem referi bilong ragbi lig we ol i gat asosiesen bilong ol yet. Em i tok ol referi bilong FIFA i save kam aninit stret long FIFA Referi komiti na dispela i wankain tu long PNG.

Pasin bilong straik na ol kankain rabis disisen bilong ol eksekutiv i wok long kilim soka insait long kantri.



• Gideon Kaka bilong Souths i givim strongpela takol long fulbek bilong Kui Raiders John Pep long Cambridge Kap gren fainel las wik Sande long Goroka. Raiders i win 16-12. Moa stori na piksa stap insait. Foto: Sape Metta.

Kosa ya tu i no amamas long toktok bilong presiden bilong PMSA Kuma Aua long stapim kompetisen.

Dispela kain toktok i kam long bikpela bos bilong soka i no gutpela tumas. I gat rot bilong stretim dispela ol hevi na bihain PMSA boss i ken autim wari bilong em long nius-kantri.

Kain pasin bilong autim toktok wantaim bel hat bai i no inap helpim tru wok bilong soka long PMSA.

Kosa i tok dispela ol toktok long trabel i kamap long Bisini i mas go long ai bilong Disiplinari komiti na bihain ol komiti i stretim toktok orait, PMSA eksekutiv i ken autim toktok bilong ol.

Nau kankain hevi i kamap long PMSA i soim tru olsem ol eksekutiv na referi i no save long wok na tu lo bilong ol yet. Na i gutpela sapos ol eksekutiv husat i gat tupela loya i stap long tim bilong ol i mas mekim sampela stadi long konstitusen na toksave long PMSA eksekutiv na tu ol referi.

## Lo kampani helpim Kyokushin karate

WANPELA lo kampani Carter Newell i givim K1,500 i go long Kyokushin karate tim long go pilai long Japan Wol Open Kyokushin sempionsip.

Dispela sempionsip bai kamap Novemba 5-7.

Tim bilong PNG em Walter Schnaubelt, Bernard Soari na Paul Pautani. Ol tripela paitman ya i gat nem long Isuzu Wol Open Kyokushin karate sempionsip i bin kamap long Pot Mosbi.

Em bai namba tri taim nau Walter Schnaubelt bai go stap insait long dispela kain pait long Japan. Taim em i no kisim sitisensip bilong PNG, em i bin pait long apim nem bilong Australia.

Bernard Soari na Paul Pautani i bin kamapim planti pait long Australia, tasol em i namba wan taim ol bai pait long Japan Wol Open Kyokushin karate sempionsip. Samting olsem 200 paitman bilong 145 kantri insait long wol bai kamap long dispela sempionsip ya.

Walter husat i sif paitman na tu lida bilong tim i tok olsem PNG i salim tim bikos ol kampani olsem Carter Newell i givim gutpela sapos stret. Na dispela mani i mekim na ol i salim tripela paitman.

Wanpela mausman bilong Carter Newell Lawyers John Beaty i givim mani i go long Walter Schnaubelt long hetkwata bilong Kyokushin Karate long Pot Mosbi long dispela wik.

"Mipela i save olsem pe bilong stap long Japan bai antap tru tasol dispela em i olsem liklik helpim kampani bilong mi i ken givim. Dispela em bilong lukautim ol long Japan long taim bilong pait."

Schnaubelt i tok em i amamas tru long helpim bilong lo kampani ya. Dispela sponsasip i apim tru tim spirit bilong tupela pilaia Bernard na Paul husat bai soim pes namba wan taim long Japan Wol Open Kyokushin sempionsip.

Sampela ol bikpela kampani i sapatim karate long dispela kantri em Airways Hotel, Lamana Hotel, Hebou Construction, Rouna Quarries na New Guinea Motors.

Schnaubelt i tok olsem Bernard na Paul em ol yangpela paitman. Tasol ol bai kamap olsem gutpela paitman sapos ol i ken kisim dispela kain helpim i kam long ol kampani long go kisim moa eksperiens long pait ausait long kantri.

"Mipela i promis long go pait na bai mekim wok stret. Bikpela samting em long mekim gutpela trening long hia na tu taim mipela i stap long Japan long redim mipela long pait wantaim ol arapela paitman," Schnaubelt i tok.

**Em i Gutpela  
Em i Tuna  
Em i bilong  
PNG stret...**



- ◆ Tuna kam long solwara bilong Papua Niugini Stret.
- ◆ 100% tuna mit stret, nogat bun na nogat skin.
- ◆ Planti mit istap long olgeta tin.
- ◆ Nambawan tru long kisim protein bilong buildim masol. Em i gat Vaitamen D. na Selenium bilong helpim yu long rausim na pait long sik kensa na ol sik bilong lewa.
- ◆ Prais inap tru long yu baim.



# Wantok

Digitized version made available by



**Copyright:** Under copyright

**Rights Holder:** Word Publishing Company Limited

**Use:** This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

**Constraints:** This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

**Note on digitized version:** Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.